

Mateeoche laenai Ena Nenaa Cana Coaunera Ere

*Cana Coaunera Calaohi Jesocurisito foerater-acuru
(Lc 3.23-28)*

¹ Caate Cana Coaunera Calaohi Jesocurisito foerateeurera Rabiri aina Abaraau foeratenojoinuru foerateeurera curuaacurune.

² Isaca inaca neein nenaalu jetao Abaraau.
Jana Isaca calaohilu jetao Jacobo.

Jana Jodaa aina rai noccoalacuru inaca neein nenaalu jetao Jacobo.

³ Faresi aina Sara jetaote, Tamara que nebateein Jodaa bereecuru nelu.

Jana Faresi calaohilu jetao Esroon.
Jana Esroon calaohilu jetao Armi.

⁴ Jana Armi calaohilu jetao Aminadaba.

Jana Nasoon jetaote, Aminadaba calaohi nelu.
Jana Saloomoon jetaote, Nasoon calaohinelu.

⁵ Jana Raba que nebateein Saloomoon calaohilu jetao Bosi.

Jana Roto que nebateein Bosi calaohilu jetao Oberi.

Jana Oberi calaohilu jetao Isaihasi.

⁶ Jana Isaihasi jetaote, reyneein nenaalu Rabiri inaca nelu.

Jana Oriasi comasaineein nenaalu que nebateein, Rabiri calaohilu jetao Saloomoon.

⁷ Jana Saloomoon calaohilu jetao Roboam.

Jana Roboam calaohilu jetao Abiasa.
 Jana Abiasa calaohilu jetao Asa.
⁸ Jana Asa calaohilu jetao Josafa.
 Jana Josafa calaohilu jetao Joraam.
 Jana Joraam calaohilu jetao Osiasi.
⁹ Jana Osiasi calaohilu jetao Jotaam.
 Jana Jotaam calaohilu jetao Acasi.
 Jana Acasi calaohilu jetao Esequiha.
¹⁰ Jana Esequiha calaohilu jetao Manasee.
 Jana Manasee calaohilu jetao Amoon.
 Jana Josiasi jetaote, Amoon calaohinelu.
¹¹ Jana Jeconiasi aina rai nejeraauru inaca
 neein nenaalu jetao Josiasi.

Nii bana jetaote, Israelitaauru mucuhin
 amanajaarelu, acaaaru atane caje roconajaain,
 Babilonia batane que ichaaoru coina.

¹² Nitohaneein mucuhin amanajaauruhane
 baiha jetaote, rai calaohi Salatieli sirilu Jeconiasi.
 Salatieli calaohilu jetao Sorobaberi.

¹³ Jana Sorobaberi calaohilu jetao Abiod.
 Jana Abiod calaohilu jetao Eliaquiin.
 Jana Eliaquiin calaohilu jetao Asoro.
¹⁴ Jana Asoro calaohilu jetao Sadoco.
 Jana Sadoco calaohilu jetao Aquiin.
 Jana Aquiin calaohilu jetao Elioon.
¹⁵ Jana Elioon calaohilu jetao Eleasar.
 Jana Eleasar calaohilu jetao Mataan.
 Jana Mataan calaohilu jetao Jacobo.
¹⁶ Nii jana Jacobo jetaote, Curisito Mesihasi
 neba Mariha lana Jose inacanelu.

17 Nitohaneein jetaote, niha Abaraauinne caje coaauneein lechoonca jena saain nichoalateeurelu, Abaraauun nefoerateeuru, niha Rabirine que tiaaojoaain.

Nii Rabiri caje coaauneein jetaote, lechoonca jena saain nefoerateeurelu, Babilonia batane Isaraelitaauru mucuhin amanajaauruhane que tiaaojoaain.

Nii mucunajaain amanajaauruhane baiha jetaote, lechoonca jena saain nefoerateeurelu, nejanooa Curisitone que tiaaojoaain.

*Nejanoaa Jesocurisitone
(Lc 2.1-7)*

18 Naojoainte nenaar nelu Jesocurisito. Nii bana jetaote Jose aina ita raauruhane rai niha Marihane jana jetaote, jaiti ita aina neeuruuhane ajiniha Cana Coaunera Suujue ichanohineein inae ausirinelu Mariha.

19 Nii jana esinae rauhijiriin jeriha Cana Coaunerane rijijieein cacha caohachaain suujua coaaraniha Josene jaun jetaote, nii chuni cacha rai canaanai siriha Marihane belanaala jianeein caje amunaa jerelu.

20 Nitohaneein inae amuhane coina suujua cuhane coaaucha Josene jana jetaote, sinihu rai ococohin jetao: “Jiaoriha Mariha raai ii comasainu quene coasiinera Rabiri nefoerateneein nenaar Jose. Nii canaanai niicha siriite Cana Coaunera Suujue ichanohineein nenaanera.

21 Inaeleinjiin calaohirichaain Marihara. Inae nejanoaa nii rai canaanaine jana Jesosoneein curuaateeura. Osa caje rai cachaneein neeniuuru

ichoteraanu nihane jaunte, Jesosoneein curuaareeincha,” nae jetao rai Cana Coaunera letono anjera.

²² Nitohaneein jetaote, rai nere bera inoaensi profeta que:

²³ “Chariji bana

quicha aina ichoaelanaala nенaa ranunate,
inae ausirineein
leinjiin canaanai siricheein.

Inae nejanoaane janate,

Emanoel neein curuaateurureein cachaaurura,”
naain nere bera inoaensi que beratiha Cana Coaunerane nainaelu.

“Emanoel,” naanete: “Cana Coaunerate cana aina ne,” nae.

²⁴ Inae niritii sinihocene caje nocohin jetaote,
nii rai aitoha Cana Coaunera letono anjerane tonoraain, comasainu que Mariha raelu Jose.

²⁵ Nejetaote, nejanoaa nii Mariha calaohi- Jesoso neein Joseecha curuaatine reentiaain, niri-jieein ita que turuelanaala ita aina ichaaorelu.

2

Enoto mitu nichajai jeloon caje turuuruha Jesoso nejanoa coaraa arasijie caje cha coitucuerane

¹ Nitohaneein jetaote, Jodea batane que ne-naa Beleeun nejanoaelu Jesoso, jelai batane curuaanaaneein niha *rey Erodesine* bana. Nii jana jetaote, Jerosaleeun enoto mitu nichajai jeloон caje turuha uure itolere que nerelaain arasijieeu caje cha coitucuereraauru cachaauru.

² Inae ecu turuhin jetaote:

“Chu ne, nii Jorioocuru Curuaanaa *rey* ne-janoanaa. Ocooca rai arasijiene coaracaanune jaunne turuhin coaraa uhacaanu, coroaecaanune coina,” naaure jetao turuhin, nii itolere coitucuuer-era cachaauru.

³ Nii nejanoaane coitucuhin jetaote, jataain nererojoecae *rey* Erodesi, satiin Jerosaleen co-coaichacuru aina jiniiquiin.

⁴ Nii jaun jetaote, satiin saseredotecuru curu-aanaacuru, Moisesa aitonjoan rauhi que cacha relaaurera, naaonjoainuri cotiharate Erodesi: “Chu nejanoareein Mesihasi,” naain acaauru caje baaane coina.

⁵ Nii jaun rene turuhin jetaote:

“Jodea batane que nena Beleeunte nejanoareeincha. Nitohaneein ecu nejanoaane coinante:

⁶ ‘Jodaa atane que nena Beleen nese,
coatiha ansijiin natiin

ii amurijiriin tabaain nenacaauru

neseeuру fautaain nerihheeini,

ii que netiin nejanoarihani leinjiin Curuaanaa
canu cachaauru

Isaraeli cocoachacuru

coroatajaneraneein

nenaane jaaunra,’

naain laenaelu Cana Coaunera ere bera *profeta*
inoiensicha,” naaure jetao Erodesi rai.

⁷ Nii jaun jetaote, nii chuni rai belanaala nii
arasijie caje itolere coitucuurerera cotiharatiha
Erodesine jaun jetao, rai turuhin beeuruuhane
jaun acaauru caje esinae rauhijiriin, “Naaonjoain
banate ococoelu,” naain nii ocooca arasijiene
coitucue.

8 Inae nitohaneein rai beeuruuhane caje coitucuhin jetaote:

“Chajaain Beleeun cuhin nii canaanai coaani-huche. Chucha ne. Cha cajecha nefoeratenaaneein ne. Chaen inae eruhichene carai biha uuchene canuhetonai coaraa uhene coroajera,” naain jetao nii itolere coitucuurera letoae Beleeun Erodesi.

9 Niritiin acaaaru letoaa *reyne tonoraain* Beleeun cuuruha nii itolere coitucuurererane jana jetaote, acaaaru ajiniha cuujue nii arasijie- enoto mitu nichajai que ocoocane jana acaauruuhacha coarai. Inae nii niha canaanaine jaaun turuhin jetaote, ecu nichoae inacue nii arasijie.

10 Inae ecu inaaucha nii arasijiene coaraain jetaote, jataain rachoojoeure nii arasijie caje cha coitucuureraauru.

11 Nitohaneein rachoojoeuruhane baiha loreri asae enohin coaracuruuhane jana jetaote, neba Mariha aina niha nii canaanaine coaraain jetao, rohan nelauriaain nii canaanai coroaecuruuhane baiha rai camela caje oro, enuha sacari jujui, chaen coretiin nena jujui, naaonjoainuri rocohin que nii canaanai belaihure.

12 Nii baiha jetaote, nii niha acaaaru letoaera Erodesine jaan jeloon situhin cauha cuuruuhane coataa acaaaru sini anuu caje coitucuhin jetao, leeocha bero cuhane cuhin jelaiha nataneu cauha cuure.

Egipto cuhin soroha Josene

13 Inae jelai caje amuuruha nii itolere coitucuurera *magocurune* jana jetaote, Jose sinihu rai ococohin jetao:

“Inae jetao nii canaanai ariha Erodesi sohin jaohane coina. Nii ajinihane ichei aitoon, nii canaanai aina rai neba amaain Egipto batane que cuhin sorohine coina. Chaen ichei bihanune reentiaain ecu neeura,” nae jetao rai Cana Coaunera letono anjera.

14-15 Nii jaun jetaote, sini caje nocohin nii canaanai aina rai neba amaain jetao, janotiin soroe Egipto nichae cunaa bero cuhane cuhin Jose, oha Erodesine reentiaain ecu nihane coina.

Nitohaneein jetaote:

“Egipto caje coaauneeinne canu Calaohi cotihareeunni,” naain beratihalu nere bera inoaensi *profeta* que Cana Coaunerane nainaane coina ailu.

Canaanaihuru soaajeratiha Erodesine

16 Nitohaneein coritaain comarohin caauruha nii arasiwie caje itolere coitucuurerane que nainaane jaun jetaote, jataain obajeein, ena nejanoanaa caje coaauneein, coroata jaanacai que tiaaojoaain, Beleeun sacuritaain nenacaauru canaanaihuru, nii Jesoso nejanoa beeuruha itolere coitucuurerane bana caje coaauneein nejanoanacaauru jitariin soaajerate Erodesi.

17-18 Nitohaneein jetaote:

“Rama nese quete
aohanrareein jataain inaderaain
chananaa tabaihuri.
Raquerite
calaochichuru coisiha aitoreein.
Nete inae esinae rauhijiriin
ooruha calaochichurune jaun,
ajetera jerelanaala aite,”

naain laenaalu *profeta* inoaensi Jeremihasine nainaelu.

¹⁹ Nejetaote, inae oha Erodesine baiha jetao, Egipo niha Josene jana sinihu rai ococohin jetao:

²⁰ “Chajaain nii canaanai aina rai neba amaain jelaiha Israeli batane que caunihura. Inae ooruha nii canaanai sohin jaonaa jereraaurulura,” nae jetao rai Cana Coaunera letono anjera.

²¹ Nii jaun jetaote, nii canaanai aina rai neba amaain jelaiha Israeli batane que cauha cuelu Jose.

²² Nejetaote, nii rai inaca Erodesi coreeraniha niha Arquelaaone coitucueratiha sinihu que Cana Coaunerane caje coitucuhin jetao, Jodea cuhane coasiha Calileea batane que cue Jose.

²³ Inae nii Calileea batane que turuhin jetaote, rauhijiriin cuhin Nasarete neseu ichaoha cuelu. “Nasarete cocoaicha neeinte curuaareein Jesoso,” naain beeuruhalu *profetacurune* nainaane coina.

3

Cana Coaunera Ere beebejiha Joaan Baotisitane (Mr 1.1-8; Lc 3.1-9, 15-17; Jn 1.19-28)

¹ Nii bana jetaote, Jodea batane que nenaacacha areroo ecocohin, ecu situnacaauru cachaauru cotijiaain acaauru rai Cana Coaunera Ere beebeje Joaan Baotisita.

² Nitohaneein acaauru relaain jetaote: “Inae nichuuntaa Cana Coaunera cojoanonaa. Aihane jaun nacoaauneein Cana Coaunera ere tonoraain, caohachaain inara ichao coreein neeuche,” naain jetao cachaauru rai beebejeein relanajae Joaan Baotisita.

3 Nii Joaan que jetaote:
 “Nerichaain cacha areroo
 eheehejeeein cacha cotiharanu.
 Nii ajiniha caohachaain inara suujua baaso jia-
 neein,
 caohachaain inara suujua coaraain,
 caohachaain neeuche,
 turuha Cana Curuaanaane
 raotoijeein raaichene coina,”
 naain laenaelu *profeta* inoaensi Isaihasi.

4 Camecho ujui caje ichanohin cajione que ca-
 jionequiin jetaote, jacari caje ichanohin siitoroon
 que ichoraquiin, sisiincho, irichaje, naaonjoain-
 uri que lenoneein nelu nii Joaan.

5 Nii cacha areroo neein cachaauru relaa
 Joanne coitucuhin jetaote, satiin Jodea batane
 caje, Jerosaleen caje, Jorodaan batane rohan caje,
 naaonjoainuri cajene maajeein turuhacoaain
 aonaa cuure arajii cachaauru.

6 Nitohaneein rene turuhin esinae rauhijiriin
 suujuelanaala osaaocuruhane beeuruuhane
 jetaote, cojunacatenaaca nucuhe Jorodaan
 cuhane teein acaaaru baotisarejetelu Joaan.

7 Nejetaote, jataain arajiiin rene turuhacoaau-
 ruha acaaaru baotisaane coina fariseeocuru aina
 sadoseeocurune coaraane jaun jetao:

“Cha inara rai aite turu rai nena caseteco tabai
 caje nichoteeichene coinate taibinaecuru- acano
 rijijieein nenacaauru cachaauru.

8 Aihane jaun nii ajiniha caohachaain inara
 suujua coaraain caohachaain ichaaoche. Aihute
 esinae rauhijiriin nacoaauneein Cana Coaunera
 coitucuhin, inara ichao coreein caohachaain

nenaajerequichene coaracurumiin leeochaauru
cachaauru.

⁹ Jiaonrihachu chaen nejesinajeein: ‘Canacaanune Abaraau nefoeratenichaanu,’ naain irihache. Cana Coaunerate naine caa ajeri caje niha natiin Abaraau nefoerateeuru coaaunaa ne.

¹⁰ Chaen techu inaana inaeniha temulene, cojoaisi aina curuataain tero que sauhin usihanau mocohaca. Nii rijijieeinte inae esenetaaichuru letoaa cureein nii turuha uhenenu usi tabai jana.

¹¹ Canune esinae rauhijiriin nacoaauneein Cana Coaunera ere tonoraain neeichene coarateeichene coujunacane que, acauhanau teein inara coujunacateein inara baotisaaun. Jana canu baiha turuha uhenite laen, inara suujue cuhane Cana Coaunera Suujue teein, usi quene maajeein inara coujunacateein inara baotisareein. Acate jataain canu amurijiriin cocoainaain letononeein neeun. Nii rai safato amaeranu que niha natiin nelatejehaaun.

¹² Charijieeein teeinti aroso taojiaain, jelai teein rai fero taojiae mocohane coina taicha. Nii rijieeinte, jelai teein coitucuurera raain, jana nii nere tonorana jerelanaala nenacaauru jelai teein mocoha cureein, chabana jacanaa charanejeein nenaajesi que,” naain jetao cachaauru rai beebeje nii Joaan.

*Jesoso cojunacatiha baotisaa Joaanne
(Mr 1.9-11; Lc 3.21-22)*

¹³ Nii jana jetaote, baotisaa Joaanne coina Calileea caje cuhin, nii niha Joaanne jaaun nu-cuhe Jorodaau turuha cue Jesoso.

¹⁴ Nii jana jetaote, jauriaanejeein baotisanaa jerelanaala jetao:

“Chanuna ii canu baotisanaa naineei natiin, ii canu rene uhi,” naa Joaanne jana jetaote:

¹⁵ “Jauriaa niriimiin ena. Jauriaanejeein satiin aitoha Cana Coaunerane jaan ichacaanete caohachae,” nae jetao Joaan rai Jesoso. Niritoha raine jaun jetaote, jerihane rijijieein baotisae Joaan.

¹⁶ Nitohaneein coujunacatiha acauhanau teein baotisaa Joaanne jana, acau caje mituha Jesosone rijieoritiin jetaote, nejoracaad dede bacujuane jana, leinjiin serori rijijieein nichoae fauha uha Cana Coaunera Suujuene jana coarae Jesoso.

¹⁷ Nii jana jetaote:

“Caate jataain quiicha belaain canuhacha cocoinanohin canu Calaohi nera,” naain toniha erenaa dedeeune jana aonajeeunre.

4

Baaso que Jesoso sarunaa jeriha moconajaerane
(Mr 1.12-13; Lc 4.1-13)

¹ Nii baotisaa Joaanne baiha jetaote, Cana Coaunera Suujue amanojoineein cacha areroo cue Jesoso, ecu coujuhin coaraa moconajaerane coina.

² Nitohaneein cacha areroo niha jenachoonca jiichooneein, jenachoonca janotiineein lenone lanaalane baiha mijiitoha Jesosone jana jetaote,

³ coujuhin coaraane coina rene turuha cue moconajaera.

Nitohaneein rene turuhin jetaote: “Chajaain aihane esinae rauhijiriin Cana Coaunera Calaohi

neeine, caa ajeri jaberocooru rai aitoote lenone-neein nerotomiinchā,” naa Jesoso rai moconajaera-ane jana jetaote:

⁴ “Nete Quiricha inoaensi cuhane: ‘Coatiha lenoneechā que ichaonaa nainihei cacha. Cana Coaunera ere tonoraain, jerihane rijijieein ichaohanete nainere, jerichanejeein ichaoha cachane,’ naain laenanohineein ne Cana Coaunera Quiricha inoaensi cuhanera,” nae jetao moconajaera rai Jesoso.

⁵ Niritoha raine baiha jetaote, Cana Coauner-aacha que banijiaain nenaas Jerosaleeun nese que nenaas Teenforo ecuunni choae Jesoso inaain jetao:

⁶ “Chajaain aihane esinae rauhijiriin Cana Coaunera Calaohi neeine caalai caje nomaroteeute coaracaa. Cana Coaunera Quiricha inoaensi cuhanete:

‘Rai letonocuru anjeraaurute

letoareein Cana Coaunera,

ii beraaihuruhanee coinā.

Acaaurute

rai biji que ii michuurureein,

nabana ajeri que necunaitaaaine coataa,’

naain laenaerate Cana Coaunera,” naa rai moconajaera-ane jaun jetaote:

⁷ “Chaen techu Cana Coaunera Quiricha inoaensi cuhane: ‘Jiaonriha ii Curuaanaa ii Coaunera coujuhin coaraaine,’ naain laenanohineein ne,” nae jetao moconajaera rai Jesoso.

⁸ Satononejeein jetaote, jataain ecuuneein nenaas ichatane ucuuno que amaain jetao, jitariin caa chauratane que nenacaauru neseeuru

coaarateein, que neliteein ichaonacaaurune maajeein coaarateein jetao:

⁹ “Jitariin caa ena iicha coaraine ichei tereeuni, neseeonriaain canu coroaequine,” naa Jesoso rai moconajaerane jana jetaote:

¹⁰ “Cana Coaunera Quiricha inoaensi cuhanete: ‘Leinjiin ii Curuaanaa ii Coaunera coroajeein raaicha neliteein rai nere tonoraau,’ naain laenanohineein nera. Chajaain ena canu caje amuhachaaura moconajaera,” naain jetao moconajaera sitae Jesoso.

¹¹ Niritiin moconajaera sitaa Jesosone jaaun caje amuhane jana jetaote, rene turuhacoain coroatajanecure anjeraauru.

Calileea cachaaru relaane nunuhetiha Jesosone

(Mr 1.14-15; Lc 4.14-15)

¹² Caresero cuhane Joaan enoaauruhane coitu-cuuriin jetaote, Calileea nichae cuelu Jesoso.

¹³ Nejetaote, Nasarete ichoaelanaala, Saboloon aina Nefatalii nefoerateeuru atane que nena ne-muri auhaniha Caferenaao ichaoha cuelu.

¹⁴ Nitohaneein jetaote:

¹⁵ “Cucuana auhaniha Jorodaan jerau Saboloon aina Nefatalii atane-
Calileea ichaonacaauru
Jorioniheichurute
inae jianacoon rai nichao baaso caje mituu-rureein.

¹⁶ Jana nii ooruhane bana nitajeeneeureite, inae leeocha ichaonaa que ichaaore,” naain laenaalu *profeta* inoaensi Isaihasine nainaelu.

17 Nii caje coaauneein jetaote: “Inae nichuuntaa Cana Coaunera cojoanonaa. Aihane jaun nacoaauneein Cana Coaunera coitucuhin, caohachaain inara suujua coaraain, caohachaain neeuche,” naain jetao cachaauru rai beebejeein acaauru relae Jesoso.

*Jenai ate mucuurera cotihaca Jesosone
(Mr 1.16-20; Lc 5.1-11)*

18 Nii cachaauru relaane caje Calileea conemuri auhaniha cuujihane jaun jetaote, coroatajai ita nejeraauru Simoon Fedoro neein acaauruhacha curuaatei, chaen rai nejera Aanderesi, naaonjoainuri erue jetao Jesoso, acaauru amihaneeo niha ate mucuuruhane jaun, ate mucuuruhane coina acauhanau rai rede nalaecuruhane jana.

19 Nii jana acaauru coaariin jetaote:
“Chajauche canu ainate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesoso.

20 Nii rijieoritiin jetaote, acaauru rai redeeuru ratiriin Jesoso aina cuure.

21 Nii caje basiinjiin cutiin jetaote, coroatajai ita nejeraauru Sebedeo calaochichuru Saantiaao, Joaan, naaonjoainuri coaari Jesoso, leinjiin bote cuhane neein acaauru rai redeeuru rucuheca neeuruha rai inaca ainane jana. Nitohaneein coaarinjaajin cotihanaaca Jesosone jaun jetaote,

22 nii rijieoritiin bote cuhane acaauru inaca ratiriin caajie cuure.

*Arajii cachaauru relaa Jesosone
(Lc 6.17-19)*

²³ Nitohaneein cuhin jetaote, Calileea sacuritaain cuhecujuueein, sinacocaauru naineein eno-henojoeein cachaaaru relaain, Cana Coaunera co-joanonaa erenaa raotono que ereerejeein, itolere cunai caaun cunaitenacaauru, jaberoco que cu-nainojoiriin nenacaauru, naaonjoainurine maa-jeein rautaacoae Jesoso.

²⁴ Nii jana jetaote, satiin Siria batane sacuritaain inae Jesoso benaa coitucuhin jetao, araai laurii cunai caaun cunaitenacaauru, jaberoco que cunanacaauru, coitucuchuhi que suujue-conacaauru, otonacaauru, bacosacuru, naaon-joainurine maajeein rene amauruhane jana jetao, acaauru rautaacoae Jesoso.

²⁵ Nitohaneein jetaote, Calileea nenacaauru neseeuru, Decapolis, Jerosaleen, Jodea, Jorodaan batene uurihuru, naaonjoainuri cajeeeurune maajeein cuhacoaain jetao, Jesoso sacuhin rene turuhacoaaure arajii cachaaaru.

5

*Ichatane ucuuno que cuhin ecu cachaaaru relaa
Jesosone*

(Lc 6.20-23)

¹ Arajiin rene turuuruha cachaaurune coaraane jaun jetaote, aina nerelanacaauru aina jiniiquiin ichatane ucuuno que iniin jetao, ecu nelauriariin lauheque Jesoso.

² Nitohaneein ecu netiin acaauru relaain jetaote:

³ “Nerausiaaecuruha latiha acaauru suujuane coitucuhin nenacaauru, Cana Coaunera Cojoanonaa que neeuruhane jaun.

⁴ Nerausiaaecuruha inaderaaeriin ichaonacaauru.

Niichurute cairichaaajoaain coarae Cana Coaunera.

⁵ Nerausiaaecuruha leeochaauru amurijiriin nenaac coacuelanaala raotojoeein ichaonacaauru.

Niichuru raite, acaauru que banihateein niicha rucujuei atane tereein Cana Coaunera.

⁶ Nerausiaaecuruha corajeein esinae rauhijiriin jeriha Cana Coaunerane rijijieein leeochaneein namute cacha coaraelanaala, niheichu namute cacha cairichanaa coacuhin niha leeochane jerelanaala, naaonjoaain caohateraneein nenacaauru niicha coaana jerei coaracururichaaine jaun.

⁷ Nerausiaaecuruha cairichaaajoaain leeochaauru coaraain, chaelai lateein neeu-ruhane, acaauru coroatajaneein naaonjoaain nenacaauru.

Nii rijijieinte cairichaaajoaain acaauru coaraain, jeelai amuritoheriin acaauru coroatajanereein Cana Coaunera.

⁸ Nerausiaaecuruha caohachaain suujua coaraain caohachaain ichaonacaauru.

Niichurute esinae rauhijiriin Cana Coaunera aina jiniiquuin niha cuurureein.

⁹ Nerausiaaecuruha raotojoeein jiniiquuin ichaaoruha cachaaurune coina coroatajaneein ichaonacaauru.

Niichurute rai calaochineein teein acaauru coaareein Cana Coaunera.

¹⁰ Nerausiaaecuruha Cana Coauneraacha jerei ichacuruhane coreniha mucunojoineein, casetecanojoineein, arinojoineein, naaonjoaain

nenacaauru, Cana Coaunera cojoanonaa que neeuruuhane jaun.

11 Nerausiajeeinte neeiche canu cachaneein neeichene coreniha inara nocoeje chanuhin, inara sohin, joaereein inara que ereein, naaonjoaan cachane.

12 Nitohaneein techu cairichaerinojoineein rautanohinelanaala ichaaorelu Cana Coaunera ere bera inoaensihuru *profetacuru*, inara ajiniha nenacaaurulu.

Aihana jaun raotojoeein rachoojoeein, chaque tonajelanaala neeuche, dedeeu raoti ichaonaa que inara coreterihani Cana Coaunerane jaun.

Lenone raotonon tera aina cacha conaeraneein nena

(*Mr 9.50; Lc 14.34-35*)

13 Charijieein teeinti setuhane coataa, tebe que inihos colaa in rucuhecaa. Nii rijijieeinte nabana nitajeeuruha cachaaurune coataa, acaauru ichao baaso rucuheraneein neeiche. Inae lenone cotebetena naineniha tebene, inae lenone raotonon tenaa nainerihei. Nechu joaaenreen atane ichoae jaonojoineein, shaonohineein nihane coinaachate nelate. Nii rijijieein inara netonai, cacha rai ichaonaa raotonon coaaratelanaala cacha relaeneeichene, inara netonai nii chaque nelatelanaala neriquicheein.

14 Ichatane ucuuno que niha leinjiin nesene, nihei chuni coaraelanaala nainejei. Nii rijijieein techu satiin cacha notaracaae inara aina cuain niicha jerei coaaratiha Cana Coaunerane jaancono rijijieein neeiche.

15 Nii rijijieein nihei chuni cono mocohin darohe asae tera. Bujuaihu telanaalate ucuun tihaca, satiin conohanau turuuruha loreri asae turunacaaurune coina.

16 Nii rijijieein cacha cononeein satiin cachaauru que caohacha ichaquichene coaarateein, acaauru que coitucuerateein neeuche. Aihute esinae rauhijiriin caohacha ichaquichene coaraain Cana Coaunera coroaecuruhine cachaauru.

Cachaauru relaa Moisesane jaan- rauhi coitucueratiha Jesosone

17 Coatiha inara relaain nihalu Moisesane jaan rauhi jianeein neeichene coina, cau turuhin nihaaun. Nihiechu inara relaauruha profetacurune jaan jianequichene coina turuhaaun. Nenacaen nejian, nii inara relaauruhane jaan coitucuhiche esinae rauhijiriin jeelai amuritoheriine coina, 'Naaonjoain quete aite,' naain inara rai biha uun.

18 Esinae rauhijiriine inara rai aitoreeunni, jaiti niha dede, chauratane, naaonjoainurine que tiaaojoaain, coatiha aninoaerarinaai le erenaanejeein, satiin nii aitohane rijijieein situhane reentiaain, nii Cana Coaunera tenojoin Rauhi Inoaensi.

19 Nitohanihane jaun nii rauhi inoaensi caje leinjiin leeochaauru fautaain nelatihei rijijieein nena a rauhi tonoraelanaala nena, nihechu que leeochaauru relaenihane, acate Cana Coaunera Cojoanonaa que jataain nelatenereein. Nete caohachaain tonoraain, nii aitoha Cana Coaunerane rijijieein ichaohin, esinae rauhijiriin

leechochaauru relaerate, jataain nelatineein nereein Cana Coaunera Cojoanonaa que.

²⁰ Rauhijiriine inara rai aitoreeunni, Moisesa aitoonjoan rauhi que cacha relaaurera aina fariseeocuru amurijiriin, inara rai Cana Coaunera aitoonjoan tonoraain rijijieein niicha icharatei ichaeneeichene, coatiha Cana Coaunera Cojoanonaa que ichaonaa naineriheicchein.

*Namute cacha aina obaaecane caseteco coaarihine que cacha relaa Jesosone
(Lc 12.57-59)*

²¹ Inarate coitucuhiche: ‘Jiaoriha sonajaain jaochihene. Sonajaain joaerate caseteco coaareein,’ naauruha inara foerateeurera rai ne.

²² Nena laen canu inara rai aitoon. Chunocoha namute cacha aina obajei, nii obaecane jaan jera aina rucujueein que suujua acatelanaala nenaate, caseteconeein niha cureein. Jana rai nejera que ‘Cha coitucuhhee,’ naain ereite, casetecaeratereein nitohanai rucuhecuruhane coina nenacaauru- *Junta Supremacuru*. Jana, ‘Chaque nelatihee’ inacojoeeinte neei,’ naain namute cachaauru que ereite, usi tabai jana nijiaoreein.

²³ Aihana jaun ii que suujua acatiha Cana Coaunerane coina chaelai amaaai que belaaine coina Teenforo asae nena rori- *altar* ichoaene jana, ii cotaairii niha chamute cachane que coaaquine,

²⁴ jauriaanejeein caohachaain neein ii cotaairicha ainane coina, nii rori acatiha nii iicha amai ratiriin, aina rucuhenihu. Inae aina caohachaain rucuhequine baihate laen nainreei

jelaiha cuhin nii rori- *altar* ichoae nii Cana Coaunera belaaine jaan teeine.

²⁵ Chunocoha inara amute cacha, cocainanacaaihuru rai inara coulurujeein nihane, raotojoeein aina ereein rucuhecuche, joesio rai inara colurujihane coataa. Aineeichenete folisiaa rai inara tiha joesione, caresero cuhane inara enoaaurureein.

²⁶ Nitohaneein ichaeneeichenete nii caresero cuhane neriquicheein mituhelanaala, nii baaso ichaquichene coretequichene reentiaain. Esinae rauhijiriine aitoon inara rai.

*Comasainelanaala nena ene dadaeniha
cachane coina relaa Jesosone*

²⁷ Inarate: ‘Jiaonriha inara sinijeranelanaala nena ene dadaaichene,’ naain inoaenlu inara relaauruhalune coitucuhiche.

²⁸ Esinae rauhijiriine laen canu inara rai aitoon. Chunocoha suujua cuhane ene jereein coaarate, suujua cuhane nejelau ene que naosate.

²⁹ Inara nota osa que inara sarunaa jerihane nii inara nota que coaraain, inaraacha jerei caje amuuche, nabana inara nota coreniha baaso ichaquichene, inara notaacha usi jana cuelanaala, satiin inara jaberoco usi jana nitajihane coataa.

³⁰ Jana inara biji osa que inara sarunaa jerihane, coa nii inara biji turuaache nii inara sarueratenaa jerihane jaan que. Mucuhichene ajiniha caje amuuche. Nii inara bijiicha mocoelanaala, inara jaberocone maajeein usi tabai jana nitajihane coataa.

*Ene raain joaeranihane, osa que nesaruha
cachane que, cacha relaa Jesosone
(Mt 19.9; Mr 10.11-12; Lc 16.18)*

³¹ Chaen techu inoaenlu: ‘Chunocoha comasai joaeranihane, nii comasai jaohane jaan cocoricha teeuche raite aina comasai jaohine,’ naain inara relaurelu.

³² Esinae rauhijiriine laen canu inara rai aitoon. Leeocha cacha aina ichoaenihane jana comasai joaerate, inae osa que nesarue. Jana nii quicha jaonojoin ene raerate, jerichanejeein osa que nesarue.

*Cana Coaunerate coaraje, naain nohaniha
cachane que, cacha relaa Jesosone*

³³ Chaen techu inara inoaensihuru rai: ‘Jiaonriha Cana Coaunera notaracae netiin, Cana Coaunera bajaain, rai chaelai benatequichene nihanatiin teneeichene,’ naauruhane coitucuhiche.

³⁴ Esinae rauhijiriine canu inara rai aitoon. Jiaonriha joaereein inacojoeein: ‘Cana Coaunera coreniha,’ naain ereeichene. Niheichu: ‘Dede coreniha,’ naain erenaa nainiheeiche, Cana Coaunera nelaurianaja niha dedene jaun.

³⁵ Niheichu atane coreniha nihanatiin nainiheeiche, nichaura Cana Coaunerane jaan nihane jaun. Niheichu Jerosaleen coreniha nihanatiin, Cana Coaunera nese nihane jaun.

³⁶ Niheichu inara couturi coreniha chaelai ichaquichene coina erenaa nainiheeiche, inara jerequichene que jichosiin, nesomaraain, naaonjoaain nenerihani inara coturijine jaun.

³⁷ Chaelai que: ‘Icharihanuhin,’ naaichene ichacuche. Jana: ‘Icharihaauni,’ naaichene coa

ichacache. Nelatihei cha ichaeraanu rijitiin nohaneein irihacane. Niite baaso ne.

*Soeraane, nerinanaa naineniha chunine que
cacha relaa Jesosone
(Lc 6.29-30)*

³⁸ Inarate inoaenlu: ‘Chatohaneein inara soeraniha inara cunaitaaine, inara netonai cunaitaain nii inara soera sooche,’ naauruhane coitucuhiche.

³⁹ Esinae rauhijiriine canu inara rai aitoon. Jiaonriha chatohaneein baasoneein teraquichene neurinanaa coaauquichene. Aihane jaun inara meri faohitoroanihane, rai jera netonai icharatecuche.

⁴⁰ Chunocoha cocoainanacai rai inara coluru-jueein inara obiri ruluhane, nii jelaronaa bana inaraacha jiai inara obirine maajeein teeuche.

⁴¹ Inara que anajiin amaeratiha cocoainanacai, inara laurinelanaala nenaane, nii bajaane amuritoheriin amanaa nainequichene coaarateein amaauche.

⁴² Inara caje niicha latei bajaain niha cachane, rai teeuche. Jana inara rai cainaane coina chaaelai bajaain niha cachane, chunaelanaa rai niicha latei teeuche.

*Cotaicha belaain niha cachane coina cacha re-laa Jesosone
(Lc 6.27-28, 32-36)*

⁴³ Chaen techu inoaenlu: ‘Inara belaichaauru belaain, inara cotaihurera cotaihuche,’ naauruhua inara raine coitucuhiche.

⁴⁴ Nena laen canu inara rai aitoon. Inara que nejeratenacaauru belaihuche. Inara rerohecaera rai Cana Coaunera bajaauche.

45 Nitohaneein neeichenete, dedeeu nena
Cana Inaca Cana Coaunera calaohineein
neriquicheein. Acate enoto coaaunae,
cojoanoonetojoeein nechu aansaineein
nenacaauru rai, caohachaain nenacaauru
rai, naaonjoainuri conaeranu que nihane
coina. Chaen techu suujua coaraelanaala
nenacaauru rai, suujua coaraain nenacaauru
rai, naaonjoainuri rai elo letoae acaaaru rai
caohachanu que.

46 Jana acaihaniji inara belaichaauruhacha
belaichene, chatohanai que jana inara
belaiche Cana Coaunera, inae cuu tihane bana.
Coaracuche nachuhinti Roma curuaanaa rai
impostenu que coriqui bajaurera netonai
jataain nechu aansaineein neeuruha natiin,
nitohaneein ichaaoruhane.

47 Jana inara belaichaauruhacha rai raotojoeein
ereein, leeochaauru aina raotojoeein erelanaala,
naaonjoaain neeichen, chatohaneeinna jana
esinae rauhijiriin inara ichao coreein neeichen
coaracurure cachaauru, Cana Coaunera
coitucuuruhi nihanatiinte, inara rijijieein neeure.

48 Aihana jaun caohachaain rauhijiriin
neeuche, aiha Cana Coaunerane rijijieein.

6

Caohacha ichaa cachane coina cacha relaa Jesusone

1 Jiaonriha nechu raujiaain inara coaracuruha
cachaaurune coinaacha cacha notaracaae Cana
Coaunera jerenohin ichaquichene. Nitohaneein
neeichen coatiha chaque inara rai cainarinaain
Cana Coaunera.

² Aihana jaun cha lateein nenacaauru coroata-janequichene, jiaonriha itolereneein cachaauru rai beein acaauru coroatajanequichene. Cana Coaunera coitucutoha nocoetonacaaurute cacha notaracaae, nechu jataain acaauru aina caohachaain niha cachane coina, Sinacoca asaae, bero cuhane, naaonjoaain cacha belaihure. Jiaonriha acaauru rijijieein ichaquichene. Acaaurute nechu jataain aihure, acaauruhacha esenetaain, caohachaain acaauru coaraa cachane coina. Nete inae caohachaain acaauru coaracuruha cachaaurune que inae cainanohine acaauru rai.

³ Aihana jaun inara, cairichaihuru coroata-janiha cha teeichene, jiaonriha jataain inaraaacha belaai rai niha natiin beeichene.

⁴ Nitohaneein esinae chuni que coaaratelanaala teeichene coaraanete, inara rai cainareein cana Inaca Cana Coaunera.

*Cana Coaunera bajanaa que cacha relaa Jessoone
(Lc 11.2-4)*

⁵ Cana Coaunera bajaichene, coa bajaauruha Cana Coaunera coitucutoha nocoetonacaaurune rijijieein bajaache. Acaaurute sinacoca asaae, joaereein bero cuhane, naaonjoaainu neeichuru Cana Coaunera bajaigure, nechu jataain caohacha ichaa nocoetiin aihuruhane coaracuruha cachaaurune coina. Nete nii coaracuruha cachaaurune coina aihuruhaneecha que, inae cainanohine acaauru rai.

⁶ Nete laen ii Cana Coaunera bajanaa jereeine, caohacha jelai netiin coaraeniha chunine jana, bujuaihu ucuha cuhane netiin ii Inaca Cana Coaunera bajaaine caohachae. Nitohaneein

chuni que necoharaeratelanaala netiin
bajaachene coaraanete, inara rai inaraacha
bajai tereein ii Inaca Cana Coaunera.

⁷ Cana Coaunera bajaachene, coa acaauru rai
ecaantocuru bajaae baaecuruha araaai saain
Cana Coaunera coitucuhichurune rijijieein joaen-
reen ereerejeeein baaache.

⁸ Aihana jaun jiaonriha acaauru rijijieein nee-
iche inarane.

Cana Coaunerate, caje bajaachene ajiniha
inara suujua cuhane inaraacha latei latequichene
coitucue.

⁹ Aihane jaun Cana Coaunera bajaachene:
'Satiin canacaanu Inacaneein dedeeu nena Ofa,
Iineein neeine coitucuurumiin satiin cachaaaru.

¹⁰ Turuhine Ii Cojoanonaa.

Caa chauratane que iicha jerei ichacurumiin,
dedeeu ichacuruhanne rijijieein.

¹¹ Cojoanoonetojeeein canacaanu rai lenone oco-
teeu.

¹² Baaso ichacaaunne,
canacaanu que ii suujua acatee,
canacaanu rai baaso icharaauru que,
canacaanu suujua acatichaanune rijijieein.

¹³ Jiaonriha osa que nesaruhin
nihacaanune nainatejeeein neeine.
Canacaanu caje moconajaera sitaau.

Inae,'
naain Cana Coaunera baaache.

¹⁴ Inara rai baaso icharaauru que, inara suujua
acatee, acaauru aina caohachaain neeichenete,
Cana Coaunera netonai inara que suujua acatena
nainreeein.

¹⁵ Jana inara rai baaso ichaain neeuruha leeocheaurune jana, acaaaru que inara suujua acateneeichene, Cana Coaunera netonai inara osa que suujua acatenereein.

Suri noitelanaala netiin Cana Coaunera bajaa-ruha cachaaurune que, cacha relaa Jesosone

¹⁶ Inara suri couu netiin Cana Coaunera baaichene, jiaonriha aihuruha Cana Coaunera coitucutoha nocoetonacaaurune rijijieein, nechu inara suri couu neeichene coaracuruha cachaaurune coina coa cunaitenaa meri tocohaneein inara meri tihache. Inae nitohaneein ichacuruhane coaraain acaaaru belaichuruha cachaaurunete, nii acaaaru belaichuruhaneecha que inae cainanohi ne acaaaru rai.

¹⁷ Jana inara, inara suri couu netiin Cana Coaunera baaichene, inara meri culejeein nerujuueein raotojoeein bajaauche,

¹⁸ inara suri couu netiin Cana Coaunera baaichene que nainacuruha cachaaurune coataa. Nii banate laen leinjiin Cana Coauneraacha inara belaicheein, inara suri couu netiin baaichene coreniha.

*Dedeeu raoti ichaonaanaja
(Lc 12.33-34)*

¹⁹ Coa caa chauratane que raotiin nena coacuhin, coriquihona neein itolere rucuhele sirina coaacuhin nihache, inara rai cojoanojoiin nitajeein, basijiaaurureein asijiautooru, naaonjoanrichaaine jaun.

²⁰ Caa chauratane que caohachaain nena coacuhin mainajeein amihaneein coriqui taojiaachene jianeein, nii aaichene rijijieein

mainajeein Cana Coaunera rai itolere caohachanu ichana que amihaneuechete dedeeu inara rai cainanohinemii. Nii dedeeu laen asijiatooru nihanatiin turuhin inara basijiauna nainerinaain. Niheichu cojoano, ecu enohin aasaena nainerinaain.

²¹ Nitohanihane jaun jauriaanejeein caohatiin coaaucuche, inara ichao rai inaraacha ichanenu que. Inara ichao rai jataain nelateineein niha coriquine esenetaaichene acaacha ichacuche. Jana inara ichao rai nelateineein niha Cana Coauneraacha icharatenohine esenetaaichene acaacha ichacuche.

Cacha jaberoco conaeraneein niha cacha suujuane

(Lc 11.34-36)

²² Inara notate inara suujua que itolere inaraacha coarai coitucueratera ne. Aihana jaun inara nota que inaraacha coarai coitucuhin, ichaquichene caohatiha inara suujuane tonoraai ichaeneeichenete jianacoон neriquicheein.

²³ Jana inara nota que baasonihane coaraquichene saijieein, inara suujua nii baaso ichaquichene jerihane rijitojoeein baaso ichaquichenete, nocohenaanau nijiaonreein inara suujue.

Coriquiicha que coacuhin Cana Coaunera jerenohi ichana jereniha cachane

(Lc 16.13)

²⁴ Nihei chuni coroatajai curuaana letononeein nenaa nainei. Leinjiin belaain acaacha ere tonoraain, nii leeocha que jaolequiin nere tonoraenerihane jaun. Nii rijijieinte Cana Coaunera sa-

cunaa nainene cacha, coriquiicha que coacuhin nihane.

*Jerihane rijijieein ichaonacaauru cachaauru
ichao beraihha Cana Coaunerane
(Lc 12.22-31)*

²⁵ Nitohanihane jaunne inara rai aitoon. Coa lenoneein acau cohin ichao hichene jaanu, inara cajione, naaonjoain que nererojoe caaeriin ni-hache. Tana lenone amurijiriin nelatiha inara ichaone jana, cajione amurijiriin nelatiha inara jaberocone coitucuhin neeichene.

²⁶ Coaracuche nachuhinti temule jaain niicha quiineeuri taojiaain rucuhecuruhane jaanu colo-heri siriin naaonjoaain neeururiha tajaaecuru. Nete laen cana Inaca Cana Coaunera, lenoneein ichaaoruhane coina acaauruhacha quiine teein ne. Inarate nii tajaaecuru amurijiriin jataain neliteein neeiche.

²⁷ Inaaonjoan saneein niha natiin itolereneein suujua cuhane coaaucha cachane niha natiin, nichao cariaain ichaonaa nainihei.

²⁸ Chanuna inara cajione que nererojoe caaeriin neeiche. Coaracuche nachuhinti ajenacuru niicha jiaaenine que nichanaa ichaain, amihaneein, naaonjoaane que airijiin omarohin, jataain caohatonanaain ujuaneein naaonjoaain neeuruhane.

²⁹ Jana rey Salomoon, coatiha nii aihuruha ajenacurune rijijieein niheilu, caohati cajione que necoreeteein nihalune saijieein.

³⁰ Tana mocohin nitajerai niha ajaenane sai-jieein, caohachaain omarohin nihane jaanu teein

niha Cana Coaunerane coitucuhichene. Chanuna jana chaen, nii amuritoheriin inara cajioneterichaain Cana Coaunerane esenetaeneeichete, cha esenetana jeriheichuru cachaauru.

³¹ Nitohanihane jaun nainiheeiche: ‘Chaaque lenoneeinna acau cohin, necoreeteein, naaonjoaain nerichaache,’ naain que nererojoecaain nenaan nainiheeiche.

³² Cana Coaunera coitucuhichurute, niicha que nererojoecaain niicha sacunaa jere. Nete laen Cana Coaunera inaraacha latei latequichene coitucue.

³³ Aihana jaun Cana Coaunera Cojoanonaacha que coacuhin, jeriha Cana Coaunerane rijijieein ichaohin, niicha jereeicha ichaechajeein neeichenete, satiin caa inara rai aitocoaaunne jaan tereein Cana Coaunera.

³⁴ Jiaonriha eresi inaraacha ichaneni que coacuhin nererojoecaachene. Le janonaa bana naineein, canaacha ichaneni que coaauchaachenete caohachae.

7

Jiaonriha leeochaauru ichao coulurujueeichene (Lc 6.37-38, 41-42)

¹⁻² Coa leeochaauru ichao coaraain coulurujueeichene nihache. Nabana nii leeochaauru colurujueeichene rijijieein, inara coulurujihha Cana Coaunerane coataa. Nii leeochaauru coaraain neeichene rijijieeinte inara netonai coaareein Cana Coaunera.

³ Chanuna aansijiin laaojoiri ichaain baaso ichacuruha leeochaaurune coaraain, acaaaru

que ereein neeiche, inara, acaauru amurijiriin jataain baaso ichaain ichaochichene saijieein.

⁴ Inasiina jataain amurijiriin leinjiin enuha jaberoco que funojoi niha ii notane saijieein, 'Jereeune ii nota que nenaas utoone rocoe,' naain erenaa nainereei inejera rai.

⁵ Cha coitucuha nocoetohine saijieein cha coitucuhi. Jauriaanejeein nii ii nota fuera enuha jaberoco rocohin jaaote, caohatiin coaraain nii inejera nota que nenaas utoone coaraain rocohi.

⁶ Coa remaaecuru rijijieein nenacaaru rai, inara que banijiaain Cana Coaunera tenojoin ti-hache. Nabana inara coineteein inara cunaitau-ruhane coataa. Niheichu coosi rijijieein nenacaaru rai, inara rai nelateein nenaas nii Cana Coauneraacha tei tenaa nainiheeiche, que jaole-quin chaque nelatihei rijijieein coaracuruuhane jaun.

Cha lateein bajaera raite tereein Cana Coaunera

⁷ Cana Coaunera caje cha lateein bajaichenete, inara rai inaraacha latei tereein. Cha lateein ariin bajaera raite, cha teein ne Cana Coaunera.

⁸ Nii rijijieein techu lateein rene cuha cachane, rae Cana Coaunera.

⁹ Coaracuche nachuhinti inara caje lenone baaia inara calaochine, rai ajeri telanaala lenone caohacha teeichene.

¹⁰ Ainihane inara caje ate baaane, rai acano telanaala rai iniho caohacha teeichene. Nii amuritoheriinte, cha lateein caje baaia cachane rai caohacha teein ne Cana Coaunera.

11 Coaracuche nachuhinti inara netonai baasoneein inara suujua coaraain ichaaohichene saijieein, cha bajaain niha inara calaochichurune, cha caohacha teein naaonjoaain neeichene. Nii amuritoheriinte cha caohacha teein nereein inara rai Cana Coaunera, caje cha lateein baaichene.

12 Nitohanihane jaun inara aina caohachaain neeuruha leeochaaurune jeriquichene rijijieein, leeochaauru aina caohachaain neeuche. Nitohaneein ichoai coinate aite nii rauhi aina *profetacuru* inoaensihuru laenanojoi. Aitoha nii rauhine rijijieein ichaooha cachane coina.

*Ichonaac coero aina cacha itajera coero
(Lc 13.24)*

13 Nii jaratoelanaala nenaac coero aina acujuua siricha jeloon enooche. Nii cacha ichao itajeranu que nenaac bacuujuua aina rai coerote, jaraaotohane jaun cuhane cuhin arajiin nitajeeure cachaauru.

14 Jana ichonaac chabana nitajenaachara nejeein nenaac rene cacha turuaera bacuujuua aina rai coerote, aansijin jaratohelanaala. Nii jaunte caaintatoha ecu turuha cachane jaun, coroatajajeeincha turuujue cacha.

*Ninaa caje enuha baaso coitucuhacane
(Lc 6.43-44)*

15 Caohachaain necohalajiin neeuche, nii Cana Coaunera coitucuha nocotiinchuru erenacaauru casajeeuru que. Acaaurute turuurureein nii Cana Coaunera coitucuurerera tocorijianeeichuru inara rene. Nete acaauru suujua cuhane, inara ichao itajeranu baaso uhaain inara rene turuurureein.

¹⁶ Inarate nainequiche coitucunajaaiche acaauru ichao cajene. Coatiha inoeri que inaana nainihei ojoa, niheichu meseri que inaana nainihei acusa. Nii rijijieeinte cacha baaso caje ocoona nainene ichaonaa caohacha.

¹⁷ Nii rijijieein techu satiin temule caohacha, caohacha que inacae. Jana enuha baasote, jerichanejeein baaso que inacae.

¹⁸ Satiin temule caohacha baaso que inaana nainihei. Jerichanejeeinchu caohacha que inaana nainihei enuha baaso.

¹⁹ Satiin enuha baasooru- baaso que inaanacaaurute, inae sauhin moconojoiniha cureein.

²⁰ Nii rijijieein techu acaauru ichao caje cacha caohachaneein, cacha baasoneein, naaonjoaain ichaaoruhane coitucuriquicheein.

Coatiha satiin cachaauru, Cana Coaunera Cojoanonaa que ichaaorurinaain.

(Lc 13.25-27)

²¹ Coatiha satiin canu rai: ‘Canu Curuaanaa,’ naain erenacaauru, Cana Coaunera Cojoanonaa que turuhin ichaonaa nainecururinaain. Canu Inaca Cana Coaunera jerenohin icharate laen, nainereein rai Cojoanonaa que ichaoha ne.

²² Inae nii cojoanonaa que turuhane banate, arajiin cachaauru nesoone caaun: ‘Curuaanaa, Curuaanaa, canacaanune ii coitucuuruhu cachaaurune coina, ii que ereerejetocoaanu, ii curuaa corenihane moconajaera letonocuru sitaain, arajii cojelanaacojoai ichacaanulu,’

23 naauruha canu raine janane: ‘Coatiha inara coitucuhaaun, naain cacaje amuuche baaso ichajeein ichaonacaauru,’ naain acaaaru sitareeunni.

*Canu ere aonaain caintoonjoan icharate, chabana nitajenereein
(Mr 1.22; Lc 6.47-49)*

24 Nitohanihane jaun canu ere aonaain caintoonjoan icharate, leinjiin cacha jataain nainaain niicha ichai coitucuhi nena, enuha suujui caohacha que banesijateein, ucuacaain temuhin neloherithane jana,

25 uha elone jaun tabaacoaa nucuhecuru aina uha cujuana tabaine jana, nii loreri inasine, enuha caohacha suujui que banesijateein ucuacaain temuhin ichaa nii icharane jaun. Nii rijiicha canu ere aonaain caitoonjoa ichara cacha.

26 Jana canu ere aohanra nii caintoonjoa ichaelanaala baaso ichajeein ichaonaate, leinjiin cacha aaso erenaa tonoraai, enuha suujui baaso que banesijateein, araracaaeriin temuhin neloherithane jana,

27 uha elone jaun tabaacoaa nucuhecuru aina uha cujuana tabaine jaun comohin nerataneein nitaje nii loreri. Nii rijiicha canu ere aonaane saijjeein caitoonjoan tonoraain ichaelanaala nena cacha,” naain jetao cachaauru rai ereereje Jesoso.

28 Niritiin acaaaru rai beebejiha Jesosone jana jetaote, jataain cojoelatoore satiin cachaauru,

29 Moisesa aitoonjoan rauhi que acaaaru relaurera amurijiriin, esinae rauhijiriin suujua caje coitucuhin aitohane jaun.

8

*Cosibi caaun cunaitenaa cacha rautaa Jesosone
(Mr 1.40-45; Lc 5.12-16)*

¹ Inae nii cachaauru relaane nainaain, ichatane ucuunno caje fauha uha Jesosone jana jetaote, arajiin sacuure cachaauru.

² Nii jana jetaote, turuha uhe leinjiin cacha cosibi caaun cunaitenaa. Aca jetaote, Jesoso rene turuhin nacatiha neseeonriaain jetao:

“Ii jereeine canu rautaau caa canu cosibi cajera Curuaanaa,” naane jana jetao:

³ “Jerichaaun chujian. Ii caje amuhine caa ii cosibi,” naain biji que dadaa Jesosone rijieeori-tiin, nii rai cosibi caje nerautaain somaraain ne nii cacha. Nitohanai cunai siricha cacha rohan nichuuntaain dadanaa naineniha chunine que airijiin, rohan nichuuntaain dadae Jesoso.

⁴ Nitohaneein rautaain jetaote:

“Aonaau. Jiaonriha chuni rai catohaneein ii rautaain nihanune beeinera. Raujiaaincha nii Moisesa aitoonjoan rijijieein, Cana Coaunera belaiha saseredote rai iicha teeni amaain cunihunte caje inae nerautaaine coaracurumiin cachaaurura. Chaen techu inae nii ii cunai caje nerautaain somaraain leeochaauru rohan turunaa naineeine coaracurureein satiin cachaauru,” nae rai Jesoso.

Romanocuru rai soondarooru curuaanaa letono rautaa Jesosone

(Lc 7.1-10)

⁵ Inae Caferenaaon turuha Jesosone jana jetaote, rene turuhin jetao:

⁶ “Curuaanaa, canu letononeein nenaate cu-naiteein ne canu loreri asae, itolereneein jiurohin

cunaacoaa rai jaberocone jaun,” naain Jesoso rai biha leinjiin Romanocuru rai soondarooru curu-aanaane jaun jetao:

⁷ “Inae rautaa urichaaunni,” naa rai Jesosone jaun jetao:

⁸ “Curuaanaa, coatiha chaque ichei nelatejee-haaun canu loreri asae turuha uhine coina. Rau-jiaaincha nii cunai sitaau canu letono caje, aihute nerautamiin.

⁹ Nitohaneeinne canu letoaain neeuruha canu curuaanaacurune acaauru ere tonoraain neeun. Nii rijijieein techu, neeure canuhacha letoaeni soondarooru. Leinjiin letoaanunete quere tonoraain cue. Jana leeocha cotihacaunnete uhe. Chaelai ichaa canu letonone coina letoaanune techu ichae quere tonoraain,” naa Jesoso rai Romanocuru rai soondarooru curuaanaane jana,

¹⁰ cojoelatiin jetaote: “Esinae rauhijiriin coatiha nihei chuni Isaraeli cocoaicha, caa cacha rijijieein jataain quesenetaera coarahaau chabana.

¹¹ Esinae rauhijiriinte enoto mitu nichajai, enoto so nichajai, naaonjoainuri cajeeuru arajiin uhin, Abaraau, Isaca, Jacobo, naaonjoainuri aina raotojoeein turuhin lenonecurureein, inae Cana Coaunera cojoanona que turuhane bana.

¹² Jana Isaraelitaaru tabaaurute, rai cachanu que ranajaain nihalu Cana Coaunerane saijeeein, inae Cana Coaunera cojoanona que turuhane bana, nocohenaanau jaoleneein chanaa curureein nesoone caaun,” nae jetao aina cunacaauru cachaauru rai Jesoso.

¹³ Niritohane baiha jetaote:

“Chajaain chenenajaun caunihute, nii eseneetaain jereeine rijijieein nerautamiin ii letono,” nae Jesoso. Nii rijieeoritiin jetaote, inae nerautae nii soondarooru curuaanaa letono cunaitenaa.

Fedoro tano rautaa Jesosone

(*Mr 1.29-31; Lc 4.38-39*)

¹⁴ Nii baiha jetaote, Fedoro loreri asae turuha cuha Jesosone jana jetao, ecu sininaja ichoae ajaa caaun cunaiteein niha Fedoro tanone jana eruu-ruha cue.

¹⁵ Inae ecu turuhin nii cunaitenaa biji mucuha Jesosone rijieeoritiin jetao, inae caje amuha nii ajaane jaun, nerautaain nimichuhin acaauru rai lenone chalue.

Arajii cunaitenacaauru rautaa Jesosone

(*Mr 1.32-34; Lc 4.40-41*)

¹⁶ Inae nocohejihane jana, arajiin suujua cuhane coitucuchuhichuru siriin caaun cunaitenacaauru uhaain turuuruha cachaaurune jana jetao, nereecha que nii cacha suujua cuhane nenacaauru coitucuchuhichuru sitaain, satiin cunaitenacaaurune maajeein rautaacoae Jesoso.

¹⁷ Nitohaneeinte ichae Jesoso,

“Acate turureein

cana caje cana osa aina

cana cunainunru itajihane coina,”

naain besihalu Cana Coaunera ere bera inoaensi Isaihasine nainaane coina.

Jesoso aina cunaa jereraauru

(*Lc 9.57-62*)

¹⁸ Nii jana arajiin curuhacaain neeuruha cachaaurune coaraane jaun jetaote, nemuri

jerau amaauruha aina nerelanacaaurune coina acaauru rai aite Jesoso.

¹⁹ Nii jana jetaote, rohan nichuuntaain jetao: “Curuaanaa, ii ainane unaa jereeun, chunijiun cuhine jaaun niha natiin,” naa Jesoso rai Moisesa aitoonjoan que catcha relaerane jana jetaote:

²⁰ “Arolarihurute sininajaanu siriin naaonjoaaunre. Jerichanejeein techu sininajaanu siriin naaonjoaaunre tajaaecuru. Nena laen canu Cana Coaunera Calaohi catcha caje nejanoanaa nichaaunne, nene canu rai chunijiun nesurucuaunne jaanura,” nae jetao rai Jesoso.

²¹ Nii jana jetaote, aina nerelanaa netonai jetao: “Curuaanaa, inae oha canu inacane janane conautichaane baiha ii aina ureeuni,” naa raine jaun jetao:

²² “Nirimiin. Canu sacuhachaaute ecu nejesinajeein Cana Coaunera coitucuhi nesinanejeein ichaaoruhine ooruhane reentiaain,” nae jetao rai Jesoso.

*Cujuana aina fichafichanaa suruaa Jesosone
(Mr 4.35-41; Lc 8.22-25)*

²³ Niritiin jetaote, aina nerelanacaauru aina jiniiquiin bote cuhane fauhin jelai caje amue Jesuso.

²⁴ Nii jana inae bote cuhane cuujueuruuhane jana, uha cujuana tabai aina fichafichanaane jaun jetaote, enohe bote cuhane acau. Nii jana jetaote, tonajelanaala bote cuhane sinii siniicha Jesosone jana

²⁵ nocoaain jetao:

“Curuaanaa, inae nalunaa jerichaache. Cha-jaain caa acau caje cana ichoteratee,” naauruha aina nerelanacaaurune jana jetaote:

²⁶ “Chanuna jataain nesooneeiche. Jataainachura ansijieeinijin cha esenetae-neeichete,” naain nimichuhin cujuana aina fichafichanaa suruaa Jesosone jaun jetao, inae nenihā fichafichanaane jaun raotojoein cuujueeure.

²⁷ Nii jana cojoelatiin jetaote:

“Chatohanaineinna ne caa cacha, cujuana aina cucuana cuhane niha natiin nere tonoraain nesuruhane coin,” naaure jetao ecu nejesina-jeein aina nerelanacaauru.

Cadara batane que coroatajai suujua cuhane coitucuchuhi sirichaauru rautaa Jesosone

(Mr 5.1-20; Lc 8.26-39)

²⁸ Inae nemuri jerau aina nerelanacaauru aina jiniiquiin Cadara batane que turuha Jesosone jana jetaote, atanebana jelai caje cuhin jetao, coinete-cure coroatajai cachaauru, suujua cuhane coitucuchuhi sirichaauru. Acaauru jetaote, enaacha cacha cunaitaane jaun, nene chuni nii neeu-runaja bero cuhane amui.

²⁹ Acaauru jetaote:

“Coa canacaanu rene turuhin canacaanu rerohecaa Cana Coaunera Calaohi Jesoso. Nechu jataain canacaanu rerohecaain, canacaanu cairichaaine coinate, jaiti cojoanonaa que turuenihane jana turuhicha,” naaure jetao ehequiin.

³⁰ Nii jana ecu rohan arajii lenoniha neeuруha coosichurune jaun jetaote:

31 “Caa cachaauru suujua caje canacaanu sitanaa jereeine, nii coosichuru suujua cuhane canacaanu letoaura,” naauruha Jesoso rai, nii cachaauru suujua cuhane nenacaauru coitucuchuhichurune jaun jetaote:

32 “Taa coosichuru suujua cuhane cu-nichuchera,” naain jetao nii coitucuchuhichuru letoae Jesoso. Nii jaun jetaote, nii cachaauru suujua caje mituhin, coosichuru suujuaniha enooruha nii coitucuchuhichurune rijeeoritiin jetao, satiin ramarau nemarotihacoaain nereeonohin ohacoaaure nii coosichuru.

33 Nitohanihane coaraain jetaote, jelai caje sorohin jetao, neseu turuhin nii coosichuru suujua niha enooruha coitucuchuhichurune jana, ooruha coosichurune beeure nii coosichuru beraihurera cachaauru.

34 Nii jaun jetaote, satiin nii nese caje cuhin, nii niha Jesosone jaan rene turuhin coaraain jetao, rai aitocure chajaain jelai caje amuhane coinia.

9

Jiurona cacha rautaa Jesosone

(*Mr 2.1-12; Lc 5.17-26*)

1 Nii baiha jetaote, aina nerelanacaauru aina jiniiquiin bote cuhane fauhin cuhin nemuri jerau ichaothalune jaaun Caferenaaon turuha cue Jesoso.

2 Inae ecu turuuruuhane jana jetaote, nela cuhane leinjiin jiurona cacha turuaa cuuruha Jesoso rene cachaaurune jana, jataain rautaane esenetaain aihuруha nii cachaaurune coaraane jaun, nii cunaitenaan rai jetao:

"Nelararajiaaura cacalabi. Inae ii osa caje ichoteratenohi neeicha," nae jetao rai Jesoso.

³ Nii aonaain jetaote:

"Chanuna caritiin Cana Coaunera baijiaraanu rijitiin ere caa cacha," naain jetao suujua cuhane coarajeeure Moisesa aitoonjoan que cacha relaureraauru tabaauru.

⁴ Nejetaote niritiin baasoneein suujua cuhane coaaucuruuhane coitucuhane jaun jetao:

"Chanuna baasoneein itolere bana inara suujua coaraquiche.

⁵ Chaa quena caaintare: 'Inae ii osa caje ichoteratenohineein,' naenihacane: 'Chajaain nimichuhin chela seriin amuun,' naacane.

⁶ Coarajeeuche nachuhintine, canu Cana Coaunera Calaohi- cacha caje nejanoanaa nichaaunne cocoainaain letohanojoinichaun osa caje cacha ichoteratichaunne coina, caa chauratane quene coaarate inara que," naa acaaaru raine baiha jetaote, nii jiurona cacha rai jetao:

"Chajaain nimichuhin chela seriin chenena-jaun cauinura," nae nii jiurona rai Jesoso.

⁷ Nii rijieeritiin nimichuhin jetao, rai nenajaun cauga cue nii jiurona cacha.

⁸ Nii coaraain jetaote, rai suujua rauhi inaaoritelanaala que casiin Cana Coaunera coroaaecure. Nitohanai ichana nainiha cachane jaanu teein niha Cana Coaunerane coaraain.

*Mateeo cotihaca Jesosone
(Mr 2.13-17; Lc 5.27-32)*

⁹ Nii jiurona cunaitenaa rautaane jaan jelai caje uhin canu- Mateeo nichaaunne, Roma curuaanaa

rai *impoestonu* que cachaauru cobaraain coriqui bajaanune jaan rori ichoae lauhecohanune jana canu coaraainte:

“Chajaau canu aina,” naain canu cotihaca Jesosone jaun, nii rijieeritiin nimichuhin Jesoso aina cuun.

¹⁰ Nitohaneein cuhine canu loreri asae turuhin, satiin aina nerelanacaauru aina curuaecaain Jesoso coroaateeun. Nii janate ecu canacaanu rene turuhin nelauriaain lenonecure jataain arajiin Roma curuaanaa rai *impoestonu* que coriqui baaaureraauru canu leeochaauru, chaen leeochaauru cachaauru- nechu aansaineein ichaonacaauru, osaaonacaauru, naaonjoainuri.

¹¹ Nii coaraainte Jesoso aina nerelanacaauru rai:

“Chanuna caa *impoestonu* que coriqui baaaureraauru aina, caa osaaonacaauru aina lenone caa inara relaera,” naauruha fariseeocurune

¹² aonaainte:

“Coatiha coichaera latecuruhi raurohin nenacaauru. Leinjiin cunaitenacaauruhachate coichaera latecure. Nii rijijieein canu latecuruhi caohachaain ichaoha nocoetonacaauru.

¹³ Chajaain nii Quiricha Inoaensi cuhane: ‘Coatiha chaelai sohin mocohin que canu belaaichene jerinaaun. Raujiaaincha jiniiquiin cairichaojoaain ita coaraain ita belaain neeichenena jereeun,’ naain laenanohi nihane jaan que nerelanhuche. Aihane jaun, coatiha nii caohachaain ichaoha nocoetonacaauru cotihaca uhaaun, osaaocuruhane coitucuhin nichao coreein caohachaain ichaonaa jereraaurune cotihaca uun,” nae fariseeocuru rai Jesoso.

Suri couu neein cosinacaain Cana Coaunera baa jaauruuhane

(*Mr 2.18-22; Lc 5.33-39*)

¹⁴ Nii janate Jesoso rohan nichuuntaain:

“Chanuna fariseeocuru aina canacaanuhacha canacaanu suri couu netiin cosinacaain Cana Coaunera baaacaanune jana, ii aina nerelanacaauru aihurene,” naauruha Joaan Baotisita aina amuhemuhenacaaurune janajetaote:

¹⁵ “Chasiina suri couu netiin cosinacaain inaderaaurure ene ranaa jerera beseta que cotihanohichuru, jaiti acaaaru aina niha nii ene ranaa jerera cacha natiin. Nete inae nii jianacoon teein cacha ranaa jerera nichaaunne mucuhin amaauruhane banate laen, suri couu cosinacaain niha cuurureein- nii beseta que cotihanohichuru.

¹⁶ Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri enachasine asaaere nii cajione siri. Chaen caohachaaain nedanaa nainerihei nii obiri enachasine, nii cajione siri que couneraane.

¹⁷ Nii rijijieinchu nihei chuni inae conaca que tiha coaaeraine jana, cuhane ichonai tera. Nitohaneein cuhane teraa ichonainete naasaaere nii coaaerai. Nitohanihane jaunte, caohachae coaaerai nejesinaneein niha coaaeraine. Chaen ichonai, ichonai nejesinajeein nihane caohachae,” nae acaaaru rai Jesoso.

Jesoso cajione dadaera ene aina Jairo cacunu

(*Mr 5.21-43; Lc 8.40-56*)

¹⁸ Niritiin acaaaru rai ereereeca Jesosone janate, rene turuhin nacatiha neseeonriaain:

“Jataain enate nijioaen canu cacunu. Nete canu jiniichaain uhin dadaaine nacoaauneein ichanareein,” naain Jesoso cotihaca leinjiin Jorioocuru curuaanaane jaun,

¹⁹ nii rijieeritiin nimichuhin aina nerelanacaauru que corihaneraain caajie cue Jesoso.

²⁰ Nii janate lechoonca coroata jaanacaain, rai jaberoco caje ichana jaohajeein niha leinjiin enene jaun, Jesoso rohan nichuuntaain caajie cutiin cajione auha mucuuri:

²¹ “Caa rai cajione auha mucuhanuneecha caaunne nerautareeunni,” naain esenetaane jaun.

²² Nete rai cajione auha mucuhane jana nauriteriin nii ene coaariin:

“Nelararajiaaura ene, jataain nerautaaine esenetaain aaine jaunte inae nerautaaicha,” naa rai Jesosone rijieeritiin, inae nerautae nii ene ichana jaohane caje.

²³ Nii ene rautaane caje cuhin, nii Jorioocuru curuaanaa loreri assaae turuha Jesosone janate, inae atane rucuhecuruhane rai neein cojioriinchuru coinaderraauruha cachaaurune jana turuhin:

²⁴ “Satiin caalai caje mituuche. Coatiha ohane jaun aihei caa ranuna, sinihane jaunte aicha,” naa acaaauru rai Jesosone jana coenacure ecu neein coarajeeurera cachaauru.

²⁵ Nete coenacuruhane saijieein, jitariin nii loreri caje mitanajaane baiha, nii ranuna rene enohin biji que mucuhin michuha Jesosone jana nimichue nii ene.

26 Nii coaraainte ita rai beeuruha cachaaurune jaun, satiin jelai batane sacuritaain coitucunojoi ne nii o caje ranuna ichatiha Jesosone.

Coroatajai maosa rautaa Jesosone

27 Nii ranuna ichatihane baiha caje amuha Jesosone janate caajie cuhin:

“Jataain cairichaaajoaain canacaanu coaraaura Rabiri nefoerate,” naain eheehequiin sacuure coroatajai maosacuru.

28 Nii janate inae loreri asaae turuhin, ecu enoha Jesosone jana rohan nichuuntaaruha nii coroatajai maosacurune jaunte:

“Caa maosa neeichene caje inara nota teein nihanune esenetaaichena,” naain acaauru caje bajaa Jesosone janate:

“Aihacaanura Curuaanaa,” naauruhane jaun,

29 biji que acaauru nota dadaain:

“Nii esenetaaichene rijijieein conohine inara notara,” naa acaauru rai Jesosone rijieoritiin,

30 inae conoe acaauru nota. Nii jaunte:

“Coa leeochaauru rai caa inara nota teein nihanune bihache,” naain acaauru suujuatiha Jesosone saijieein,

31 jelai caje amuuru rijieoritiin beeuruuhane jaun, inae satiin jelai batane sacutaain acaauru nota teein niha Jesosone coitucuure.

Erenaachara cacha rautaa Jesosone

32 Inae jelai caje amuuruha nii coroatajai maosacuru niicha rautaurine janate, erenaachara cacha, coitucuchuhi que suujuequiin nenaar turuaa uure Jesoso rene.

33 Nii janate nii coitucuchuhi sitaa Jesosone rijiieoritiin, inae irihane nunuhete nii erenaachara cacha. Nii coaraainte:

“Coatiha chabana catohanai coarahaacache Israaeli lauri nichaachene janata,” naaure cojoe-latin cachaauru.

34 Nete:

“Jeelai coitucuchuhichuru curuaanaate, caa catohaneein coitucuchuhichuru sitaain niha caa cachane jaanu teein nera,” naaure ecu neein coarajeein fariseeocuru.

Cairichaaajoaain cachaaru coaraa Jesosone

35 Nitohaneeinte neseeuru cuhecujuueein nenaanajaaru naineein amuhemujueein, netaojiaain Cana Coaunera rai rauhi que ereereecuruhane jaan coloheri sinacocacuru naineein cuhecujuueein, Cana Coaunera Cojoanonaa erenaa raotono que cachaaru relaain, itolere cunai caaun cunaitenacaaurune maajeein rautae Jesoso.

36 Nii jana cachaaru coaraa Jesosone janate, nii chaque nelatihei rijijieein beraicha colane nena carenero rijijieein amuhemuhecuruhane jaun cairichaaajoaain acaaaru coarae.

37 Nii jaunte:

“Jataainte esinae arajiin neeure cachaaru, Cana Coaunera coitucunaa jereraaru. Nete nene acaaaru relaeranura.

38 Aihane jaun Cana Coaunera bajaauchete neeine acaaaru raain acaaaru relaeranu,” nae aina nerelanacaaru rai Jesoso.

10

Aina nerelanaa nichaanune caje, lechoonca coroatajai nichaanune janijiin cocoaina Jesoso afosotoneeine

(Mr 3.13-19; Lc 6.12-16)

¹ Nii jaunte lechoonca coroatajai aina nerelanaa nichaanune cotijiaain janijiin, canacaanu cocoainaain canacaanu letoae Jesoso, cachaauru suujua cuhane nenacaauru coitucuchuhichuru sitaain, itolere cunai caaun cunaitenacaaurune maajeein rautaacaanune coina.

² Nii lechoonca coroatajai afosotoorunu que niicha cocoainai nichaanunete, jauriaanejeein Simoon Fedoroneein acaauruuhacha curuaatei, rai nejera Aanderesi, Saantiaao aina rai nejera Joaan Sebedeo calaochineein nenacaauru,

³ Ferifi, Bartolomee, Tomasi, chaen canu Mateeo nichaaunne Roma curuaanaa rai *impoestonu* que cachaauru cobaraain coriqui bajaera nichaaunlune, Arafeeo calaohi Saantiaao, Tadeeo,

⁴ chaen jauriaanejeein Romanocuru que nejeratenacaauru aina nenaalu Simoon Seloteneein niicha curuaateeuri, chaen nii baiha Jesoso coulurujueranu Jodasi Isacariote, naaonjoainichaanu.

Cana Coaunera Cojoanonaa que cachaauru relaauruhane coina aina nerelanacaauru letoaa Jesusone

(Mr 6.7-13; Lc 9.1-6)

⁵ Nitohaneein nii lechoonca coroatajai aina nerelanaa nichaanune letoainte canacaanu sujuuate: “Coa nii Cana Coaunera coitucuelanaala ichaonacaauru atane que cuhache. Niheichu

Samaria cocoaichacuru rene niha natiin coa turuuhache.

⁶ Ucuuae cuelanaala, Cana Coaunera cachaneein nitajerai nenacaauru Isaraeli cocoaichacuru rene cunichuche.

⁷ Chajaain ucuaae cuhin, inae nichuutaa Cana Coaunera Cojoanonaane benichuche acaaaru rai.

⁸ Chaen cunaitenacaauru rautaain, onacaauru nihanatiin ichateein, cosibi caaun cunaitenacaaurune maajeein rautaain, cacha suujua cuhane nenacaauru coitucuchuhichurune maajeein sitaauche. Inarate core colane nitohanai ichana nainequichene jaanu raain neeiche. Aihana jaun nitohanai ichaain neeichene, coa core bajaache.

⁹⁻¹⁰ Coa inara coriqui, inara atora, inara cajione necoreeteeichene jaanu, inara safato, inara biji achune, naaonjoainuri amaaín cuhache. Niha rauhi, amihanenacaauru coroaateeuruha cachaaurune coiná.

¹¹ Leinjiin neseu, nenaanajaun, naaonjoainu turuhichene, chunocoha caohachaain inara raera cacha ariin, rai loreri asaae neeuche jelai caje amuhichene reentiaain.

¹² Inae nii loreri asaae turuhichene neein, loreri asaae nenacaauru rai ereein turuuche.

¹³ Nii jana raoti ichaonaa que ichaonaa jerecuruhanete, raotojoeein inara raaurureein nii loreri asaae nenacaauru cachaauru.

¹⁴ Jana caohachaain inara raelanaala inara aohana jerecurenihane, nii loreri caje, chaen nii nese caje, naaonjoaain caje inara amuneein inara tijia que nenaá utoone rihariaain ratiriin amuuiche.

15 Esinae rauhijiriin acaaaurute cana janonaa besaute que inae tihane bana, Sodoma, Comora, naaonjoainuri batane que ichaonacaauru amuri-jiriin caseteco coaracurureein.

Mucunojoinecuruhane coina arichacuruhane

16 Aonacuche, canune inara letoaaujanolari mululune jana situha cuha irine rijijieein cuhichene coina. Aihana jaun cacha cunaitaane coina nainaa acanone rijijieein cunichuche. Chatohanneein teraane nihanatiin nerinanaa naineniha serorine rijijieein.

17 Aihane jaun caohachaain nainaain necohalajiin cunichuche. Cocoainanacaihuru rai inara teeruhane janate, sinacoca asaae inara amaain inara bisiin,

18 soberenadorocuru rene inara amaain, reychuru raine maajeein inara amaaaurureein canu coreniha. Nii janate canuneein nihanune coitucuerateriquicheein acaaaru que, chaen nii Cana Coaunera coitucuelanaala nenacaauru quene maajeein.

19 Inae cocoainanacaihuri bijiu inara teeruhane, coa acaaaru tonoraain ereeichene jaanu que tonajianche. Inae ereeichene coina neeichene janate, Cana Coaunera Suujue, inara rai ereeichene jaanu tereein.

20 Aihane jaun coatiha inara ecu ererihee-icheein. Cana Inaca Cana Coaunera Suujuete inara coreniha ecu erereein.

21 Nitohanerichaaine jaunte, rai nejeraauruhacha, nejeraauru tereein ateinanohineeu-ruhane coina. Nii jana rai inacaauruhachate, rai calaochichuru tereein cocoainanacai rai. Nii

jana acaauru calaochichuruhachate, inacaauru que nejerateein inacaauru teeurureein ateinanohineeuruuhane coina.

²² Satiin cachaauru caa chauratane sacuritaain canu coitucuelanaala nenacaaurute, canu coreniha inara que nererojoecaa cuurureein. Nete nii esenetaane jianelanaala, atiin satono que tiaain jerichanejeein sacuera nichotereein.

²³ Leinjiin neseu turuhichene jana, inara rerohecaain inara mucunaa jerecuruhane, leeocha neseu cuhin sorooche. Esinaene aitoon. Jaiti Israeli nefoerateeuru sacuritaain turuheneeichene janane, canu inara ichohaichaniha ecu turureeunni canu acahaniji Cacha Calaochineein nejanoanaa nichaaunne.

²⁴ Niheichu rai relaera amurijiriin nenaanainihei aina nerelanaaa. Niheichu rai fatoroon amurijiriin nenaanainihei rai cachaneein nenaan.

²⁵ Relanojoineein nenacaauru, acaauru relaera rijijieein neeuruhine. Jana letononeein nenacaauru acaauru curuaanaa rijijieein neeuruhine. Canu inara Curuaanaa neein inara relaera nihanune que moconajaera Beelseboo niha canu beeuruha natiin, tonacururiha jana inara que.

*Coasinacaineein niha ohacachene baiha cana
itajeraneein nenaane*

(Lc 12.2-7)

²⁶ Aihane jaun, coa cachaauru coasichache. Coitucueraelanaala, asinojoineein chaachaain niha chunine niha natiinte, coitucunojoiniha cureein.

27 Jana caa coitucueraelanaala nena nii chuni aonaenihane jana, caa caitoonjoan coitucuera-teeuche satiin cachaauru urichoo netiin.

28 Coa inara atinana naineraauru que casi-hache, inara atinaauruhane baiha chabana sato-noelanaala neeni janonaa que neeni, inara suujue itajenaa nainecurenihane jaun. Nete laen nainequiche chabana satonoelanaala nena usi jana inara jaberoco aina inara suujue itajeranu neein nena- Cana Coaunera que casiin neeiche.

29 Tana nii chaque nelitejeeecane que airijiin leinjiin moneda que coriha coroatajai tajaelinaane coitucuhichene. Nete jereniha cana Inaca Cana Coaunerane nii leinjiinjin nitajenaa nainecurene.

30 Nii amurijiriin inarate, inara couturijine maajeein leinjiana leinjianaain janiinojoineein ne.

31 Aihane jaun coa casiin ichaochache. Inarate jataain tajaelinaacuru amurijiriin neliteein neeiche.

*Cachaauru que Jesocurisito coitucuerateeurera
(Lc 12.8-9)*

32 Chunocoha cachaauru que canuneein nihanune coitucueraneein, canu cachaneein nihane coitucueratera ne, acaentonai coitucuerateree-unni dedeeu nena Ofa Cana Coaunera acatiha neein.

33 Nena laen canuneein nihanune coitucueraneein canu cachaneein nihane saijieein, canu coitucuerate lanaala nena que acaentonai coitucuerereunni Ofa Cana Coaunera acatiha neein.

*Ita caje cacha lerueraneein niha Jesosone
(Lc 12.51-53; 14.26-27)*

³⁴ Coatiha raoti ichaonaanaja turuaa uhaaunlu caa chauratane que, ita que nererojoecaain ichaoha cachane jaane turuaa unlu.

³⁵ Nitohanihane jaunte, rai inaca que nejeratiha rai calaochine jana rai neba que nejeratereein rai cacunu. Jana rai nebaene quete nejeratereein rai nacana.

³⁶ Nitohaneeinte nechu naraaicha que nejerateneaneein neeurureein cachaauru.

³⁷ Rai inaca, neba, calaohi, cacunu, naaon-joinuri belaihane amurijiriin cacoelainihane, nii chuni canu cachaneein nenaan nainihei.

³⁸ Itolere necairichanaa abaantaain coroso que nerichaaunnine rijijieein necairichanaa abaantaenihane, canu cachaneein nenaan nainihei.

³⁹ Nete laen canu, rai nichao ichoteratena nainichaunne coitucuhin canuhacha cohajeein nenaan, nichao ichoteratereein canu coreniha. Jana canu esenetaelanaala, canu colane nichao ichoteratena jererate rai nichao itajereein.

*Cainanohinerichaain namute cacha rai cha tera
(Mr 9.41)*

⁴⁰ Chunocoha inara raerate canu raa aicheein. Jana caohachaain canu raerate canu letoaera raa aicheein.

⁴¹ Cana Coaunera letononiha leinjiin *profetane* coreniha caohachaain raain nenaate, *profeta* rai cainanohiniha rai namihaneeone rijijieein nii raane coreniha rai cainanohiniha cureein. Chunocoha leinjiin cacha caohachaain nenaan raain neite, jerichanejeein nii cacha caohachaain

nenaarai cainanohinihane rijiieein, nii raane coreniha rai cainanohinihane cureein.

⁴² Chunocoha caa ena canu sacunaa nunuhetejeeureraauri rai, nechu jataain canu sacueranihane coreniha le eraurujeuin conacai teein nei raite, esinae rauhijiriin cainanohinihane cureein,” nae aina nerelanaanichaanune rai Jesoso.

11

Jesoso rene turuuruha Joaan Baotisita letonocurune
(Lc 7.18-35)

¹ Nii lechoonca coroatajai aina nerelanaa nichaanune relaane baihane, jelai batane que nenacaauru neseeuru naineein cuhacaanu, Cana Coaunera beratenojoin erenaa beebejeein cachaaauru relaa amuhemuheca Jesosone coina.

² Nii janate caresero cuhane netiin benaa caje itolere ichaa Curisitone coitucuhin aina amuhenacaauru lettoae Joaan:

³ “Iina esinae rauhijiriin, nii turuha uheneni Curisito niha. Aca neneeine beeune turuha leeochane cohacaanu,” naain rene turuhin baaauruhane coina. Nii jaunte lettoanajaane rijitojoeein aitocuruha rene turuhinne jaun:

⁴ “Chajaain caa inaraacha coarai, inaraacha aonai benichuche Joaan raicha.

⁵ ‘Inae maosa neeruhane caje conoa maosacuru notara. Bacosacuru niha natiinte, inae nichaauraain amuurera. Cosibi caaun cunaitenacaauru niha natiinte, inae somaraain neeure cosibi cajera. Urichosaaecuru niha natiinte, inae enene erenaa aonacurera. Onacaauru niha natiinte, inae o caje

ichanacurera. Jana cairichainejeein nenacaauru raite, Cana Coaunera beratenojoin erenaa beebejeein, nosa caje nichoteeururichaaine beebeje.

⁶ Nerausiaaejeeinte neeure rai suujua core-lanaala acanihane esenetaain acaacha cohajeein nenacaauru,’ naain benichuche Joaan raicha,” naain Joaan letonocuru letoae Jesoso.

⁷ Inae jelaiha cauha cuuruha Joaan letonocurune janate:

“Chatohanai coaraa cuhichelu cacha areroo cuhin. Leinjiin jiarana nujua cujuana ichanohineein nerurujuanaana coaraa cuhichelu.

⁸ Ainihane leinjiin cacha, cajione caohacha que necoreeteein neina coaraa cuhichelu. Inarate raotojoeein coitucuhiche, cajione caohacha que necoreeteein nenacaauru, *reychuru loreri asaae neeuruhane*.

⁹ Chatohanai coaraa cuhichelu. Leinjiin Cana Coaunera ere bera *profetana* coaraa cuhichelu. Aiha laesinaae, nii choae tacaain jataain leinjiin *profeta* amurijiriin nenaate esinae rauhijiriin coaraa cuhichelu. Acate Joaan ne.

¹⁰ Nii Joaan quete:

‘Canune ii ajiniha
cachaaaru rai ereerecane coina
canu ere bera letoareeunni
turuhine jaanu rucuheranu que,’
naain ne laenanohinneein Cana Coaunera Quiricha cuhane.

¹¹ Esinae rauhijiriine aitoon, satiin cachaaaru caje nihei chuni cacha Joaan amurijirii jataain neliteein nei, Moisesa que Cana Coauneraacha teratenojoi Cojoanonaa bana. Nete laen, ena tu-

runaa Cana Coaunera Cojoanonaa, Joaan fautaain nelatihei rijijieein nena, jataain nii Joaan amuri-jiriin neliteineein ne.

¹² Turuhalu Joaanne caje coauneeinte, enane-tojoeein ena turunaa Cana Coaunera Cojoanonaa turuaera nichaaunne que nejerateein itajenaa coaaucure Cana Coaunera coitucuhichuru curu-aanaacuru.

¹³ Satiin *profetacuru* aina Cana Coaunera aitoonjoaaunru rauhite, nii turuha uheni Cana Coaunera Cojoanonaa coitucuerateein neeurelu, turuha Joaanne que tiaaojoaain.

¹⁴ Inarate esinae rauhijiriin nacoaauneein turuha urichaain Irihasine que aitocuruhalune coitucuhiche. Acate nii Joaan neein turuhelu.

¹⁵ Caa aitocooaunne aonacurumiin urichonacaauru.

¹⁶⁻¹⁷ Caa cachaauru, enene cojoanonaa que ne-nacaauru ichao bihanune jaannu coitucuhaaun. Aihuruha canaanaihuru nenaanaja cataaun no-coatijaan, rai corihacuru rai eheehequiin:

‘Raansaichene coina auno totihacaanu. Nete canacaanu auno rautaelanaala raansanaa jere-neeiche. Inara cotijiaain, berane jaain inaderaa-caanune jana, canacaanu aina inaderahheeiche,’ naauruhane rijiichuruha.

¹⁸ Nii rijijieein techu, turuha Joaan joaen-reen lenone que lenonetanaala, bino conaa inae-lanaala, naaonjoaaaine jana, moconajaera suujue siriha beeiche.

¹⁹ Nii baiha turuhanu canu, cacha calaohineein nejanoanaanichaunne jana, bino cohin, joaen-reein lenone que lenoneein, naaonjoaineeinne jana, ‘Achotoritiin, ajetoriaaneein, baasoneein

ichaonacaauru osaaonacaauru belaichaneein, Roma curuaanaa rai *impoestonu* que cachaauru cobaraain coriqui baaaurera belaicha niha' canu beeiche. Nete jataain itolere que nainaain, chaachaain niha Cana Coaunerane caje coaraain, coitucunojoi ne niicha ichai," nae Jesoso cachaauru rai.

*Caseteco coaracururichaain erenaa tonoraaruhi cachaaurune
(Lc 10.13-15)*

²⁰ Cojoelanaacojoai ichaalu Jesosone saijieein nichao coreein nacoauneein Cana Coaunera coitucuureniha nii nese que ichaonacaauru cachaaurune jaunte:

²¹ "Jataainte cairichaaajoaiche nohane, Corasiin cocoaichacuru. Cairichaaajoaiche nohane Betesaaida cocoaichacuru. Inara que cojoelanaacojoai ichaain coaratihanulune tocohaneein, Tiro, Sidoon, naaonjoain cocoaichacuru rai cojoelanaacojoai ichaain coaratihanulune jana nihanete, inae inoaenlu nejeein inae nichao coreein, nacoauneein Cana Coaunera coitucueraneein neeruhane coarateeurure niicha jerenohin ichaain.

²² Nete inae coitucuhichuru coulurujueein casetecaeratihane jaan Cojoanona que turuhane bana, Tiro, Sidoon, naaojoainunri cocoaichacuru amurijiriin caseteco coaraa curiquicheein inara.

²³ Jana inara, Caferenaon cocoaicha neechene, inacojoeein caohachaain niha nocoetiin raotiin nena coaauquiche. Nete ohichene bana nocohena tabai jana nitajiha curiquicheein. Nii inara que cojoelanaacojoai

coaaratihanulune tocohaneein, Sodoma cocoaichacuru que coaaratihanune jana nihanete, enanetojoeein neeurure jelai cocoaichacuru.

²⁴ Nete inae coitucuhichuru coulurujueein casetecaane coina turuha Cana Coaunera Cojoanonaa que turuhane bana, Sodoma batane cocoaichacuru amurijiriin caseteco coaraa curiquicheein inara,” nae cachaauru rai Jesoso.

Canu esenetaerate raotojoeein ichaoreein.

(Lc 10.21-22)

²⁵ Niritothane baihate: “Itolere chauratane, dede, naaonjoaain Coauneraneein neeine coroaaejihanu jataaincha, Ofa, itolere coitucutoha nocoetonacaauru que iicha asii coitucuerateeii cairichainejeein nenacaauru quene jaunra.

²⁶ Aihara Ofa, nitohaneein jereeine jaunte ichaaicha,” naane baihate:

²⁷ “Canu Inaca Ofate satiin raineein nenaat teein ne carai. Nihei chuni Cana Coaunera Calaohi cachaneein nejanoanaa nichaaunne coitucuera. Leinjiin Ofa Cana Coauneraachate cacoitucue. Niheichu chuni, Ofa Cana Coaunera coitucuera. Canu- Calaohineeichane coitucuun. Canu- Calaohi nichaaune coitucueratenaajerichaaunne jaunru que, coitucueratihanune banaachate, Canu Inaca Ofa Cana Coaunera coitucuurureein cachaauru.

²⁸ Nii inara baasoneein ichaonacaauru, inara nererojoecaeriin ichaonacaauru, inara osaonacaauru, naaonjoaineelchene canu esenetaain canu sacuuchena raotojoeein ichaonaanaja te inara rai.

29 Caa inara rai caitoonjoa esenetaain, Canu que nerelaain aihanune rijijieein ichaaoche. Coatiha chabana inara aina baasoneein nerinaaunni. Nii bana coatiha nitajerinaain inara suujue.

30 Coatiha caaintaai, caa inara rai caitoonjoa tonoraa cachane,” nae.

12

Nebetacanaa cojoanonaa bana tirico inaa molooruha Jesoso aina nerelanacaaurune

(*Mr 2.23-28; Lc 6.1-5*)

1 Nii amuhemuhecaunne jaun, nebetacanaa cojoanonaa bana tirico coocana jana situha cuhacaanu Jesoso aina jiniiquiin aina nerelanaa nichaanune. Nii janane mijiitohacaanune jaun, situnacanejeein nii tirico moloonejeein rai nucuhe quihacaanu.

2 Nii coaraainte:

“Nii ii aina nerelanacaauru coaraau. Cocoaaeraa nebetacanaa cojoanonaa bana nitohanai ichara natiente, inae tirico taihure,” naaruha Jesoso rai fariseeocurune jaunte:

3-4 “Tana lesajei que mijiitoruhane jaun, corihacuru aina jiniiquiin Cana Coaunera loreri Teenforo asaae enohin, Cana Coaunera que banijiaain nena faan, saseredotecuruhacha nii faan quinaa nainihane saijieein, corihacuru aina faan quiha curuaanaa Rabirine jaan reretaain coitucuhichene.

5 Tana Moisesa aitoonjoa cuhane nebetacanaa cojoanonaa bana carenero narejeen sohin Teenforo asaae mocooruha saseredotecurune niha natien, osa que nesaruhin naaonjoaurenihane jaan reretaain coitucuhichene.

6 Aihane jaun Teenforo amurijiriin jataain nela-teein cau nihanune coitucuhin neeuche.

7 Coatiha: ‘Naaonjoain quete aite caa Quiricha cuhane,’ naain coitucuheiche. Nii Cana Coaunera Quiricha cuhane: ‘Nii inihocuru mocohichene jianeein inara amute cachablaain, naaonjoaain neeichenena jereeun,’ naain ne, laenanohineein. Nitohanai coitucuhin neeichenenoote, chatohanai baaso ichaainneniha inara amute cachane jana colurujueein naaonjoaain neriquiche.

8 Nitohanihane jaunna, canu- cacha calaohipneein nejanoanaa nichaaunne, nebetacanaa cojoanonaamurijiriin cocoainaain letononeein neeun,” naain fariseeocuru tonorae Jesoso.

*Leinjiin jiurona bijii cacha rautaa Jesosone
(Mr 3.1-6; Lc 6.6-11)*

9 Inae jelai caje amuhinte, ecu nenaasina cocaassaae enoha cuha Jesosone jana,

10 ecu najiniha ne leinjiin jiurona bijii cacha. Nii jana Jesoso colurujueuruuhane jaanu lera ariirichuruuhane jaunte:

“Nainihanacha cocoaeraane saijieein, cunaitenaa rautaaca nebetacanaa cojoanonaabanan,” naain Jesoso caje baaauruha fariseeocurune janate:

11 “Tana chunocoha inara, leinjiin carenero siriquichene jana nebetacanaa cojoanonaabana acau mitunajaan ucuha jachu cuhane naluhainara raine coaraa curiquiche jelai caje rocohichene coinane.

12 Tana leinjiin carenero amurijiriin nelatiha leinjiin cachane coitucuhichene. Aihane jaun,

cha caaunna cunaitenaa rai caohacha ichaa
rautaenerichaaca nebetacanaa janonaa bana,”
naain fariseeocuru tonoraane baihate:

¹³“Ii biji raujiaaura,” naa nii jiuroma bijii leinjiin
cacha rai Jesosone janate, biji sijitaane rijieeori-
tiin, inae nerautae nii biji jera rijijieein nii cacha
biji.

¹⁴ Nete jelai caje mituhin nejesinajeein ita
suujua tacaasure fariseeocuru Jesoso sohin
jaaoruhane coina.

*Jaiti nenihia Jesosone jana, tururichaaine biha
Isaihasine*

¹⁵ Nitohaneein inae sohin jaonaa jerecuruhane
coitucuuriin jelai caje amuha Jesosone janate,
sacuuropa arajiaan cachaaurune jaun, jitaain cu-
naitenacaauru rautaain,

¹⁶ aonajeeuruha cachaaurune urichoo, nii
rautanaacane que ereeuruuhane caohate Jesoso.

¹⁷ Nitohaneeinte bihalu Cana Coaunera ere bera
inoensi Isaihasine nainaane coina:

¹⁸“Caate,
janijiin belaain cocoainaain
Canu Suujue que suujuequiin
canu letononeein nenaan ne,
‘Inae nerinaain baasoneein cachaauru
cairichaaurera,’
naain,
satiin chauratane que
lauri lauri nenacaauru cachaauru rai
beebejhane coina.

¹⁹ Coatiha
cachaauru que nejerateein, cachaauru cotaain,
bero cuhane niha natiin
tonijiaain ereein cachaauru relaain,

naaonjoaane aohanrarinaain.

20 Coatiha

nelatelanaala nenacaauru,
cairicheineein nenacaauru,
naaonjoainuri cairichaeranu que airinaain.

Niheichu

aasaeriin esenetaeraauru que jaolecorinaain,
lauri lauri nenacaauru cachaaaru
ichao rucuhecane jaan que
turuhane reen tiaaojoaain.

*21 Satiin lauri lauri nenacaauru cachaaurute
acaacha que jaaecoorureein,”
naain belu Isaihasi.*

*Moconajaera letononeein niicha ichana nainei
ichaa Jesoso beeuruuhane*

(Mr 3.20-30; Lc 11.14-23; 12.10)

*22 Nii janate, suujua cuhane coitucuchuhi
siricha leinjiin cacha erenaachara maosa
amaauruha Jesoso rene jana, irihane jaanu teein,
rai nota cono te.*

*23 Nii coaraain cojoelatiinte: “Tana caa cacha
Rabiri ichoala nihane,” naain ecu nejesinajeein
satiin ita caje bajaacoaaure.*

*24 Nii aonajeeinte: “Moconajaera curuaanaa
Beelseboote, caa cacha rai catohanai ichana
nainihane jaan teein ne,” naaure fariseeocuru.*

*25 Niritiin coaacuruhane coitucuha Jesoso rao-
tojoeine jaunte: “Satiin caa chauratane que
ichaonacaauru cachaauru, ita que nejerateein
neeuuhanete jiniiquiin nitajenaa nainecurure.
Niheichu leinjiin nese que ichaonacaauru ita
que nejerateein neeuuhane, jiniiquiin raotojeein
ichaonaa nainecururihei.*

²⁶ Nii rijijieein techu, moconajaera netonai rai letonocuru que nejerateein nihane, nii rai letono-hacha sitaain nihane, nii chaque neliteein nena nainerihei.

²⁷ Nii aitocohichene tocohaneein moconajaera suujue aina cuaain moconajaera sitaanu nechujianra, jeelai moconajaeraacha itajiha aichee-unna. Nete nii aitocohichene tocohanene, nitohanihane, cha jana inara letonocuru letohare nitohanai ichana naineein neeuruhane jaanu siriin neeuruhane coina. Nitohanihane jaunte, nechu jataain inara raajenihane jataain baasoneein aitocohichene coaarateeiche.

²⁸ Caa cacha suujua cuhane nenacaauru moconajaeracuru sitaanu Cana Coaunera Suujue aina cuaainnete, inae inara aina niha Cana Coaunera Cojoanonaane coujunacaneein ichaaun.

²⁹ Leinjiin cacha jataain laraajiin nena loreri asae enohin nihei nii chuni caje niicha sirii ruluhera. Biji ichojoaainchate naine nitohaneein caje niicha sirii ruluhanne.

³⁰ Chateeinti canuhacha ichai ichaene. Niite canu que nejeratenaaneein ne. Nii rijijieein techu canuhacha ichai itajeraneein ne canu esenetana jerihei.

³¹ Nitohanihane jaunne inara rai aitoon, satiin osaonacaauru cachaaaru quete suujua acatereein Cana Coaunera. Nete laen tonaaain baasoneein Cana Coaunera Suujue que erei que suujua acatenereein.

³² Canu- Cacha Calaochineein nejanoanaa nichaaunne que nihanatiin tonaaain baasoneein erei quete suujua acatereein. Nete laen rai

Suujue que tonaain baasoneein erei nihane, caa ena nena janonaa, caa baiha neeninu janonaa, naaonjoain que nihanatiin neein suujua acatenereein Cana Coaunera.

*Ninaa caje temule caohacha coitucuhacane
(Lc 6.43-45)*

³³ Tana temule jaain neeichene, caohacha que inaacane caje temule caohacha coitucuhin neeichene.

³⁴ Nitohaneein necha ansaineein neeichene jaunte, inara suujua caje mitunaa nainene caohacha. Inara suujua cuhane baasoneein inaraacha coacute, inara ujuae caje mitue.

³⁵ Jana caohachaain suujua coaara cachate, caohacha nejesina que ereein ne, suujua cuhane niha caohachane jaun. Jana baasoneein suujua coaara cachate baaso que ereein ne, suujua cuhane niha baasone jaun.

³⁶ Canune inara rai beeun, inae caseteco coaracururichaain satiin caa chauratane que nenacaauru cachaaurune bana, tonaain baasoneein ereeichene nihanatiinte coitucunojoinereein.

³⁷ Nitohaneeinte, inara ujuuae caje baaso ichaain neeichene ujuahoneein neneeichene, caohacha ichaain neeichene coitucunojoiniha cureein,” nae acaauru rai Jesoso.

*Cojoelanaacojoai baaaruha necha aansai
cachaaurune*

³⁸ Nii jaunte:

“Cacha relaera, canacaanu rai cojoelanaacojoai ichaain coaarateeine jerichaanura,” naaruha

Moisesa aitonjoan que cacha relaaurera aina fariseeocuru tabaaurune janate:

39 “Caa necha ansaineein suujua coitucuelanaala ichaonacaauru cachaaurute, acaauru rai cojoelanaacojoai ichacaaunne jerecure. Nena inae acaauru que cojoelanaacojoai coaaratihalu *profeta* Jonasine jaun, inae nenacaeneein acaauru que coaaratenaa jereneeun.

40 Nii nichata jiichoo nichata janotiineein, ate tabai suri cuhane nihalu Jonasine rijijieeine, canu- Cacha Calaochinichaunne nichata jiichoo nichata janotiinejeeincha atane cuhane nereeunni.

41 Aihana jaun, coitucunojoiniha caohacha ichaeraauru aina baaso ichaeraauru ichao que tihane banate, nacoaauneein nimichucurureein Ninibe cocoachacuru, acaauru coulurujueeruhane coina, acaauru rai beratenojoin beebejiha Jonasine aonaain nacoaauneein Cana Coaunera que coacuhin neeuruhalune jaun. Jana ena cau inara aina neinichaaunnena Jonasi amurijiriin nena nichaaunne saijieeinte caitoonjoa esenetana jereneeiche.

42 Jerichanejeein techu nacoaauneein nimichureein enoto mitu nichajai coarajeein cana raotonu nichajai que nenaalu ene curuaanaaneein nena netonai inae caseteco coaracururichaain caa ena nenacaauru cachaaurune bana acaauru coulurujihane coina, niicha coitucuhi beebejiha cachaauru rai Salomoonne jana, coriaji atane caje uhin aonaa uhalune jaun. Cau caa ena inara aina

neinichaunnena Saloomoon amurijiriin nena
neeun. Nete nii saijieein canu esenetana
jereneeiche.

*Nacoaauneein cacha suujueniha jelaisha enoha
coitucuchuhine*
(Lc 11.24-26)

⁴³ Cacha suujua caje mituha leinjiin coitucuchuhinete, cajihaneein amuhemujeein nihane jaanu ariirijie. Nii jana eruhenihanete:

⁴⁴ ‘Taolu mituhanulune jaaunne jelaisha cauha cureeun,’ naain coacue. Niritiin jelaisha turuhin nii cacha coaraane jana, aiha leinjiin loreri conera colane caohatiin lojoinojoineein nena rijijieein eruhanete,

⁴⁵ nacoaauneein jelaisha cuhin, caainsineein amurijiriin baasoneein nenacaauru aina ita taojiaain, jiniiquiin nii cacha suujua cuhane jeelaiha enooruhane, jataain jeelai amuritoheriin baasoneein ichaoe nii cacha. Nitohaneeinte, ichaoha cuurureein caa necha ansaineein ichaonacaauru cachaauru netonai,” nae acaauru rai Jesoso.

Jesoso rene turuuruha neba aina nejeraaurune
(Mr 3.31-35; Lc 8.19-21)

⁴⁶ Niritiin jaiti cachaauru aina ereereeca Jesusone janate, rene turuhin aina erenaa jerecure neba aina nejeraauru. Loreri asae enohelanaala airiniha neeuruhane janate:

⁴⁷ “Taute airiniha turuhin neeure ii neba aina ii nejeraauru, ii ainate erenaa jerecure,” naain Jesoso rai beeure.

⁴⁸⁻⁵⁰ Nete, nii rai biha unaa rai:

“Caaurute canu neba aina canu nejeraaurune. Chunocoha caletoaera Ofa ere tonoraain niicha

jereno hin icharate, canu nejera, canu bai, canu neba, naaonjoainuri ne," nae aina nerelanaa nichaanune cojeluhin Jesoso.

13

Temule jaera que cuaain cachaauru rai iriha Jesosone

(*Mr 4:1-9; Lc 8:4-8*)

¹ Nii bananeeinte, nii loreri nihacaanune jaan caje cuhin, nemuri auhaniha turuhin ecu nelau-riaain lauheque Jesoso.

² Nii jana, arajiin rene turuhacoaauruha cachaaurune jaunte, leinjiin bote cuhane fauhin lauheque, carene ichoae neeuruha cachaaurune tonohana.

³⁻⁴ Nii bote cuhane netiinte, araai laurii neretanaa rijijiei *parabola* que cuaain cachaauru rai ereerejeein:

"Leinjiin temule jaera temule jaa cunajaun ucuhe rriaacane janate tabaauru bero cuhane naluhu nii niicha riajaiine jaun, turuhin coaraain quihure tajaaecuru.

⁵ Jana le turijieein niicha riajait, nenih mu-luluhin atanene jaan jeloon ajeri ichoae naluna-caauru caraajaelanaala omaroe.

⁶ Nete inae omarohane jana mituhin ajajaa enotone jaun ohe, mululuhin nenih atanene jaaun, ucuacaain nenih rai cojoaisine jaun.

⁷ Le turijieein niicha riajai ucuhete, ajena jana naluhane jaun, amurijiriin omaroha ajaenane jaun atinae.

⁸ Jana atane caohacha que le turijieein niicha riajait, le ucuhecuru caje le temuracuru

lefashaananaain inacee. Jana tabaaurute saotachoonca ucuheneein, nichatachoonca ucuheneein, naaonjoaain inaacure.

⁹ Caa caitoonjoan aonacurumiin irichonacaauru," naain cachaauru rai ereereje Jesoso.

Jesoso caje parabola que cachaauru rai ereereecane bajaacaanu aina nerelanaa nichaanune

(*Mr 4.10-12; Lc 8.9-10*)

¹⁰ Nii jaunne, Jesoso rohan nichuuntaain nii araai laurii nereretanaa rijijiei *parabola* que cachaauru rai ereereecane jaan bajaacaanu caje aina nerelanaanichaanune.

¹¹ Nii jaunte: "Cana Coaunerate rai cachaneein neeichene jaun, coitucueraelanaala nena Cojoanonaa coitucuerate inara que. Nete laen rai cachanelanaala nenacaauru que coitucueratena jerene.

¹² Nitohanihane jaunte, naitoonjoa tonoraain niicha jerei ichajeein nenacaauru rai, jataain jee-lai amuritoheriin itolere coitucuhin neeuруhane jaanu tereein Cana Coaunera. Jana naitoonjoa tonraelanaala niicha jerei ichaelanaala nenacaauru cajete, jitariin acaihaniji acaauruhacha coitucuujei rulureein.

¹³ Nitohanihane jaunne araai laurii nereretanaa rijijiei que cuain acaauru rai ereeun. Coaracuruuhane niha natiin coitucuurenihane jaun. Niheichu aonacuruuhane niha natiin aonaain coitucuurenihane jaun.

¹⁴ Nitohaneeuruuhane coinate: Aonacuruuhane niha natiin:

‘Naaonjoain quete aite,’
 naain coitucuururihaain.
 Niheichu
 nii coaana jerecuruhane niha natiin coaracururi-
 naain.

¹⁵ Inae jataain nauhaca
 caa cachaauru suujuane jaunte,
 cha aonacuruhane nihanatiin,
 ‘Naaonjoai quete aite,’
 naain coitucunaa nainecurene.
 ‘Niheichu
 cha coaracuruhane niha natiin
 coitucunaa nainecuruhi.
 Nabana
 canuhacha ichai coaraain,
 aonaain coitucuhin
 canu rene uuruhane,
 acaaaru rautaanune coataa,’
 naain bihalu Cana Coaunera ere bera inoaensi
 Isaihasine jaa nainaelu,”
 naain aina nerelanaa nichaanune rai bihane bai-
 hate:

¹⁶ “Nete laen inara nerausiajeeein niha
 curiquicheein, aonaain, coaraain, coitucuhin,
 naaonjoainchene jaun.

¹⁷ Arajji profetacuru, chaen caohachaain suujua
 coaaraauru cachaauru, naaonjoainurine maa-
 jeeinte niqui, caa inaraacha coarai coaana jere-
 curelu. Nete coaana nainecurenelu. Inaraacha
 aonaine maajeeein aohana jerecuruhane saijieein
 aonacuruhilu.

*Temule jaera parabola que irihane biha Je-
 sosone*
(Mr 4.13-20; Lc 8.11-15)

18 Aonacuchene caa temule jaera que cuaain araaai laurii *parabola* que irihanune be inara raite coitucuhiche.

19 Cana Coaunera Cojoanonaa que erenaa aonacuruhane saijieein coitucuhichurute, nii bero cuhane nalunaa temule ucuhe rijijieein neeure, acaaaru suujua cuhane Cana Coaunera beratenojoi erenaa jereein aonacuruhane niha natiin, turuha acaaaru suujua cuhane baasone jianeraauru ne.

20 Jana nii ajeri ichoae nalunacaauru temule ucuhecurute, Cana Coaunera ere aonaain esenetaain coroajeein jereein raauruhane jana,

21 inae cairichaaerinojineein mucunojoinecruhane coina arinojineein neeuruhane, canu esenetaain neeuruhane jianeraauru rijijie.

22 Jana nii ajaena jana temunojoin temule ucuhecurute, Cana Coaunera ere aonacuruhane saijieein, nechu jataain caa atane que netiin necoriquijaain, raotiin nena coacuhin, niicha que suujua cuaain necoritanacaauru rijijie. Nitie, inae nii erenaa esenetaauruhane jianeein, leeochaauru relaauruhane jianeein neeure.

23 Nii atane caohacha que temunojoin temule ucuhecurute, Cana Coaunera ere aonaain leeochaauru relaain, naaonjoaain nenacaauru rijijie. Acaaurate, nii le ucuhecuru caje lefasha ucuheneein, saotachoonca ucuheneein, nichata choonca ucuheneein, naaonjoaain le tijiriichuru caje teeurera rijiichure,” naain aina nerelanacaauru rai beebeje Jesoso.

*Tirico temuurera rai ajaena baaso temuha
acaauru que nejeratenaane*

24 Niritiinte, nacoaauneein leeocha nereretanaa que cuain acaaaru rai ereerejeein:

“Cana Coaunera Cojoanonaate, leinjiin cacha, rai noocoana jana cachaauru que tirico temuerati-hane jana,

25 temuhin satiin sinihuruuhane tonohana, nii tirico niicha temuuri jana turuhin ajaena baaso temuha leinjiin cacha acaaaru que nejeratenaane rijijie.

26 Nii jana inae omarohin, inae inaaca nii tiri-cone jana inanacae nii ajaena baaso netonai.

27 Nitohanihane jana coaraainte: ‘Curuaanaa, chasiinna temule caohacha ucuhe nejesina temuerateeilune saijieein, jana mituhe ajaena baaso,’ naauruha nii ocoana erora rene turuhin nii amihanenacaaurune janate:

28 ‘Chunocoha canu que nejeratenaate, nii ajaena baaso temucaihia,’ naa acaaaru rai nii ocoana erorane janate: ‘Ta, nii ajaena baaso rocohin jaohacaanune jereeine,’ naain baaauruha nii amihanenacaaurune jana:

29 ‘Niriimiin, nii ajaena baaso rocohalaainte tiri-cone maajjeein rocoriquiche.

30 Nirijieein ecu neein jiniiquiin omarocuru-miin, tainaca que tihane reentiaain. Inae tainaca que tihane banane jelai teein nii ajaena baaso raain, jelai teein tirico raain rucuhecaaune jaa cuhane rucujueein, nii ajaena baaso jelai teein mocoheratereeunni,’ nae nii ocoana erora,” naain cachaauru rai beebeje Jesoso.

*Mosatasa ucuhe rijiicha Cana Coaunera Cojoanonaane que erenaa parabola
(Mr 4.30-32; Lc 13.18-19)*

³¹ Niritiinte nacoaauneein:

“Cana Coaunera Cojoanonaate leinjiin cacha, rai noocoana jana mosatasa ucuhe temuhera rijijie.

³² Esinae rauhijiriinte, jataain leeochaauru temule ucuhecuru amurijiriin aansijian rai nucuhene saijieein, inae omarohane leeochaauru ocoana jana nenacaauru temulecuru amurijiriin fohecane, rai nunecuru que tajenajaanu ichacure tajaaecuru,” naain nereretanaa que cuain beebeje cachaauru rai Jesoso.

*Faanjorerera rijiicha Cana Coaunera Cojoanon-aane que erenaa parabola
(Lc 13.20-21)*

³³ Niritiinte: “Cana Coaunera Cojoanonaate nichata sajeein coujunaca que arina coujunaca-teriin rai jorerera que jasiiteein tabaain nii colihajorereein caje arajiin faan jaa leinjiin enene rijijie. Nii neleerinha tabaain colihane coina nenaajorerera rijijieeinte, cacha ichao sacuritaain nefaaone coina nenaajae ne Cana Coaunera Cojoanona,” naain beebeje Jesoso.

*Nereretanaa rijijiei parabola que ereerejhane biha Jesosone
(Mr 4.33-34)*

³⁴ Nitohaneeinte, nereretanaa rijijiei *parabola* nejesina que cachaauru relae Jesoso. Chabana nii *parabola* colane irihei cachaauru rai.

³⁵ Nitohaneeinte:

“Cana rai chauratane coaaunaa Cana Coaunerane
 caje coaauneeinte,
 satiin asinojoineein nena que erereein, nerere-
 tanaa rijijie
parabola cuaincha,”
 naain beeuruhalu Cana Coaunera ere bera
 inoaensihuru *profetacurune* nainaane coina
 nitohaneein ichae Jesoso.

*Tirico temuurera rai ajaena baaso temuera que
 irihane biha Jesosone*

³⁶ Nitohaneein inae cachaauru rai irihane
 nainaainte, acaauru rai nocoeein jelai caje cuhin
 nii neeuuhane jaan loreri asaae enoha Jesosone
 jana, rohan nichuuntaain nii tirico coocana
 jana ajaena baaso temuhera que cachaauru rai
 iriha Jesosone bajaacaanu caje aina nerelanaa
 nichaanune.

³⁷ Nii jaunte: “Nii temule ucuhe caohacha
 temuherate canu- Cacha Calaohineein
 nejanoanaanichaunne rijijie.

³⁸ Jana nii ocoana que caitoonjoate, cana rai
 chauratane ne. Jana nii temule ucuhe cao-
 hachate, Cana Coaunera esenetaain aina ijiin rai
 Cojoanona que neenihuru ne. Jana nii ajaena
 baasote, moconajaera letononeein nenacaauru
 ne.

³⁹ Jana nii ajaena baaso temuherate, acaauru
 que nejeratena moconajaera ne. Jana nii tao-
 jiaera que aitocoaaunnete, inae ecu tihane bana
 sarichaain cana cojoanonaane que aite. Jana nii
 taain rucuheraaurute anjeraaurune.

40 Charijeeein teeinti, ajaena baaso taojiaain mocohaca, nii rijijieeinte inae saa cana janon-aane bana moconojoiniha cuurureein osa que leeochaauru saruhin nenacaauru moconajaera aina.

41 Nii banane canu- Cacha Calaohineein ne-janoanaanichaunne canu rai anjeraauru letoareeunni, nii cana cojoanonaa que nenacaauru baaso ichaain, osa que leeochaauru saruhin, naaonjoaain nenacaauru raain

42 usi charijibana jacanaacharanejeein nena jana jaonajaauruhane, ecu neein auhaauhaquiin chanaaurureein.

43 Inae nitohanihane banate, esinae rauhi-jiriin Cana Coaunera jerenohin ichaain tono-raain nenacaauru, aiha enotone tocohaneein jiquihaquiin conohin niha cuurureein, canu Inaca Cana Coaunera Cojoanonaa que neein. Caa aitocoaaunne aonacurumiin irichonacaauru.

Oro rijijieein nena coreti tesoro rijiicha Cana Coaunera Cojoanonaa

44 Charijeeein teeinti, leinjiin oro rijijieein nena coreti tesoro eruha leinjiin cachane, nii eruhanee jaan teein conauteein ratiriin, rachoo-joeein jitariin niicha sirii rucuhele que necorete nii cacha, nii niicha eruhi conautihane jaan atane coretihane coin. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

Oro rijijieein nena perla coreti rijiicha Cana Coaunera Cojoanonaa

45-46 Charijeeein teeinti, leinjiin recatoon, perla coretiin nena ariirijieein amuhin, inae nii perla

coretiin nena eruhane, jataain nii corei eruhane coitucuhin rachoojoeein cuhin, rai rucuhele que jitariin necoreteein, nii niicha eruhi perla corete nii recatoon. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

Rede que ate mucuhera rijiicha Cana Coaunera Cojoanonaane

47-48 Charijeeein teeinti, nemuri cuhane rede jaaoruha ate mucuurerane jana, itolere ate mucuha nii niicha jaori redene, inae memoha ate caaunne jana carene ichoae inaain ate caohachaauru janijiin omari cuhane teein, nii baasooru foranacaauru jaaore nii ate mucuurerera, nii rijiicha Cana Coaunera Cojoanonaa.

49-50 Nitohaneein techu, inae cana janonaa satono que turuhane bana, caohachaain ichaonacaauru janijiin raain, baasoneein ichaonacaauru jaaorureein usi chariji bana jacaelanala nena jana anjeraauru. Nii banate chanaa cuurureein auhaauhaquiin,” nae aina nerelanaa nichaanune rai Jesoso.

Canacaanu relaane jaan aonaain coitucuhacaa-nune bajaa Jesosone

51 Niritiinte: “Caa inara rai caitoonjoan aon-aaina coitucuhiche,” naain canacaanu caje bajaa Jesosone janane: “Enjeen, aihacaanura Curuaanaa,” naacaanu.

52 Nii jaunte: “Coaracuche nachuhinti leinjiin Cana Coaunera rai rauhi que cacha relaera- cacha relaanete, ‘Naaonjoaan caa Ena Turunaa Cana Coaunera Cojoanonaa Caohacha’ naain beein,

‘Naaonjoaan nii rauhi inoaesi’ naain nii ena canuhacha bei Cana Coaunera Cojoanonaa aina rauhi inoaesi que aitiin caohatiin cachaauru rai beein cachaauru relae,” nae Jesoso.

*Rai nataneu Nasarete turuha Jeosone
(Mr 6.1-6; Lc 4.16-30)*

⁵³⁻⁵⁴ Inae nii nereretanaa rijijiei *parabola* biha cachaauru raine nainaainte, jelai caje canacaanu aina amuhin rai nataneu turuhin, ecu nenaasina-coca asaae enohin, ecu nenacaauru cachaauru relaane nunuhete Jesoso. Nii janate cojoelatiin: “Chuna jataain cojoelanaacojoai ichaane coinane maajeein nerelaete toritiin itolere coitucuhin ere.

⁵⁵ Tana enuha caje itolere ichana inaera cacha calaohi nihane, jana rai neba niha Marihane. Nii jana rai nejeraauru niha Saantiaao, Jose, Simoon, Jodasi, naaonjoainurine.

⁵⁶ Jana rai baihuru netonai cau cana aina ichaaoruhane. Chaa cajena jataain nainaain itolere coitucuhin aite,” naaure ecu neein aonajeeurera cachaauru.

⁵⁷ Niritocuruhane jaunte inae Jesoso esenetaain nere tonorana jerecurene cachaauru. Nii jaunte acaaauru rai:

“Chunijiun cuhane jaaunrute niqui leinjiin *profeta* que suujua acateein coitucuure laurinelanaala nenacaauru cachaauru. Nete laen esenetaurene laurineein nenacaauru naraaichuru. Niheichu nii loreri ichaothane jaaun nenacaauru niha natiin,” nae cachaauru rai Jesoso.

⁵⁸ Nii jaunte ecu arajiin cojoelanaacojoai ichaenelu, esenetaaurenihia ecu nenacaauru cachaaurune jaun.

14

Oha Joaan Baotisitane

¹ Nii banate, Calileea batane curuaanaaneein niha Erodesine jaun, nii amuhemuheca Jesosone coitucuriin:

² “Acate, Joaan Baotisitane. Inae o caje ichanacaihara. Acanihane jaunte, nii cojoelanaacojoai ichana nainera,” naain jetao ereereje Jesoso que rai letonocuru rai.

³⁻⁴ Rai nocoala Ferifi comasai Erodiasi siriha comasaine que Erodesine jana jetaote: “Jiaonriha choocoala comasai sirii ii comasaine quera,” naa Joaanne coreniha jetao, caresero cuhane Joaan enoaeratelu *cadena* que ichoarateein Erodesi.

⁵ Nitohaneein caresero cuhane enoaain jetaote, Joaan sohin jaonaa jerihane niha natii, ichana nainenelu Erodesi, satiin cachaauru Cana Coaunera letononiha Joaanne esenetaauruhane jaun, cachaauru coasiha.

⁶ Nejetaote, nejanoaane bajaanaa bitoaane coina beseta ichaa Erodesine jana jetao, nii beseta bitoaa turunacaauru acatiha raansae nii Erodiasi cacunu. Nii acaaaru acatiha raansaa nii ranunane coaraain jetaote, jataain rautatiin coaraane jaun,

⁷ niicha jerei bajaa caje nii ranunane, Cana Coaunera notaracaae rai tihane coina aite Erodesi.

⁸ Nii jaun jetaote, rai neba suujuatenojoinneein Erodesi rai: “Canu rai aihane, leinjiin ojoaichu

cuhan Joaan Baotisita coturi uhaau caraicha,"
naa nii ranunane jaun

⁹ inaderae rey Erodesi. Nejetaote, satiin niicha cotihacuri acatiha teein Cana Coaunera notara-
caae, niicha jerei bajaa caje nii ranunane rai ti-
hane coina aitohane jaun,

¹⁰ caresero cuhane niha Joaanne jana coturi
moloherateein raerate.

¹¹ Nii jaun jetaote, leinjiin ojoaichu cuhane
Joaan coturi amaain teeuruha nii ranuna raine
jaun, neba rai te nii ranuna.

¹² Inae nitohaneein teratiha Erodesine coitu-
cuhinte, Joaan jaberoco raain conauteein ratiriin,
biha uure Jesoso rai Joaan sacuureraauru.

*Saoqui oaraancai cacha coroaatiha Jesosone
(Mr 6.30-44; Lc 9.10-17; Jn 6.1-14)*

¹³ Nii jaunte, rai beeuruuhane caje coitucuhin,
nii nihane jaan jelai caje canacaanu aina amuhin,
canacaanuhacha aina leinjiin bote cuhane
fauhin, nenihā cachane jaan cue Jesoso. Nete nii
bote cuhane fauhin amuhacaanu Jesoso ainane
coitucuuriin, neseeuru cajeeuru uhacoaain
sacuure atanechoae uhi cachaauru.

¹⁴ Inae niicha coinetihu turuhin, bote caje
fauhin, inihā cuha Jesosone janate, najiniha cu-
naitenacaauru uhaain arajiin neeuruha cachaau-
rune jaun, cairichaaajoaain acaauru coaraane
jaun, niicha uhaauri cumaitenacaauru rautae Je-
soso.

¹⁵ Nii jana, inae nocohena jerihane jaunte,
Jesoso rohan nichuuntaain: "Chajaain caa
cachaauru rai necoeeute, nenajaun cauha
cuuruhinete, ucuhae rai lenone coretecurumiin.

Coatiha caa jana ichaohi cacha,” naacaanune jana:

¹⁶ “Chajaain inara acaauru coroateeueche. Coatiha caohacharihei ena caauruhane,” naa canacaanu rai Jesosone jaun:

¹⁷ “Nihei canacaanu rai lenone. Saoquijieein faan, itaque jerajejeein ate, naajeeinchate neeje,” naacaanune janate:

¹⁸ “Cajih carai uhauuche,” naain

¹⁹ omene choae nelauriaauruha cachaaurune coina aitiin, biji cuhane nii ate aina faan mucuhin teberiaain: “Narihara Cana Coaunera,” naain Cana Coaunera bajaain cataun nii faan teruhin aina nerelanaa nichaanune rai te Jesoso, chaluha-caanune coina.

²⁰ Nii jana satiin cachaauru naineein chaluha-caanune janate, que lenoneein obeecuruhane jana, jaiti cautihane jaun, rai caute que lechoonca coroata omarii, omari memoaaure.

²¹ Canaanaihunru aina enecuru janijilanaala, quichaauruhacha janijiinte, saoqui oaraancai cachaauru nii lenonecure.

Acau ichoae amuha Jesosone

(Mr 6.45-52; Jn 6.16-21)

²² Nii baihate, ecu nedaaín cachaauru rai necoihane tonohanau, bote cuhane fauhin ichoaihaniha nemuri jera jaaohacaanune coina aina nerelanaa nichaanune letoae Jesoso.

²³ Inae cachaauru rai necoihane baihate, jelai caje amuhin, acaachanejeein ichatane ucuuno que cue, ecu Cana Coaunera bajaane coina.

²⁴ Inae nocohejihane janate, cuu acaachane-jeein niha Jesoso nii ichatane ucuunone jana, inae

coriaeneein cue nii bote, atane auha caje. Nii jana, mijiaaineein uha cujuana aina fichafichanaane jaunte, amusine nii bote.

²⁵ Nii jana inae janonaa jerihane janate, nii ichatane ucuuno nihane caje uhin, canacaanu caajie uhe Jesoso acau ichoae rurujueein.

²⁶ Nii jana acau ichoae rurujueein uhane coaraainne, coasiha cojoriin: “Nechu aansai coitucuchuhite aicha,” naacaanu aina nerelanaa nichaanune.

²⁷ Nii jaunte: “Coa nesoonetoache. Canune aihunra,” naain canacaanu rai iriha Jesosone jaunte:

²⁸ “Ii aaine, jereeune ii rene tiaain uhe acau ichoaera Curuaanaa,” naa Jesoso rai Fedorone jaunte:

²⁹ “Chajaaujian,” naa Jesosone jaun, bote caje fauhin acau ichoae cuhin ruruje Jesoso rene cuhin Fedoro.

³⁰ Nete jataain mijiaaineein uha cujuana aina fichafichanaane coaraain, nesoonetohane jaun, assaun naluhue cuhane Fedoro. Inae naluhane jaunte, nesoone caaun auhaquii: “Curuaanaa, canu comaleeu,” naa Fedorone jaunte,

³¹ biji que mucuhin: “Chanuna jataain cha esenetaeneei. Chanuna necoatohi,” nae Jesoso, Fedoro rai.

³² Inae bote cuhane faauruhane rijieeritiin, nesuruha nii fichafichanaa aina cujuanane janane,

³³ Jesoso acatiha neseeonraain: “Iite esinae rauhijiriin Cana Coaunera Calaochineinchaa,” naacaanu satiin nii bote cuhane cuinichaanune.

*Jenesaree batane que turuhin, ecu nenacaauru cunaitenacaauru rautaa Jesosone
(Mr 6.53-56)*

³⁴ Inae nii nemuri jerau turuhinne, Jenesaree batane que turuhacaanu.

³⁵ Nii Jenesaree bataneu turuhacaanune janate, Jesoso coitucuure ecu ichaonacaauru cachaaaru. Nii jaunte, jelai batane sacuritiin ecu turuha Jesosone coitucuhin, rene cunaitenacaauru uhaacoain

³⁶ turuhin, caje acaauru rautana nainihane baaigure, jeriha Jesosone rai cajione auha mucuuruhanne coinia. Nii rai cajione auha mucuurera cunaitenacaaurute satiin nerautaaure.

15

*Baasoneein cacha ichao tera que iriha Jesosone
(Mr 7.1-23)*

¹ Nii janate, Jerosaleen caje turuha uure Jesoso coaraa, Moisesa aitoonjoan rauhi que cacha relaureraauru aina fariseecururu tabaauru. Acaaurute, Jesoso rohan nichuuntaain:

² “Chanuna aihuruhalu canacaanu inoaesihurune rijijieein neurene caa ii aina nerelanacaauru. Chanuna jeriha canacaanu ichaone rijijieein lenonecuruhane ajiniha, jauriaanejeein biji culeecurene,” naain Jesoso caje bajaauruhane janate:

³ “Chanunajian inara netonai Cana Coaunera aitoonjoa tonoraelanaala, inara ichaochacha sacuhiche.

⁴ Nitohaneeichene jaunte: ‘Ii inaca, ii neba, naaonjoainuri ere tonoraain caohachaain ichaaoche. Necha ansai, naain baasoneein rai

inaca, rai neba, naaonjoaain que ereein neite ateinanohiniha cureein,’ naa Cana Coaunera Quiricha Inoaensi cuhane natiin tonoraelanaala ichaoohiche.

⁵⁻⁶ Cana Coaunera Quiricha Inoaensi cuhanete niqui ne rauhi, satiin cacha, rai fojiaraauru rai cha teein nihane coina. Nete inara: ‘Coatiha inara rai cha tenaa nainihaaun, satiin quiicha sirii inae Cana Coaunera que banijiaaineein nihane jaun,’ naain erei cacha, inaca, neba, naaonjoain rai chaelai tenaa nainenihane que aitocoiche. Nitohaneeinte, Cana Coaunera aitoonjoan que jaolecohin tonoraeneeiche, nechu jataain inara ichaochacha sacuhichene coina.

⁷ Esinae rauhijiriinte, necha ansaineein neeichene que aitiin, inara que laenaelu Cana Coaunera Ere bera *profeta* inoaensi Isaihasi:

⁸ ‘Caa cachaaurute,
rai nereeche que
canu coroajeein neeure.

Jana
acaauru suujua cuhane aihuahuhi.

Cacajete
coriaae ne acaauru suujua.

⁹ Nii jaun,
nii chaque nelitejehai,
netaojiaain canu
coroaaecuruhane
nechu jataain acaauru relaauruha cachaaurune
que nejesinajeein ita relajeein
neeruhane jaun,’
naelu inara que Cana Coaunera Ere bera inoaensi
Isaihasi,” nae acaauru rai Jesoso.

¹⁰ Niritohane baihate, nii ecu nenacaauru cachaauru cotijiaain: “Caohachaain caa inara rai aitocoaaunne aonacuchete coitucuhiche.

¹¹ Coatiha baasoneein cacha ichao aasaehai joaereen lenone canaacha quii. Baasoneein suujua cuhane niicha coacui, nujuae caje mitunaate laen, baasoneein cacha ichao aasaje,” naainte acaauru rai beebeje Jesoso.

¹² Nii janate rohan nichuuntaain: “Nii aito-hine aonajeein jataain ii que nererojoecaauruha fariseeocurune aonaaina,” naain caje bajaacaanu aina nerelaa nichaanune janate:

¹³ “Niicha temunojoinelanaala nena ajaenate, cojoaisi aina curuataain rocohin jaoreein Cana Inaca Cana Coaunera.

¹⁴ Aihane jaun, coa acaauru rerohecaachete nainaaurumiin. Maosa rijijieein neeuuhane rijijieein nenacaauru relaeraneein neeuuhane jaunte aitocure. Chaen techu leeocha maosa amanaa jeriha leeocha maosane, jiniiquiin atane jachu cuhane naluhin nitajeeururihane rijiichuruuhane jaun aitocure,” nae aina nerelanaa nichaanune rai Jesoso.

¹⁵ Nii janate Jesoso rai: “Canacaanu rai, nii aito-hine jaan beeune coitucuhacaanu,” naa Fedorone janate:

¹⁶ “Inara niha natiin inachura coitucueneeichete.

¹⁷ Tana satiin cacha ujuae cuhane enonaa, cacha suri cuhane cuhin, nii baiha cacha jaberoco caje mituhane coitucuhichene.

¹⁸ Jana cacha ujuae caje mitunaate, cacha suujua caje mituhe. Niite laen baasoneein cacha ichao aasaerane.

¹⁹⁻²⁰ Nitohanihane jaunte, cacha suujua

caje mituha itolere baasone jaun, sonajaain jaohin, sinijeranelanaala nenaan ene aina ichaohin, asijiauhin, casejenetiin, ita cotaain, naaonjoaan cachanete laen, baasoneein cacha ichao asaaerane. Jana nitohaniha cana ichaone tonoraelanaala cana biji culejelanaala lenonichaane, coatiha baasoneein cana ichao aasaehai,” nae Jesoso.

Leinjiin ene Jorionelanaala nenaan Jesoso esene-taane
(Mr 7.24-30)

²¹ Jelai caje amuhin Tiro, Sidoon, naaonjoainuri batane nichae cuha Jesosone jaun aina cuhin,

²² inae ecu turuhacaanune janate, eheehequiin: “Curuaanaa Rabiri nefoerate, cairichaaajoaain canu coaraau. Moconajaera siriha canu cacunune jaunne aitoonchera,” nae canacaanu caaijie uhin leinjiin Canaaun bene, natane caje uhin ecu ichaonaa.

²³ Nii jana inauheneecha aonajian Jesosone jaunne: “Chajaain caa ene rai aitoote amuhine. Nete cana caaijie uujuueein eheeheque,” naacaanu rohan nichuuntaain aina nerelanaa nichaanune.

²⁴ Nii jaunte: “Cana Coaunerate rai cacha-neein nenacaauru Israeli cocoaichacuru nitajeeruhane rai nenacaauru reneecha caletoaelu,” nae Jesoso.

²⁵ Nete, nacatiha neseeonraain: “Canu coroatajaneeuchera Curuaanaa,” naa rai nii enene janate:

²⁶ “Coatiha caohacharihei Cana Coaunera cachaneein nenacaauru que banijiaain nenaan

ruluhin remaae rijijieein neinequichene rai tihanuchenera," naa Jesosone janate:

²⁷ "Aihachechuhisi niquicha Curuaanaa. Nete remaae rijijieein canacaanu coaraaichene niha natiin, atiin canu coroatajaneeuchera Curuaanaa," naain Jesoso tonorae nii ene.

²⁸ Nii jaunte: "Quesenetaaine corenihate, inae ii jerenoji rijijieein nerautareein nii ii cacunuchera," naa Jesosone rijieoritiin, inae nerautae nii rai cacunu.

Arajii cunaitenacaauru rautaa Jesosone

²⁹ Jelai caje amuhinte, Calileea conemuri auhaniha turuhin, ichatane ucuunno que iniin, ecu nelauriaain lauheque Jesoso.

³⁰ Nii janate, rene netaojiaaure arajii cachaauru, bacosacuru, maosacuru, biji que jiuronacaauru, erenaacharaauru, leeochaauru arajii cunaitenacaaurune maajeein uhaacoaain, Jesoso acatiha tenajaauruhane acaauru rautaane coina.

³¹ Nitohaneein rautanaacane janate, inae nerautaain, nichauraain, amuure bacosacuru, maosaneeuruuhane caje conoe maosacuru nota, inae nerautaaure biji que jiuronacaauru, erenaacharaauru niha natiin inae ereeure, naaonjoaauruhane coaraainte, jataain cojoelatiin, Cana Coaunera Israaeli Coaunera coroaecure nii ecu neein coarajeeurera cachaauru.

*Jena oaraancai cachaauru rai lenone faa Jesosone
(Mr 8.1-10)*

³² Nii janate, aina nerelanaa nichaanune cotijiaain canacaanu rai: “Inae jataain cairichaojoaain caa cachaauru coaracaau. Inae nichatajanoha cau canu aina neeuruuhane. Nii jana nihei acaauru lenone. Naininaaun coroatenajaelanaala acaauru letoaanu acaauru nenajaunne. Mijiintena caaun aterocuruha bero cuhanene coataa,” naa canacaanu rai Jesosone jaunne:

³³ “Chuna caa araaine cacha rai lenone erurichaache, neniha cachane jaaun nihacache natiin,” naacaanu aina nerelanaa nichaanune janate:

³⁴ “Inatajajeein nihun faan siriquiche,” naa canacaanu rai Jesosone jaunne: “Caainsinejeein faan, coroatajajeein ate, naajeeichate neeje,” naacaanune janate,

³⁵ atane ichoae nelauriauruha cachaaurune coina aitiin

³⁶ rai biji cuhane faan aina ate mucuhin, Cana Coaunera bajaane baiha, cataaun taturiin aina nerelanaa nichaanune rai te, cachaauru rai chaluhacaanune coina.

³⁷ Nii jaunne, satiin cachaauru rai chaluhacaanune jana, inae nainaain lenonecuruhane saijieein cautihane jaun, rai caute que caainsine omari memoaaure.

³⁸ Canaanainuru, enecuru, uha elone jaun tabaacoaa nucuhecuru aina uha cujuana tabaine janijilanaala quichaauruhacha janijiinte jena oaraancaaure nii lenonenacaaru cachaauru.

³⁹ Nii lenonecuruhuha cachaaurune baihate, cachaauru rai necoeein, leinjiin bote cuhane fauhin, Maadala batane que cue Jesoso.

16

*Cojoelanaacojoai icharatecuruha sa-
doseeocuru aina fariseeocurune
(Mr 8.11-13; Lc 12.54-56)*

¹ Nii janate, Jesoso coaraa uure fariseeocuru aina sadoseeocuru. Nitohaneeinte inae rene turuhin coulurujueuruuhane jaanu leranu ariha, acaaaru rai cojoelanaacojoai ichaane coina aitocure. Chaen esiniae rauhijiiriin, Cana Coaunera letono nihane coitucuuruhane coinane maajeein.

² Nete acaaaru rai: “Charijeeein teeinti, sonaina cafarane nocohaca dedene: ‘Caohatorichaain janonaa,’ naain ereeiche.

³ Jana, janone cafarane nocohaca dede nijichoriaaojoaaine: ‘Urichaain elo,’ naain ereeiche. Nitohaneein dede caje itolere coitucuhin naaonjoaainchene natiiin, chanuna jana: ‘Naaonjoaane coinatecaa aicha,’ naain caa enene cojoanonaa coitucunaa naineneeiche.

⁴ Caa cachaaaru nechu aansaineein suuja coitucuelanaala nenacaaurute, cojoelanaacojoai ichacaunne coina canu rai aitocure. Nene inae acaaaru que coaaratesihalu Jonasine jaun inae nenacaeneein acaaaru que cojoelanaacojoai coaaratenaajereneeun,” naane baiha acaaaru ratiriin, jelai caje amuhe Jesoso.

*Faan jorerera- lebadora rijiicha fariseeocuru
ichaone
(Mr 8.14-21)*

⁵ Inae Calileea conemuri jerau cuhacaanune jaun faan baiteein ratirihacaanu aina nerelanaa nichaanune jaunte:

6 “Aonacuche. Faan jorerera rijiicha fariseeocuru aina, sadoseeocuru ichaone que necohalajihuche,” naa canacaanu rai Jesosone jaunne:

7 “Chanuna caa aite. Faan uhaenihacachene jaunna caa aitohate,” naacaanu ita raine aona-jeeinte:

8 “Chanuna faan uhaeneinchene que aitocoiche. Jataain asaaeriinchate quesenetaaiche.

9 Tachu jaiti nainaquiche taolu saoquijiei faan chaluheratihanu, saoqui oaraanci cach a raine jana, inata omariin rai caute taojiaaichelu.

10 Niheichu taolu, caainsinejei faan chaluerati-hanlu jena oaraanci cach a raine coaauheeiche, inata omariin jana rai caute taojiaaichelu.

11 Chanuna faan que inara rai aitenihanune que nainaeneeiche. Faan jorerera rijiicha fariseeocuru aina sadoseeocuru ichaone que necohalajihuche,” nae aina nerelanaa nichaanune rai Jesoso.

12 Nii jaunne, faan jorerera que aitelanaala, cach a relaauruha fariseeocuru aina sadoseeocurune que aitoha canacaanu rai Jesosone que nainacaanu.

Mesihasi niha Jesosone biha Fedorone (Mr 8.27-30; Lc 9.18-21)

13 Inae Filipo Sesareea batane que turuhinte, aina nerelanaa nichaanune rai: “Tonacuruha cachaauru, Cana Coaunera Calaochinein cach a caje nejanoanaa nichaaunne que,” naa Jesosone janate:

14 “Tabaaurute, Joaan Baotisita niha, ii beeure. Jana tabaaurute, Irihasi niha, ii beeure. Jana

leechochaaurute, Jeremihasi niha ii beeure. Jana tabaaurute, chunocoha Cana Coaunera ere bera profetane caiha, naaure,” naain tonoraacaanune janate:

¹⁵ “Tonaquiche jana inara. Cha nichaaun jana Canu inara rai,” naain canacaanu caje bajaa Jesusone janate:

¹⁶ “Iite esinae rauhijiriin ichaaohin nenaac Cana Coaunera Calaohi Mesihasineei,” nae rai Simoon Fedoro.

¹⁷ Nii jaunte: “Raotojoeeinte rausiaaenojineein neei, Jonasi calaohi Simoon. Chuni cacha ichei benihane janate, Canu Inaca Cana Coaunera ii que canu coitucuerate.

¹⁸ Jana iite Fedoro neei. Canune ichei aitoon. Iite canuhacha tei ajeri rijijieein, canu coitucuu-ruha canu cachaneein neenihurune coin achara-neein neriquiin. Nii ii que canuhacha icharatei amuritonaa nainerinaain chuni, onaaniha natiin itajenaa nainerinaain.

¹⁹ Ii raine, Cana Coaunera Cojoanonaa que nenaac naineene coin a, ichei chabi tereeunni. Caa chauratane que netiin, iicha ichaite, Cana Coaunera Cojoanonaa que nereein. Jana caa chauratane que netiin, jaolecohine jaante, Cana Coaunera Cojoanonaa que tihane bana jaolenereein,” naa Simoon Fedoro raine baihate:

²⁰ “Jiaonriha chuni rai: ‘Acate Mesihasine,’ naain beeichene,” nae aina nerelanaa nichaa-nune rai Jesoso.

*Orichaaine biha Jesosone
(Mr 8.31-9.1; Lc 9.22-27)*

21 Inae mainajiriin cairichaaururichaain Jorioocuru bichauhenaauru, saseredotecuru curuaanaacuru, Moisesa rai Cana Coauneraacha tei rauhi que cacha relaaureraauru, naaonjoainurine catainaane jaunte, Jerosaleeun curichaainne beebeje aina nerelanaa nichaanune rai Jesoso. Sohin jaaoruhane nichata janone cuhane ichanarihanine que aitohane jaunte,

22 jelai Jesoso teteriin: “Jiaonriha nitohaneein chetecuruuhane jerihia Cana Coaunerane Curuaanaa. Nitohaneein chetena nainecuruhi jerihane,” naain caohatiha Fedorone janate, nauriteriin Fedoro coaraain:

23 “Naain cacaje amuura moconajaera. Nechu canu cairichaeranu quete aitohicha. Cana Coaunera jerenohin aina, cha coitucunaa nainihee ii. Cachaauruhacha jerenohinchate coitucuujuueei,” naane baihate:

24 “Chunocoha canu esenetaain, canu aina nerelanaa jerihane, rainuhacha que niicha coacuhi jianeein, itolere necairichanaa abaataain canu sacuhine.

25 Jana canu colane rai nichao ichoteratena jeterminate, rai nichao itajereein. Jana, canu coreniha necairichanaate, rai nichao ichoteratereein.

26 Coatiha chaque nelatihei, itolere niicha jerei, niicha coacui sirihane nihanatiin, nichao itajiha cachane. Inaaonjoaain coretihane niha natiin, nii nichao ichoteratena nainihei cacha.

27 Inae Cojoanonaa que turuhane banane turuha ureeunni esinae rauhijiriin canu- Cana Coaunera Calaochineein cacha caje nejanoanaa nichaaunne, canu Inaca Cana Coaunera necao-

hacha que necaochachaain, rai letonocuru an-jeraauru aina jiniiquiin. Nitohanihane banane, le cachaauruhacha ichai cainareeunni acaau-ruhacha ichai rijinanaain.

²⁸ Cau caa ena nenacaauru tabaaurute oorenereein, itolere curuaanaa neein nihanune coina turuhanu cacha caje nejanoanaa nichaaunne Cojoanonaa coaraane reentiaaojaaain," nae aina nerelanaa nichaanune rai Jesoso.

17

*Nejelauneein necoriha Jesoso jaberocone
(Mr 9.2-13; Lc 9.28-36)*

¹ Nitohaneein atinaaururichaainne bihane baiha, saota janonejeeinte, Fedoro, Saantiaao, Saantiaao ocoala Joaan, naaonjoainuri amaain jelai acaauruhacha aina jataain ucuuneein nenaq ichatane ucuuno que cue Jesoso.

² Inae ecu turuhin jetaote, acaauru acatiha netiin, necoriha Jesoso jaberocone jana, rai nomeri netonai enoto tocohaneein jiquihacohane jana, rai cajione netonai cono tocohaneein jiquihaque.

³ Nitohaneein necoriha nomeri aina rai cajionene jana jetaote, Jesoso rene ecocochin aina ereeuruha Moisesa aina Irihasine jana coara-jeeure.

⁴ Nii jaun jetaote Jesoso rai:

"Curuaanaa, caohatoha cau nihacachene. Ii jereeinene nichatajaain loanari jareeunni, leinjiin ii rai, leinjiin Moisesa rai, leinjiin Irihasi rai, naaonjoaain," nae jetao rai Fedoro.

⁵ Niritiin ereereeca Fedorone jana jetaote, luhecotariin ji quihaquiin acaauru conaacotaa dede sacarine jana jetao: “Caate jataain belaain janijiin quiicha cocoainai Canu Calaohi ne. Rai nere tonorraain neeuche,” naain jetao toni nii dede sacari jana erenaa.

⁶ Niritiin toniha erenaane aonaain jetaote, atane ichoae comoore jataain coasina caaun, nii nichatajaain aina cunacaauru aina nerelanacaauru.

⁷ Nii jana jetaote, acaauru rene nichuuntaain mucunajaain jetao:

“Nimichucuche. Coa casihache,” naa Jesoso acaauru raine jana,

⁸ coaracuruhane jana jetao, inae nenihia chuni ainane jana, jelai acaachanejeein ecu ne Jesoso.

⁹ Inae nii ichatane ucuuno caje jeelaiha fauha cuuruna jaun jetaote: “Jiaonriha chuni rai caa inaraacha coarai beeichene, Cana Coaunera Calaohi cachaneein nejanoanaa nichaaunneohanune caje ichanacaunne reentiaain,” naa aina nerelanacaauru rai Jesosone jana jetaote:

¹⁰ “Chanuna jana chaen: ‘Irihasite jaurihanejeein turuha ureein,’ naaure Cana Coauneraacha tei rauhi que cacha relaaureraauru,” naain jetao Jesoso caje bajaaure aina nerelanacaauru.

¹¹ Nii jaun jetaote: “Esinae rauhijiriin Irihasite ichoaichaniha turuha ureein. Acate itolere ru-cuhereein.

¹² Nena canu inara rai aitoon. Nii Irihasite inae ichoaichaniha turuhelu. Nete, acanihane coitucuelanaala que nocoatijiaain, mainajeriin cairichaurelu. Nii rijijieeinne acaauru bijiu

necairichaa cureeunni Cana Coaunera Calaohi cachaneein nejanoanaa nichaaunne," naa acaauru rai Jesosone jana jetaote,

¹³ Joaan Baotisita que, acaauru rai aitoha Jesusone que nainacure aina nerelanacaauru.

Suujuu cuhane coitucuchuhi siricha canaanai rautaaJesosone

(*Mr 9.14-29; Lc 9.37-43*)

¹⁴ Inae nii cachaauru aina nihacaanune jaan turuuruuhane janate, Jesoso rohan nichuuntaain, nacatiha neseeonraain:

¹⁵ "Curuaanaa, cairichaaajoaain canu calaohi coaraau. Araain saainte mijiaaineein mucuha rai cunaine, usihanauniha natiin comohin, acauhanaau niha natiin naluhe.

¹⁶ Ii aina nerelanacaauru raine niqui teeun, nete rautasihurene," nae rai leinjiin cacha.

¹⁷ Nii janate: "Cha esenetaain, caohachaain suujuu coaranacharaauru cachaauru. Cha carajaneina inara aina neein inara relaain, inara abaantareeun. Cajiha canu rene nii canaanai uhuauche," naain

¹⁸ nii canaanai caje coitucuchuhi sitaa Jesosone rijieeritiinte inae nerautae.

¹⁹ Nii baihane, jelai Jesoso teteriin: "Chanuna jana canacaanu coitucuchuhi sitanaa nainesini-hacaanu," naain Jesoso caje bahaacaanu aina nerelanaa nichaanune janate:

²⁰ "Jataain aasaaeriin esenetaaichene jaunte, rautana nainesineeiche. Esinae rauhijiriin mosa-tasa ucuhe tabaainejeeinijin esenetaaichene jana nihanete, caa ichatane ucuunno rai: 'Caalai caje amuhin, tajiha cunihun,' naaichene amure jelai

caje. Nihei chanerihei inara rai cha, rauhijiriin esenetaaichene.

²¹ Nete laen, catothanei moconajaera letono, cana suri couu neein Cana Coaunera bajaae bajajeein sitanacai ne,” nae aina nerelanaa nichaanune rai Jesoso.

*Caa quete orichaainne be coroata saain Jesoso.
(Mr 9.30-32; Lc 9.43-45)*

²² Inae nii canaanai caje coitucuchuhi sitaane baiha, jiniiquiin Calileea batane que amuhe-muhecaunne janate, aina nerelanaa nichaanune rai: “Cana Coaunera Calaohi cachaneein nejanoanaa nichaaunnete necha aansainein nenacaauru cachaauru bijihu canu tiha cuurureein,

²³ casohin cajaoruhane coina. Nena, nichata janone cuhane ichanareeunni,” naain aina nerelanaa nichaanune rai biha Jesosone jaunne, jataain inaderaacaanu.

*“Coriqui tihana Teenforo rai nii inara relaera,”
naain caje bajaauruhane*

²⁴ Niicha relainichaanune aina jiniquiin Cafer-enaaron turuha Jesosone janate, Fedoro coaraa uure, Teenforo asaae cacha caje coriqui bajaaureraauru. Inae Fedoro rene turuhinte: “Coriqui tihana Teenforo rai nii inara relaera,” naain caje bajaauruhane janate:

²⁵ “Ejeen, coriqui tiha,” naain acaaaru tonorae Fedoro.

Niijanate inae loreri asaae enoha cuhacaanune jana, Fedoro rai: “Tonaai iite Simoon. Charijihuru caje coriqui baaure caa chauratane que nenacaauru cachaauru curuaanaacuru. Rai lauri

cajena. Ainihane, laurine lanaala nenacaauru cajena," naain bajaa Fedoro caje Jesosone janate:

²⁶ "Laurine lanaala nenacaauru cajete bajaaure," naa Fedorone jaunte: "Nitohaneein, acaaaru lauri coretena nainenihane chujian, cana netonai coretena nainerihaaca.

²⁷ Nete nabana chunocoha acaaaru caje ne-naa baijiaera tocohanihacane coataa, caohachae coretichaane. Chajaain taa nemuri cuhane ate co-junihu. Chaen jauriaanejeein dadaera ate raain, rai nujuuaen cuhane coaraainete, cuhane nereein coata caje coriqui. Acaachate nainejereein que canu rai aina ii rai *impuesto* coretichaane. Chaen amaain coretenihun," nae Fedoro rai Jesoso.

18

Charijicha jataain nelateineein ne Cana Coaunera Cojoanonaa que.

(*Mr 9.33-37; Lc 9.46-48*)

¹ Nii rijieeritiinne, Jesoso rohan nichuuntaacoaain: "Charijicha jataain nelateineein ne Cana Coaunera Cojoanonaa que," naain caje bajaa-caanu aina nerelanaa nichaanune.

² Nii jaunte, leinjiin canaanai cotijiaain, canacaanu cataau teein:

³ "Esinae rauhijiriine aitoon. Inara ichao coreein, aiha caa canaanaine rijijieein nena naineneeichene, coatihha Cana Coaunera Cojoanonaa que nena naineriheeicheein.

⁴ Cana Coaunera Cojoanonaa que nelateineein neite, leeochaauru amurijiriin nena coacuelanaala, aiha caa canaanaine rijijieein rai nichao coreein ne.

5 Chunocoha, canu coreniha leinjiin canaanai raerate canu raa aicheein,” nae aina nerelanaa nichaanune rai Jesoso.

*Jataainte alalacarae osa que nesarucuaane
(Mr 9.42-48; Lc 17.1-2)*

6 “Chunocoha, caa ena Canu esenetaeraauru canaanaihunru saruheraniha osa quene, nuluno que ajeri jaberoco tijichaain, cucuana ucuaano jelon joaeraanete caohachae.

7 Jataainte cairichaaajoaaure caa chauratane que nenacaauru cachaauru, enaaicha osa que sarunojoineein neeuruhane jaun. Itolere banate nitohaniha cureein. Nete acaauru amuritoheriin jataain cairichaaajoareein nii osa que acaauru saruhera cacha.

8 Nii jaunte caohachae, ii biji, ii tijia, naaonjoain osa que ii saruhin nihane, molohin jaochine. Nenacaeneein tejian caohachare, ii biji, ii tijia, naaonjoain mauhecaain ichaonaa esine que neeine. Nabana, ii biji, ii tijia, naaonjoain, ii saruhane coreniha, satin ijiabereeo chabana jacanaacharanejeein nenaas usi jana nijiaohine coataa.

9 Jana, ii nota, osa que ii saruhane, rocohin jaa. Nenacaeneein tejian caohachare, leinjiin ii nota aina ichaonaa esine que neeine. Nabana jerane ii nota aina jiniiquiin chabana jacanaachara usi jana nijiaohine coataa.

*Carenero nitaje que cuain relanajaane
(Lc 15.3-7)*

10 Jiaonriha, chunocoha caa canaanaihunru que jaolecohichene. Dedeeu neein itolere bana acaauru beraihuruha Ofa Cana Coaunera rohan

neein rai letonocuru anjeraaurune jaunne inara rai aitoon.

¹¹ Canu- Cana Coaunera Calaohi cachaneein nejanoanaa nichaaunnena, nitajerai nenacaauru ichoterateraanu que turuhin neeun.

¹² Aonacuche. Tana leinjiin cacha, lefashaain niha rai carenerone jana, nitajiha leinjiinne, ichatane ucuunno que nii iscoon choonca iscooni ratiriin,

¹³ nii nitajenaa ariin eruhane, nii iscoon choonca iscoonneein nitajelanaala nenacaauru coroaecane amurijiriin, esinae rauhijiriin niicha eruhi coroaerihane.

¹⁴ Nii rijijieeinte, nii leinjiinejein nitajeeuruha caa canaanaihunrune jerene dedeeu nenaan cana inaca Cana Coaunera.

Chatohaneein nainecure ita que suujua acatecruha Jesocurisito coitucuurerane.

(Lc 17.3)

¹⁵ Chunocoha leinjiin inara caje Jesocurisito coitucuera, baaso ichaain niha chunocoha raine, jelai teein cotijiaain baaso ichaain niha raine coitucuerateein rai raotojoeein ereeine, nii rai irihane jana rai nere tonoraain coitucuhin nihanete, inae jataain raotojoeein neriquicheein jiniiquiin.

¹⁶ Jana ii ere tonoraenihane, leinjiin coroatajaainniji cotijiaain, acaaaru aina jiniiquiin rai ereeuche, ii coroatajanena nainecuruha nii leeochaauru netonaine coina.

¹⁷ Jana, acaaaru ere nihanatiin tonoraenihane, netaojiaain Cana Coaunera coroaeraauru rai beein, acaaaru rai teeute rai ereeuruhine. Nii netaojiaain Cana Coaunera coroaeraauru ere

tonoraenihane, Cana Coaunera coitucuelanaala nenacaauruneein teein, Roma curuaanaa rai cacha cobaraain coriqui bajaaurera rijijieein coaracuche.

¹⁸ Caa chauratane que netiin, inara ichanohite, jerichanejeein dedeeu icharareein. Jana, caa chauratane que netiin jaolecohichene jaante, dede caje jaonojoinereein.

¹⁹ Caa quene inara rai aitoreeunni. Caa chauratane que netiin, ita que jerajejeein neein ita suujua rijijieein coacuhin Cana Coaunera bajaain, cha bajanaa jeriquichenete, inara rai inaraacha bajai tereein canu inaca Cana Coaunera.

²⁰ Chunijiun neeichene jaaunru, Canu coreniha, coroatajaain, nichatajaain, naaonjoaain netaoji-aain neeichenena canu netonai, ecu inara aina nereeunni,” naa Jesosone janate:

²¹ “Curuaanaa, inata saain canejera que casuujuu acatichaaunne caohachae, baaso ichaain niha caraine, caainsi saneeina,” naa Fedorone janate:

²² “‘Coatiha, caainsi saneein,’ naahaun. ‘Caainsichoona saneein caainsinei quene aitoon, ii suujua acateeine coin,’ ” nae Fedoro rai Jesoso.

*Rai fatoroon cachaauru rebe aninoana jereniha
acaauru beraichaneein nenaane*

²³ “Nitohanihane jaunne, naaonjoaa Cana Coaunera Cojoanonaane que inara rai aitoreeunni. Aonacuche. Rebe rucuhena jeriha leinjiin curuaanaa reyne rijijiei nereretanaa quene inara relareeunni.

²⁴ Inae rebe rucuhena nunuhetihane janate, jataain arajiin que rebeeona rai cacha turuaa uure rene.

²⁵ Nete, nenihā cha coretihane jaanne jaun, jitariin bereecuru, rai sinijera, rai rucuheleeuru, naaonjoainuri aina curuaecaain, letononeein neeuruhane coina acaaaru que necoretihane coina aite nii *rey*. Jitaain rai rebe coretihanereein tiaaojoaain satiin jiniiquiin amihaneeuruhane coina.

²⁶ Nii jaunte, nii *rey* acatiha neseeonraain: ‘Curuaanaa, atiin caque ii suujua acateein, canu cohacorihune ii rai jitariin corete,’ naa rai nii cachane jana,

²⁷ cairichaaajoaain coaraane jaun, nii rai rebe aninoaaain que suujua acateein nirijieein jianerate.

²⁸ Nete inae jianiha nii rebeeonajaane jana, caje cuhin rai corihanera que coroatajajeein rebeeona aina ita eruhin, nii rebeeoca quene coreniha mucuhin rai raro tororohin: ‘Caque rebeeoquine jaan coreteeu,’ naa raine janate,

²⁹ nacatiha neseeonraain: ‘Canu que ii suujua acateein, canu cohacune ii rai jitariin corete,’ naa rai nii leeochane saijieein,

³⁰ tonoraelanaala caresero cuhane enoaerate, cuu niha rebe jitaain coretihane reentiaaine coina.

³¹ Nitohaneein, caresero cuhane nii acaaaru leeocha tihane coaraainte, jataain rautaaurenihane jaun, nii acaaaru curuaanaa *rey* rai biha cuure leeochaauru.

³² Nii jaunte, que suujua acateein janihane baiha nihane jaun, cotiharateein: ‘Nechu aansaineein ichaonaa cacha. Nii rebe coreniha rebeeoquine janane, ii que casuujuu acateein, carichaaajoaine jaun ii jianeeunlu carai aitohine

jaun.

³³ Chanuna jana, nii cairichaaajoaain ii coaraain casuujuu acatichaaunne rijijieein, nii ii leeocha que, ii suujua acateneei,’ naain,

³⁴ inae jataain obaecane jaun, caresero cuhane enoaerate nii *rey*, jitaain rebe coretihane reentiaain,” naain nii nereretanaa que canacaanu relaane baihate:

³⁵ “Nitohaneeinte inara casetecareein canu inaca Cana Coaunera, inara suujua aina cutaain inara amute cacha que inara suujua acateein belaineelchene,” naainte aina nerelanaa nichaanune rai beebeje Jesoso.

19

Sinijera joaera quete cacha relae Jesoso.

(*Mr 10.1-12; Lc 16.18*)

¹ Niritiin acaaaru rai irihane baihate, aina nerelanaa nichaanune aina Calileea caje amuhin, Jodea batane que turuhin, nucuhe Jorodaan jera que cue Jesoso.

² Nii janate, arajiin sacuure cachaaaru. Ecute arajiin cunaitenacaauru rautae.

³ Nii janate, nechu cairichaauruhane jaan lera ariha, Jesoso rohan nichuuntaain: “Tonaai. Caohachaana joaereen coreniha rai comasai jaoha cachane,” naauruha Jesoso rai fariseeocuru tabaaurune janate:

⁴ “Tana Cana Coaunera Quiricha inoaensi cuhane laenanohineein nena ereretaain aonaquichene. Jaurihanejeein itolere coaunaane nunuheneeinte, quicha, ene, naaonjoaain coaunaelu Cana Coaunera.

⁵ Nitohaneein acaauru coaaunaainte: ‘Rai fojiaraauru caje amuhinte comasai raain, leinjiin cachaneein nena riijijieein ichaaorureein,’ naalune coitucuhichene.

⁶ Nitohanihane jaunte, lesajeein necoansajiaa cachane, leinjiin ita jaberoco que jaberoconaa riijijieein neeure, rai comasai aina. Niheichu ita caje, Cana Coaunera tenojoihunru batunaa nainihei joaereen cacha,” naain acaauru tonoraa Jesosone janate:

⁷ “Chanuna jana chaen, comasai jaonaa jeresa nihane, rai ita jaaoruhane jaan cocoiricha teein, comasai joaera coina aitelu Moisesa tenojoi rauhi,” naauruhane janate:

⁸ “Niritiinte aitelu Moisesa, nechu aansaineein nere tonorana jereneeichene jaun. Coatiha niqui jauriaanejeein nitohaneein niheilu.

⁹ Nena laen canu inara rai aitoon. Chunocoha, chuni quicha aina ichoaeniha rai comasaine jana, jaohin leeocha ene raanete, nii ene niicha rai coreniha inae osa que nesarue nii quicha,” naa Jesoso fariseeocuru raine janate:

¹⁰ “Nitohanihane jaun chujian, caohacharihei necoasajiaa cachane,” naacaanu aina nerelanaa nichaanune janate:

¹¹ “Coatiha nitohanai coitucunaa nainesihuruhi satiin cachaauru. Acaihanijin coitucuuruhane coina, coitucueratiha Cana Coaunerane jaan curuhachate, nii coitucuujueurureein.

¹² Niha araai lauriin nitohaneein necoansajianaa nainelanaala niha cachane jaanu. Tabaaurute, inae nejanoae nitohaneein necoasajiaurenihane coina. Jana tabaaurute acaauru

cule rocooruha acaauru amute cachaaurune jaun necoansajianaa nainecurene. Jana leeochaaurute raotojoeein Cana Coauneraacha tei amihanenaa que amihaneeuruhane coin aecoansajianaa jerene. Nitohaneein ichaonaa jereraauru, nitohaneein ichaaoruhine,” naain ereereje canacaanu rai Jesoso.

*Canaanainunru rausiaaecasosone
(Mr 10.13-16; Lc 18.15-17)*

¹³ Nii janate, canaanainunru uhaaure Jesoso rene cachaauru, acaauru rai Cana Coaunera ba-jaain, biji que acaauru mucuhin acaauru rausiaecane coinane janane, acaauru que tacaain caohatihacaanu aina nerelanaa nichaanune.

¹⁴ Nii jaunte: “Coa Canu rene turuuruha canaanainunrune caohatihache. Cana Coaunera Cojoanonaate aihuruha caa canaanainunrune rijijieein nenacaauru raineein ne,” naainte,

¹⁵ bijique nii canaanainunru mucuhin rausiaae najaane baiha, jelai caje amuhe Jesoso.

Jesoso ainate ere leinjiin enamanaa coriqui-hona.

(Mr 10.17-31; Lc 18.18-30)

¹⁶ Nii janate, Jesoso rene turuhin: “Cacha relaera, chariji caohacha ichareeun, chariji bana nitajenaachara ichaonaa que ichaohanune coin,” naa leinjiin enamanaa Jesoso raine janate:

¹⁷ “Chariji caohachana Canu caje baaai. Caohachate ne leinjiincha. Nitajenaachara ichaonaa caohacha que ichaonaa jereeine, aitohalu Cana Coaunera rai Rauhine jaan tonoraain ichaao,” naa rai Jesosone janate:

18 “Chariji Rauhina,” naain baajaane janate: “Coa sonajaain jaoha. Jiaonrihachu, ii comasaine lanaala nenaan ene dadaain, asijiauhin, leeochaauru cairichaa casaje que ereein, naaon-joaain neeine.

19 Chaen ii fojiaraauru ere tonoraain, ijiabereeo belaaaine rijijieein, chamute cacha belaain ichaao,’ naa Jesosone janate:

20 “Jitariinne, nii chaitoonjoa tonoraau. Chana nenacaaen carai lanare,” naa Jesoso rai nii enamanaane janate:

21 “Esinae rauhijiriin, chaque lanaelanaala Cana Coaunera aitoonjoa tonorana jereeine, chajaain jitariin nii iicha sirii que necoreteein, cairichaaihuru rai tenihun. Nii banaachate, jelai amuritoeriin nereein iicha latei dedeeu. Nii baiha canu sacuu,”

22 naa rai Jesosone aonaainte, jataain inader-aain cauha cue nii enamanaa, jataain coriquihocane jaun.

23 Nii jaunte, aina nerelanaa nichaanune rai: “Esinae rauhijiriinte caaintate, Cana Coaunera Cojoanonaa que enoha leinjiin coriquihonane.

24 Nacoauneeine aitoreeunni. Charijieeein teeinti leinjiin toro seeonjoan amuritoojoaain nenaan camecho, oco jachu cuhane situnaa nainene. Nii amurijiriin enonaa nainihei leinjiin coriquihona Cana Coaunera Cojoanonaa que,” nae aina nerelanaa nichaanune rai Jesoso.

25 Niritoha Jesosone jaunne, jelai amuritoheriin canacaanu suujua elonaane jaun: “Nitohanihane, chariji jana enohin nichotenaa nainereein,” naacaanu ita raine janate,

26 canacaanu coaariin: “Nihei chuni raajeni-hane enohin nichotenaa nainihei. Nete laen Cana Coaunera jerihane joaenreein cacha enohin nichotenaa naine,” naa canacaanu rai Jesosone janate:

27 “Canacaanune, ii sacuhacaanune coina jitariin canacaanuhacha sirii ratirihacaanulu. Cha jana rarichaanhuhin canacaanu nii coreniha,” naa Fedorone jaunte:

28 “Esinae rauhijiriinte, inae Cana Coaunera cojoanonaa que turuhane bana canu, Cana Coaunera Calaohi cachaneein nejanoanaa nichaaunne itolere cocoainanacaaihuri amurijijiin cocoainanohi nichaaunne jaan rori- *trono* ichoae nelauriaanune banate, inara netonai lechoonca coroatajai cocoainanacai nequichene rori- *trono* ichoae nelauriariquicheein, nii lechoonca coroata lauriin nenacaauru Isaraeli cocoachacuru ichanaa coaraain, ‘Acaauru acaaurute caohacha ichae. Jana acaauru acaaurute baaso ichae,’ naain beein coitucuhin rucuhequichene coina.

29 Chaen techu, canuhacha icharatei ichacuruhane coina, rai bereecuru, naraaichuru, comasai, fojiaraauru, rai natane, naaonjoain ratirichate, lefasha saneein jelai amurijijiin eruurureein. Chaen techu, chabana nitajenaachara nejeein nenaichaonaa que ichaoreein.

30 Chaen techu, caa ena leeochaauru amurijijiin nelaetoha nocoetonacaauru, caa ena chaque nelatihei rijijieein nenacaauru fautaain chaque nelatelanaala nedaaurureein. Jana ena caa leeochaauru fautaain nelatihei rijijieein

nenacaaurute, jataain neliteineein neeurureein,”
naain Fedoro tonorae Jesoso.

20

*Leinjiin ocoana erora- cacha amiharatera riji-
icha Cana Coaunera Cojoanonaane que canacaanu
relaa Jesosone*

¹⁻² Niritoha canacaanu raine baihate noocoana que cacha amiharatiha leinjiin ocoana erorane rijiicha Cana Coaunera Cojoanonaane que canacaanu relae.

Niritiinte: “Leinjiin cacha janohetiin nimichuhin, noocoana jana amihaneeuruha cachaaurune coina ariin, inae cachaauru eruhin, rai noocoana jana le jiichooneineein acaaaru amihaneeo coretihane coina rucujueein, nii cachaauru letoae nii amihanenaa erora.

³ Inae acaaaru letoaane baiha, enoto chujutaelalajeein nacoauneein mituhin cuhin leeochaauru cachaauru arihane janate, najiniha neeure nenaanaja cataaun nelanaaejeein cachaauru.

⁴ Nii jaunte, nii nelanaaejeeunruhane coaraane jaun: ‘chajaain inara netonai amihanenihuche canu ocoana jana. Inara amihaneeon rijijieeine inara coretereeunni,’ naa nii amihanenaa erorane jaun cuure nii cachaauru.

⁵ Nii baihate coaiteen, enoto chujutaain mituhin cachaauru ariin, nii baiha sonaiha mituhin cachaauru ari nii amihanenaa erora.

⁶ Inae nuna macohi ichoae teejiha enotone jana, mituhin nacoauneein cachaauru arihane jana, nenaanaja cataaun neeuropa rai namihaneeo

colane nelanaaejeein cachaaurune jaun, eruna-jaain: ‘Chanuna sonafaajeein amihanelanaala neeiche,’ naain acaauru caje bajaa nii amihane-naa erorane jana:

⁷ ‘Neniha canacaanu rai amihanenaa terane jaunna, amihanenihacaanu,’ naauruhane jaunte: ‘Chajaain aihane inara netonai canu ocoana jana amihanenihuche,’ naain letoanajae nii amihane-naa erora.

⁸ Inae nocohena jerihane janate, rai cachaauru beraicha rai: ‘Chajaain, nii cachaauru cotijiaain, acaauru satononiha turuhin amihanenacaauru que nunuheteein coretenaacu, nii jauriaanejeein nunuheteraauru que satonoteein,’ naa nii amihane-naa erorane janate,

⁹ inae ichoachaniha cuuruha nii satononiha nuna macohi ichoae teejiha enotone jana nunuheteein amihanenacaaurune jana, le cachaauru corete jerichanejeein le jiichooneein, nii coretera.

¹⁰ Nii janate, inae nii ichoachaniha turuhin amihanenacaauru coretihane jaan que turuhane jaun: ‘Nii satononiha turuhin amihanenacaauru amurijiriin jecha, rai namihaneeo core raaurureein,’ naaure. Nete, nii satononiha turunacaauru rijijieein, jerichanejeein le jiicho coreneein raaure acaauru netonai.

¹¹ Nii jaunte, rai namihaneeo core raauruhane ucuuaetoha nejesinajeein nii amihanenaa erora rai:

¹² ‘Caa canacaanu satononiha turunacaaurute, basiinjiincham amihaneeuruhanen sai jieein, canacaanu coreteeine jeeoneein acaauru coreteei, mainajeein amihaneein, enoto ajaanone

maajeein abaantacaanune saijieein,’ naaure.

¹³ Niritocuruha nii amihanenaa erora raine jaunte, leinjiin rai: ‘Coatihana baasoneein ii coretihaante quiicha belaai. Tana canu aina, le janohineein ii coretichaunne coina rucuhequine coitucuhine.

¹⁴ Aihana jaun, nocoia ii amihaneeo core. Cha-jaain amuu. Canune, nii inara satononiha turuhin amihanenacaauru rai, jerichanejeein inara coretichaunne jeeoneein coreteeun,

¹⁵ carai niha rauhi cacoriqui aina quiicha jerei ichacaaunne jaanune jaun. Raunajetocoaaunne jaunna baasoneein canu coaraaite,’ naain nii cacha tonorae nii amihanenaa erora.

¹⁶ Nii rijijieeinte, caa enene ichoaichaniha ne-nacaauru satononiha neeurureein. Jana satononiha nenacaaurute, nunuheneein neeurureein,” nae Jesoso.

Orichaainne biha nacoauneein Jesosone

(*Mr 10.32-34; Lc 18.31-34*)

¹⁷ Inae bero cuhane Jerosaleen nichaae cuujihacaanune janate, nii lechoonca coroatajaain aina nerelanaa nichaanune cotijiaain, jelai canacaanu teteriin:

¹⁸⁻¹⁹ “Inae enate laen Jerosaleeun cuhacache. Ecute, Cana Coaunera Calaohi cachaneein nejanoanaa nichaaunne mucuhin, saseredote curuaanaacuru, chaen Moisesa rai Cana Coauneraacha tei rauhi que cacha relaaureraauru, naaonjoainuri rai canu tiha cuurureein. Chaen techu nejelau atane caje unacaauru cachaauru rai caetecurureein, caque nocoatijiaain, canu faojoaain coroso que canu

teein canu ateinaauruhane coina. Nena nichata janojoin cuhane ichanareeunni,” naain aina nerelanaa nichaanune rai beebeje Jesoso.

*Saantiaao aina Joaan nebaacha bajai
(Mr 10.35-45)*

²⁰ Nii janate, Jesoso rene turuha uhe Sebedeo comasai, rai calaochichuru Joaan, Saantiaao, naaonjoainuri aina. Turuhinte, nii calaochichuru rai atiin chaelai ichaa Jesosone coina nacatiha neseeonriaane jana:

²¹ “Chate jerequicheta,” naain caje bajaa Jesusone janate: “Inae ii Cojoanonaa que turuhane bana, atiin ii raotonu nichajai que nelauriaa leijiinne jana, ii jaabiji nichajai que nelauriamiinch caa leeochara,” naa Jesoso raine janate:

²² “Cha bajaaichene, coatiha coitucuhin bahaheeiche. Necairichanaa abaantarichaaun-nine rijijieeinna necairichanaa abaantana nainequiche,” naain acaauru caje bajaa Jesosone janate: “Abaantana nainichaanu,” naain tonoraauruhane jaun:

²³ “Nii necairichanaa abaantana nainequiche niqui. Nete laen, canu raotonu nichajai que, canu jaabiji nichajai que, naaonjoaain nelauriana naineneeiche, nitohanai rai tihanune coina nenihanune jaun. Banihateein ichaalu Ofane jaancuruhacha raite, tenojoin niha cureein,” nae acaauru rai Jesoso.

²⁴ Nii Jesoso caje bajaa Sebedeo calaochichuru nebane aonaainne, nii coroatajai ita nejeraaur que nejeratihacaanu nii lechooncaain aina nerelanaa nichaanune.

Nii jaunte,

²⁵ canacaanu cotijiaain canacaanu rai: “Inarate rai cachaauru cairichaaeriin, acaaaru amurijiriin niha nocohetiin neeuruha Cana Coaunera coitucuhichuru curuaanaacurune coitucuhiche.

²⁶⁻²⁷ Nete laen, inara nitohaneein nena a naineneeiche. Aihana jaun, chunocoha inara jana leeoichaauru amurijiriin nena coaacane, leeoichaauru coroatajanemiin. Jana, chunocoha leeoichaauru amurijiriin nena coaacane, rai letononeein neeine.

²⁸ Nitohaneein nihanune coinane cau turuhin neeun canu- Cana Coaunera Calaohi cachaneein nejanoanaa nichaanune. Coatiha carai quiicha latei teein niha cachane coina cau turuhaaun. Canune, cachaauru rai nelatichaaunne coina letononeein neeun. Canune, osa caje nichotihia arajii cachaaurune coina ohin cacoichana que coretiha cureeunni,” nae aina nerelanaa nichaanune rai Jesoso.

Coroatajai maosa rautaa Jesosone

(*Mr 10.46-52; Lc 18.35-43*)

²⁹ Inae Jerico caje amuhacaanune janate, Jesoso caajie uure arajii cachaauru.

³⁰ Nii janate, bero cuhane babaecooruha coroatajai maosacurune jaun, acaaaru rohan situha cuha Jesosone aonaain: “Canacaanu Curuaanaa Rabiri nefoerateneein nena, tana cairichaaajoaain canacaanu coaraaine,” naauruha ehequine janate,

³¹ aitocuruhane caohateeuruha cachaaurune jana, que rutaain tonijiaain ehehequiin: “Canacaanu Curuaanaa Rabiri nefoerateneein nena, cairichaaajoaain canacaanu coaraau,” naauru janate ecu inacuhin acaaaru cotijiaain:

³² “Chatohanai inara rai ichacaaunne jeriquiche,” naain acaauru caje bajaa Jesosone janate:

³³ “Conoha canacaanu notanena jerichaanura Curuaanaa,” naauru jana,

³⁴ cairichaaajoaain acaauru coaraane jaun, biji que acaauru nota dadaa Jesosone rijieeritiin inae conoha acaauru notane jaun, Jesoso caajie uure, nii coroatajai maosacuru.

21

Jerosaleen turuha Jesosone

(*Mr 11.1-11; Lc 19.28-40; Jn 12.12-19*)

¹ Inae Jerosaleen catainajeein leinjii nese Betafajee ichatane ucuunno- Oliboneein acaauruhacha curuaatei rohan turuhacaanune janate, aina nerelanaa nichaanune caje coroatajai letoae Jesoso.

² “Chajaain taa niita canaacha coarajei neseu cunichuche. Ecute, cositenojoineein leinjiin bene, leinjiin curuaanaa narejeen, naaonjoaain borocuru eruriquicheein. Chaen inae eruna-jaachene, carai cajiha acaauru cosichuru rututaain uhanaajaauche.

³ Inae uhanaajaichene jana, chunocoa inara caje bajaane: ‘Latenaaca curuaanaane jaunna amanajaacaanu. Enate jelaiha acaauru cainaratereein,’ naain uhanaajaauche,” naain letoanajae Jesoso.

⁴⁻⁵ Nitohanihalu:
“Sioon cocoaichacuru,
joaenreen rijijieein nena inara Rey
coaracuche.

Acate, inara rene turuha uhe
 leinjiin boro laaojoiri ichoae.
 Cabario ichoae amuuruha
 leeochaauru curuaanaacurune saijeeinte,
 leinjiin boro
 anajiin tabai ruhacaera
 narejeen laojoiri ichoae uhe,”
 naain beein laenaalu *profeta* inoaensine
 nainaane coina ailu.

⁶ Niritiin acaauru letoaa Jesosone jaun cuuruha
 nii coroatajai aina nerelanaa nichaanune caje
 cunacaaurune janate, nii beein letoanajaane riji-
 jieein,

⁷ rai narejeen aina boro eruhin, nichoae cajione
 maritaain amanajaain, Jesoso rai tenajaunruha
 aina nerelanacaaurune jana, nichoae lautoroaain
 cue Jesoso.

⁸ Nii janate, najiniha neeure arajiin cachaauru.
 Acaauru tabaaurute, bero cuhane acaauru ca-
 jione maririjiacoaaure. Jana tabaaurute, ajaena
 raain, najiniha meriaacoaaure.

⁹ Jana, ichoachaniha cunacaaurute, acaauru
 caajie cunacaauru aina coroajeein eheeheequiin:

“Rey Rabiri ichoala coroaaecuruhine.

Raotojoeein turuhine acaneein nenaarrijijieein
 Cana Curuaanaa- Cana Coaunera letono.

Dedeeune maajjeein Cana Curuaanaa coroaae-
 curuhine,” naaure Jesoso que.

¹⁰ Nii Jerosaleen turuha Jesosone coaraainte,
 satiin nii nese sacutaain que suujua rerohecaain
 cajihaneei amuhemujueein: “Cha cajena unaa ne
 caa cacha,” naain ita caje bajaain:

11 “Caate, Cana Coaunera ere bera *profeta* Jesoso ne, taolu Calileea nena Nasarete cocoaicha,” naaure cachaauru.

Teenforo asajai caje cachaauru sitaa Jesosone (Mr 11.15-19; Lc 19.45-48; Jn 2.13-22)

12 Nii jana inae Teenforo asaae enoha cuhane jana, najiniha neeuruha necoretenacaauru aina acaaaru caje coreteraaurune jaunte, jelai caje sitanajae Jesoso. Coriqui coreeuruha cachaauru raina jaan rori lacohitiin, ecu serori que necoretiha nenacaauru rorine maajeein lacohitiin:

13 “Cana Coaunera Quiricha cuhanete: ‘Canu lorerite, acaihaniji Canu bajaaebajaecuruuhane jaan coloherineein nereein,’ naain ne laenanohineein. Nete, inara leinjiin asijiaunananaja coloherineein teeiche,” naain acaaaru cotai Jesoso.

14 Nii Teenforo asae, rohan turuhacoaauruha maosacuru, bacosacuru, naaonjoainurine janate, acaaaru rautae Jesoso.

15 Nii cojolanaacojoai ichaain acaaaru notaaca Jesosone jana ecu neein coarajeeuruha saseredote curuaanaacuru aina Moisesa rai Cana Coauneraacha tei rauhi que cacha relaaureraauru, naaonjoainurine janate: “Coroaaenojoinemiin *rey Rabiri ichoala*,” naain cojiorichuruha canaanainunru Teenforo asaaene aonaain obajeeinte:

16 “Toon ii rai ereeuruuhane aonaaina,” naain baaure.

Nii jaunte: “Aihanu. Aonacaaun. Tana: ‘Canaanainunru, sisinacaaurune maajeein ii coroaecuruuhane coinata, caohacha ichaai,’ naain

laenanohineein nenaar reretaaichene,” naain acaaaru tonorae Jesoso.

¹⁷ Niritoha acaaaru raine baihate, ecu acaaaru ratiriin, nii nese caje amuhin, Betaniau cue Jesoso, ecu sinihane coina.

*Inacaenihane coina iquera cojiotaa Jesosone
(Mr 11.12-14, 20-26)*

¹⁸ Inae janone jelaiha neseeu cuhane jana mijitothane jaunte,

¹⁹ bero auhaniha niha leinjiin *iquerane* jaun nichuuntaain coarae Jesoso, inaacane lihane coina niqui. Nete inacaenihane jaun:

“Inae chabana coaiteen inaariheeini,” naa Jesosone rijieeritiin ohe nii *iquera*.

²⁰ Nii coaraainte: “Chasiinna luhecotariin ohe,” naauruha cojoelatiin aina nerelanaa nichaanune tabaaurune janate:

²¹ “Esinae rauhijiriin esenetaain, icharichaain Cana Coaunerane esenetaain neeichene, caa ena *iquera* ichacaaunne amurijiriinte naineriquiche. Caa ichatane rai: ‘Caalai caje amuhin, cucuana cuhane cunihun,’ naaichene, nii aitocoichene rijieeritiin cucuana cuhane cure nii ichatane.

²² Nii rijijieein techu, Cana Coaunera caje cha bajaaiche, terichaainne esenetaainne, inara rai inaraacha bajai tereein Cana Coaunera,” nae aina nerelanaa nichaanune rai Jesoso.

*Cocoainaai letono niha Jesosone
(Mr 11.27-33; Lc 20.1-8)*

²³ Nii baiha Teenforo asae enohin cachaaaru relaa niha Jesosone janate, rene turuhin: “Chatohanai Cocoainanacai neeinna neei ii, catohanai ichaaine coina. Chana cocoainanacai

neein ii cocoainae,” naain Jesoso caje bajaaaruha saseredote curuaanaacuru aina Joriocuru bichauhenaurune janate:

²⁴⁻²⁵ “Canuhetonaina inara caje bajanaa jereeun. Cha Joaan letoaelu cacha cojuncatihane coina. Cana Coaunerana letoaalu, ainihane cachaauru letononeeinna aihalu. Canu rai beeichenena, canuhetonai inara rai canu cocoainaera bereeunni,” naain acaauru tonoraa Jesosone janate:

“ ‘Cana Coaunerate letoaelu,’ naacachenete: ‘Chanuna jana esenetaeneeichelu,’ nareein cana rai.

²⁶ Niheichu ‘Cachaaurute letoaelu,’ nanaa nainihaacache acaauru coasiha. Satin cachaauru, Cana Coaunera, Joaan letoaalune esenetaauruhalune jaun,” naaure nejesinajeein ita rai. Niritiin ita rerohecaainte:

²⁷ “Coitucuhaacaanu,” naauruha Jesoso raina jaunte acaaentonai:

“Aihana jaun chujian canuhetonai, inara rai canu cocoainaera benaa nainihaaun,” naain acaauru tonorae Jesoso.

Coroatajai calaochichuru letoaa leinjiin cachane rijijiei que acaauru relaa Jesosone

²⁸ Nii baihate acaauru rai:

“Tonaquiche jana inara caa erenaa que. Leinjiin cachate coroatajaain neeuruha rai calaochichurune jana, leinjiin rai: ‘Canu calaohi, enene canu ocoana jana amihanenihu,’ naa rai inacane jana:

²⁹ ‘Coatiha curinaaunni’ naain cunaa jereni-hane baiha cue nii leinjiin rai calaohi.

³⁰ Nii baiha coaiteen, nii rai calaohi coroataja letoaane janate: ‘Saan ahi. Inae curichaaunnicha ofa,’ naane saijieein cuene.

³¹ Chariji inara rai, rai inaca ere tonoraain niicha icharatei ichae,” naain canacaanu caje bajaa Jesosone janate:

“Nii ichoaichaniha rai inaca letoanojinte, inacaacha icharatei ichaain inaca ere tonorae,” naauru janate:

“Nii rijijiiein techu, inara aineechene jana, Cana Coaunera Cojoanonaa que niha cuurureein Roma curuaanaa rai cachaauru cobaraain coriqui baaaurera aina ene cojaoelorohecuru.

³² Caohachaain rai nichao coreein neuruha cachaaurune coina, relanajaa uhalu Joanne jana, inara esenetaeneeichelune jana, Roma curuaanaa rai cachaauru cobaraain coriqui baaaureraauru aina, nii ene cojaoelorohecuru esenetaauruhalune jaunte, Cana Coaunera Cojoanonaa que neurureein. Jana inara, coaraquichene saijieein esenetaain inara ichao coreneeichene jaun, coatiha Cana Coaunera Cojoanonaa que nerihheeiccheein,” nae saseredotecuru aina Jorioocuru bichauhenaaaru rai Jesoso.

Nechu aansaineein ichaonacaauru amihane-nacaauru que cachaauru relaa Jesosone

(Mr 12.1-12; Lc 20.9-19)

³³ “Caa leeoche erenaa aonacuche. Leinjiin cachat oba coocana sirihane jaun, bino ichaane jaanu ichaain corihateein, nii baiha ucuuneein rori jae nichaoe netiin amihanenacaauru beriahane coina. Inae satiin besautiaane baihate, rai

leruhin teeuruuhane coina que amihanenaa inaaureraaaru cachaauru rai teein ratiriin amue.

³⁴ Inae tainacaane janate, leruhin rai niicha teeuruheni teeuruha raine coina letonocuru letoaa nii ocoana erorane jana, cuhin bajaauruha nii letonocurune jana,

³⁵ tabaauru letonocuru faojoaain, tabaauru atinaain, ajeri que tabaauru bodoosiin, naaonjoainchuru sonajaare.

³⁶ Nii jaunte, nitohaneein rai letonocuru letoaane jana, sonajaauruhane jaun, coaiteen jelai amuritoheriin, enacoauneein letonocuru letoaane jana, jerichanejeein sonajaunre nii amihanenacaauru.

³⁷ Nii letonocuru letoaane naineein sonajatocruhane jaunte, satononiha rai calaohi letoae: ‘Canu calaohi nihane jaunte laen que suujua acatecurureein,’ naain niqui letoae.

³⁸⁻³⁹ Nete inae cuha nii rai calaohine jana coaraain ecu ita rai: ‘Caate laen, nerora calaohi nihane jaun, jitariin cana caje caa rai inaca raineein nenaaraa cureein satiin aina nedaaane coina. Coanete sohin jaohacache. Nii banate, satiin cana raineein nedareein nii raineein neenu,’ naain nii rijia caje mitaain sohin jaaore nii amihanenacaauru.

⁴⁰ Aihana jaun, inae turuhane bana, cha ichareein acaaaru aina, nii amihanenaa erora,” naain bajaa acaaaru caje Jesosone janate:

⁴¹ “Nii nechu aansaineein ichaonacaauru cachaauru sohinte jaoreein, cairichhaaojoaain acaaaru coraelanaala. Sohin jaonajaainte, leeochaauru rai nii amihanenaa tiha cureein,

inae ecu tihane bana rai leruhin niicha taojiaauri
teeuruuhane coina," naauru janate:

42 "Tana, Cana Coaunera Quiricha cuhane:
'Nii ajeri, loreri ichacuruuhane jaanu que nena
jaolecooruhane jaan que temurateeinte
loreri jaaure nii loreri icharaaaru.
Niine cojoelatohacaanu,
nitohaneein ichaa Cana Coaunerane jaun,'
naain laenanoohineein nihane reretaain
aonaquichene.

43 Nitohanihane jaunna inara rai aitoon, rai Co-
joanonaa que neeichene coina tihalune saijieein
nii inara rai niicha teilu ruluhin, janijiin niicha
ranojoinunru Cojoanonaanu que terichaain Cana
Coaunerane jaun.

44 Jana canu nii ajeri nichaaunne ichoae
comoite raajenihane chalutoroaain nedareein.
Jana, canu nii ajerineein chunocoha ichoae
comohanunete ajane neein nedareein," naain
raajenihane neque aite Jesoso.

45-46 Niritiin acaaaru que aitoha Jesosone que
nainacuruuhane jaunte, Jesoso mucueratena jere-
curuhane saijieein, ichana naineurene, satiin
cachaauru coasiha nii saseredote curuaanaacuru
aina Joriocuru bichauhenaaaru, satiin cachaauru
Cana Coaunera letono *profeta* niha Jesosone es-
enetaauruhane jaun.

22

*Leinjiin rey calaohi nisirihatihane quete cacha
relae Jesoso.
(Lc 14.15-24)*

¹⁻² Nitohaneeinte coaiteen acaaaru rai nereretanaa rijijie que cuain ereerejeein:

“Leinjiin *rey*, nisirihatiha rai calaochine coina beseta ichaane jaunte niqui,

³ rai letonocuru letoae, nii cotihanohichuru cotihacuruhane coina. Nete tonoraelanaala, nii beseta que turunaa jecurene.

⁴ Nii turunaa jecurenihan jaunte, enacoauneein rai letonocuru leeochaauru letoae: ‘Inae jatoroainjete ne lenone. Coerenetonanaain nenacaaru nirihiujete soerate. Chajaain beseta bitoaa uucheje,’ naain cotihanaacuruhane janate,

⁵⁻⁶ tonorana jerelanaala noocoana jana cue leinjiin. Jana leeochate, rai rucuhele que necoretiha cue. Jana leeochaaurute, nii *rey* letonocuru mucuhin atinanajaain sonajaure.

⁷ Nii corenihate jataain obajeein, rai soondarooru letoae acaaaru *rey*, nii rai letonocuru sohin jaaoreraauru sohin jaohin, acaaaru nese mocooruhane coina.

⁸ Inae nitohaneein turunaa jecureniha niicha cotiharateeurne jaunte, ‘Satiinte niqui inae jatoroaain ne, caa nisirihatenaas beseta. Nete nelatecurenihane jaun turunaa nainecurene nii jauriaanejeein cotihanohichuru.

⁹ Aihana jaun, chajaain nese cataun situnacaaru berooru cuhane cuhecujeelin, inaraacha erui cachaaaru cotihacuchete, caa nisirihatenaas beseta bitoaa uuruhine,’ naain rai letonocuru letoae nii *rey*.

¹⁰ Nii jaunte, nese cataun situnacaaru berooru cuhane cuhin, aansaineein ichaonacaaru,

cachaauru caohachaain suuja coaaraauru, naaonjoainurine majeein cotihacuruuhane jaun, cacha que memoe loreri asajai.

¹¹ Inae satiin nii *reycha* tei cajione jiaain neeu-ruha cotihanoichurune jana enohin coaraa *rey* janate, ecu ne leinjiin cacha *reycha* tei nisiriha-teeuruhane jaan cocoajione jiaelanaala nena.

¹² Nii cacha raite: ‘Chasiina nisiriatenaa cocoajione satiin rai canuhacha tei jiaeralanaala cau enohite quiicha belaai,’ naa rai nii *rey* jana, ecu inauheneeicha neein aonaje nii cacha.

¹³ Niritiinte lenonecuruha cachaaurune jana coaaraneein nenacaauru rai: ‘Caa cacha biji aina, rai tijia ichojoaain airiniha nocohenaanau jaachete, ecu neein chanaaine,’ nae nii *rey*.

¹⁴ Arajiite niqui cotihanohi ne; nete coroata-jaaecure janijiin ranojoinunri. Nii rijiicha Cana Coaunera Cojoanonaa,” naain que jaolequiin ne-nacaauru que cuaain ecu nenacaauru cachaauru rai ereereje Jesoso.

*Roma curuaanaa rai coriqui bajaaurera aina
iriha Jesosone*

(Mr 12.13-17; Lc 20.20-26)

¹⁵ Niritiin acaaaru que aitoha Jesosone que nainacuruuhane jaunte, jelai caje amuhin Jesoso coulurujeeuruuhane jaanu leranu arihure ita su-juua tacaaain fariseecuru. Chaelai que aitocu-ruhane jana, baasoneein acaaaru tonoraa Je-sosone colurujeeuruuhane coin.

¹⁶ Nitohaneein coacuhinte, acaaaru ere tonoraeraauru, chaen Erodesi ere tonoraeraauru, naaonjoainuri letoaaure Jesoso

rene, coulurujueuruuhane jaan lera ariha coritaauruhane coina. Nii jaunte rene turuhin:

“Cacha relaera, iite iiue tonaaain iriha cachane tonoraelanaala, esinae rauhijiriin aitiin jeriha Cana Coaunerane rijijieein ichaoha cachane coina relaai, rai suujua caje rocohin cacha relaauruha leeoichaaurune rijijielanaala. Chaen nechu inanacaa cacha ichaone caje coaraain coulurujueneeine coitucuhacaanu.

¹⁷ Nii jaunna, canacaanu rai beeine jerichaanu. Caohachaana Romanocuru curuaanaacuru curuaanaa- enferadoroacha bajaeratenojoi coriqui *impoesto* tihacachene,” naain bajaaure Jesoso caje.

¹⁸ Nete, nechu cairichanaa coacuhin letononeein aitocuruuhane que nainaana jaun:

“Casajenetiin cacha caohacha niha nocoetonacaauru, chanuna baasoneein cacairichaa canu coritana coaaquiche.

¹⁹ Canu rai, nii enferadoro rai inaraacha tei coriqui uhaauchena coarae,” naa Jesosone jaun, rai coata caje nena coriqui denario teeuruuhane jaun coaraainte:

²⁰ “Chariji coujunaca cau caa ne, rai curuaa aina laenanohineein,” naain acaaaru caje bajaa Jesosone jana:

²¹⁻²² “Caate enferadoro coujunacane,” naain tonoraauruhane jaunte:

“Aihana jaun chujian, nii enferadoro raineein nena teeuche enferadoro rai. Jana, nii Cana Coaunera raineein nena teeuche Cana Coaunera rai,” naa acaaaru rai Jesosone jaunte inauhenee-icha cojoelatiin ecu Jesoso ratiriin amuure.

*Oha cachane baiha ichanaa cachane bajaau-ruhane
(Mr 12.18-27; Lc 20.27-40)*

23 Nii bananeeinte, Jesoso coaraa uure sadoseeocuru tabaauru, oha cachane baiha nacoauneein ichanaane esenetaaurenihane jaun, bajaauruhane coinia. Nitohaneein uhinte:

24 “Cacha relaera, Moisesate canacaanu rai aitelu, chunocoha leinjiiniji canaanai sirilanaala rai comasai ratiriin ohane, nii onaa ocoala nii rai ninana autana raa rai comasaineein ne, nii onaa bereeneein teein, nii autana bereetihane coinia.

25 Nii janate, cau canacaanu aina neeurelu caainsineein ita nejera nejesinaneein cachaauru. Nii acaauru inanate, leinjiiniji rai comasai aina canaanai sirilanaala ohe. Nete leinjiiniji canaanai sirilanaala ohane jaun, rai nocoala rai, nii rai nautana teein ratiri.

26-27 Nete jerichanejeein canaanai sirilanaala oha acaaentonaine jaun, que jaurii nocoala rai nii nautana teein ratiri. Nirijieein cuaajeeinte satiin ooruha nii ita nejera nejesinaaurune jana, ohe nii ene netonai.

28 Aihana jaun, inae nacoauneein o caje ichanaa cachane bana, chariji comasaineein nereein nii ene, satiin ita nejeraauru comasaineein nihalune jaun,” naain Jesoso caje bajaauruhane jaunte:

29 “Cana Coaunera Quiricha inoaensi reretaain niicha ichana nainei coitucueneeichene jaunte, cha coitucueneeichene jaun aitocoiche.

30 Inae ohane caje ichanaa cachane, ene, quicha, naaonjoainuri ita que nesinijerateein neeururinaain, inae Cana Coaunera letono anjera

dedeeu nenacaauru rijijieein neeururichaaine jaun.

³¹ Tana o caje ichanacuruha onacaaurune que, raaje nujuae caje:

³² ‘Canune, Abaraau, Isaca, Jacobo, naaon-joainuri Coauneraneeun. Aihana jaun, coatiha onacaauru Coauneranihaaun. Canune ichao-hin nenacaauru coauneraneeun.’ naain aitohalu Cana Coaunerane reretaain coitucuhichene,” nae acaaaru rai Jesoso.

³³ Niritiin sadoseeocuru relaa Jesosone jaunte, cojoelatiin aonajeeure cachaauru.

*Jataain leeochaauru amuritoeriin neliteein
tenojoji Rauhi*

(*Mr 12.28-34*)

³⁴ Nitohaneein acaaaru relaa Jesosone jana, inauheneeicha aonajeeuruha sadoseeocurune coitucuhinte, ita taojiaure fariseeocuru.

³⁵⁻³⁶ Nitohaneeinte, leinjiin acaaaru caje Cana Coaunera rai rauhi que cacha relaeraneein nena fariseeo, Jesoso rai:

“Cacha relaera, chariji rauhi cana ichao rai leeochaauru amuritoeriin jataain neliteineein tenojoin ne,” naain nechu coulurijiane jaan ler-anu ariha, Jesoso caje bajaane janate:

³⁷ “Ii Curuaanaa Cana Coaunera belaihu, ii coichana, ii suujua, ii suujue, iicha coacui, naaon-joain aina cuaritaain.

³⁸ Caritiinte jataain jauriaanejeein cana rai neliteineein nena rauhi beratelu cana rai Cana Coaunera.

39 Nii que jauriineein tenojoite, jerichaneto-joeein: ‘Chamute catcha belaain coaraau, ichaa-jenihane ijiabereeo belaaine rijitojoeein,’ nae.

40 Caa coroatajai rauhite, jataain neliteein cana ichao rai tenojoi ne. Acatechu nii Moisesa aitoon-joa rauhichuru cana relaauruha *profetacurune* jaan rauhi temuraneein ne,” nae fariseeocuru rai Jesoso.

Cha caje nefoeratena ne Curisito Mesihasi.

(*Mr 12.35-37; Lc 20.41-44*)

41 Nitohaneein jaiti netaojiaain ita aina neeu-ruha fariseeocurune janate:

42 “Tonaquiche inara Curisito Mesihasi que. Cha caje nefoeratena neeicha ne,” naain acaaaru caje bajaa Jesosone janate: “Rabiri caje nefoeratenaaneeinte ne Curisito Mesihasi,” naain tonoraauruha fariseeocurune janate:

43 “Chasiina jana nitohanihane, que aitoroatiha Cana Coaunera Suujuene jaun: ‘Canu Curuaanaa,’ naelu Rabiri, Curisito Mesihasi que. Chaen techu:

44 ‘Canu Curuaanaa raite:

“Cau carohan,
caraotonu nichajai que nelauriaau,
ii que nejeratenacaauru amuritiin
ii tijia asaae tenajaanune reentiaaincha,” nae
Cana Coaunera,’
naain belu Rabiri.

45-46 Aihana jaun, chasiina Rabiri caje nefoeratena nere Curisito Mesihasi: ‘Canu Curuaanaa,’ naalu rai Rabiri natiiin,” naa acaaaru rai Jesosone janate, le erenaanejeeiniji tonoraurenihane jaun, inae nii caje coauneein, caje cha bajaranaa jerecurene fariseeocuru.

23

*Fariseeocuru aina, Cana Coaunera rai rauhi que
cacha relaaurera ichao biha Jesosone
(Mr 12.38-40; Lc 11.37-54; 20.45-47)*

¹ Nii baihate, ecu nenacaauru cachaauru, chaen aina nerelanaa nichaanune, naaonjoainichaanune rai:

² “Cana Coaunera rai rauhi que cacha relaaurera aina fariseeocurute, aitoha nii rauhine jaan belanaala joaenreen cuaain cachaauru relaaure.

³ Atiin acaauru ere tonoraain acaauru aitoonjoa ichacuche. Nete laen caohachaene chaachacuruhane rijijieein cha ichaquichene, tonaain erreeuruhanne nihanatiin, enaacha leeochaneein chaachacuruhane jaun.

⁴ Nitohaneeinte, nii chabana nitohanei ichaonaa que ichaonaa nainenihia cachane saijieein, cachaauru rai caaintati ichaonaa teeure, nii acaauru nihanatiin nitohanei ichaonaa que ichaonaa naineralanaala.

⁵ Nechu caohacha ichaa nocoretocuruhane coaracuruha cachaaurune coinat, nitohaneein neeure. Nii jaunte, rai naurichuru, rai bijihuru cuhane, naaonjoaain Moisesa rai Cana Coauneraacha tenojoin rauhi laenanohineein nenaamaaauruhane rautatoore. Chaen techu jataain nelatiha nocoretocuruhane jaan coujunacanu que, cajione ererianohineein nenaajiainne maajeein aihure.

⁶ Nii rijijieein techu niha lenonena jaaunru rori caohachaauru janijiin ichoae nelauriaain lenoneein, sinacoca asaene maajeein enooruhane, rori caohachaauru janijiin nichoae nelauriaare.

⁷ Nitohaneeuruuhane jaunte, bero cuhane acaaaru que tacaain, acaaaru que suujua acateein iriha cachaurune jereein: ‘Cacha relaera,’ naa acaaaru rai cachane jereeinchuru aihure.

⁸ Nete laen inara: ‘Canu relaera,’ naain inara rai iriha cachane jereein nena naineneeiche, satin inara ita nejeraneein neeichene jaun, leinjiinchu niha inara Relaerane jaun.

⁹ Niheichu nainiheeiche chuni rai: ‘Canu inaca,’ naain erenaa nainiheeiche, leinjiinchu niha inara Inaca dedeeune jaun.

¹⁰ Niheichu nainiheeiche: ‘Canu curuaanaa,’ naa inara rai cachane jereein neeichene, leinjiin Curisito nichaaunne inara Curuaanaa neein nihanune jaun.

¹¹ Nitohanihane jaun, leeochaauru amuritoheriin nena coaaucha chunocoha inara janane, cha lateein neuruha leeochaaurune, acaaaru coroatajanemiin.

¹² Nitohaneein leeochaauru amurijiriin nena jerenacaaurute leeochaauru fautaain tenojoinereein. Jana leeochaauru fautaain neite, leeochaauru amuritoheriin tenojoinereein.

¹³ Coaraain nainacuche Cana Coaunera rai rauhi que cacha relaaureraauru aina fariseecuru. Inarate Cana Coaunera Cojoanonaa que nena jerecuruha leeochaaurune caohateraneein neeiche. Inara netonai que ichaonaa naineneeichene jaunte, que ichaaoruha leeochaaurune caohateraneein neeiche.

¹⁴ Coaraain nainacuche Cana Coaunera rai rauhi que cacha relaaurera aina fariseecuru, autanaauru loreri nihanatiin ruluhin

neeichene jaun. Nitohaneein ichaochichene aninoaeraneeite, Cana Coaunera bajaaichene carajaain bajaaiche. Nitohaneein neeichene jaunte, jataain caseteco coaraa curiquicheein inara.

¹⁵ Coaraain nainacuche Cana Coaunera rai rauhi que cacha relaaureraaru aina fariseeocuru. Inarate chauratane sacuritaain cucuana cuhaneeuru amuhemujeein cachaauru ariiriquiche, nechu jataain Cana Coaunera esenetaera niha nocoetiin relanajaainchene, coroata saain inara amurijiriin moconajaera cachaneein neeuruhane coina.

¹⁶ Coaraain nainacuche inara maosa rijijieein nenacaauru cachaauru relaeraneein nenacaauru. Inarate chunocoha, Teenforo coreniha cha ichaane coina aitohane sainejeein nii naitonjoa ichaeniha cachane, cha ujuahoneein nenihane que aitocoiche. Nete laen Teenforo corujele oro coreniha chaachaain nihane coina aitohane jana, chatohanai ichaain nenihane cocoaeraane que aitocoiche.

¹⁷ Aaso aina maosa rijijieein nenacaauru cachaauru. Cha jataain inara rai nelateein nenaane orona. Tana nii Teenforo coreniha que banijiaineein niha nii orone jaun, jataain nelateeineein nihane coitucuhichene.

¹⁸ Chaen techu: Chunocoha, Cana Coaunera que banijiai lenonecuru mocohichene jaan rori- *altar* coreniha cha ichaane coina aitohane sainejeein ichaenihane, cha ujuahoneein nenihane que aitocoiche. Nete laen, nii rori- Cana Coaunera que banijiai inih mocohichene jaan- *altar* ichoae ne-naa coreniha cha ichaa cachane coina aitocoich-

ene, esinae rauhijiriin nohanelanaala ichaane
coina aitocoiche.

¹⁹ Maosa rijijieein nenacaauru cachaaaru.
Cha jataain inara rai neliteineein ne. Nii Cana
Coaunera que banihateein tenojoin inihona,
ainihane rorina. Tana nii rori coreniha Cana
Coaunera que banijiaineein niha nii inihone
coitucuhichene.

²⁰ Aihane jaun nii rori coreniha chaachaain ni-
hane coina aitoha chunine, nii roriicha coreniha
coatiha icharinaain, nii nichoae nena coreni-
hane maajeeinte ichareein.

²¹ Jana Teenforo coreniha chaachaain nihane
coina aitohane, coatiha Teenforo corenihacha
ichaane coina aitorinaain, Cana Coaunera quene
maajeeinte aitoreein ecu nihane jaun.

²² Jana dede coreniha chaachaain nihane coina
aitoha chuninete, Cana Coaunera nelaurianaja-
neein niha dedene jaun, Cana Coaunera quene
maajeein aitoreein.

²³ Coaraain nainacuche fariseeocuru aina Cana
Coaunera rai rauhi que cacha relaureraauru,
inaraacha ichai coitucuhin ichoaeneeichene jaun.
Caohacha ichaa nocoetiinte niqui jataain ansi-
jiin laaojori niha natin Cana Coaunera rai tee-
iche. Nete jataain nelitei Cana Coaunera rai rauhi
tonoraain neneeiche. ‘Caohacha nejesinaacha
ichaain, baaso coacuelanaala neein, cairichaa-
joaain leeochaauru coaraain, Cana Coaunera ere
tonoraain aca jerihane rijijieein que asiin cha
ichaelanaala neeuche,’ naa Cana Coaunera rai
rauhine sainejeein tonoraeneeiche. Nii leeocha
janelanaala nii rauhi aitoonjoa ichaquichenete
caohachae.

24 Inarate, maosa rijijieein nenacaauru cachaauru relaeraneein neeiche. Jataain ansijin laaojoiriniha natiinte niqui tonoraain niha cachane jereein neeiche. Nete jataain banejelanaala baaso ichaain neeichene coaraain coitucunaa naineneeiche.

25 Coaraain nainacuche Cana Coaunera rai rauhi que cacha relaaureraauru aina fariseeocuru. Inara cacha coritaera nequichenete, acau cohichene jaan janoriicha culeequiche. Nete cuhanai culejeneeichene jaun jataain calanine cuhanai. Nii rijijicha inara suujua cuhanai, inara suujua cuhane coacuhin baasoneein cacha basijiaauhin, inara amute cacha caje cha chunaain, naaonjoaainchene jaun.

26 Cha coitucuelanaala nitajenaa neein nenacaauru fariseeocuru. Jauriaanejeein nii acau cohichene jaan janori culeequichene rijijieein, nii inara suujua cuhanai itolere baaso ichaquichene jaan caaun calanineein niha inara suujua cuhanaine jaan jaaochete, somaraain neeiche.

27 Coaraain nainacuche Cana Coaunera rai rauhi que cacha relaeracuru aina fariseeocuru, aiha atanebana airichai nichajaine rijijieein somaraain, jana asaaun itolere onaa bucuuru calani sirihane rijijicha inara suujua cuhanaine jaun.

28 Nii aiha atanebanane rijijieinte, cachaauru nota rai, inara jaberocohacha cacha caohacha tocohaneein inanacae. Nete, inara suujua cuhane casajenetiin, cacha coritaeraniha caohacha ichaa nocoetiin aaichene jaun, leinjiin calani rijijieein neeiche.

²⁹ Coaraain nainacuche Cana Coaunera rai rauhi que cacha relaeracuru aina fariseeocuru, inaraacha ichai coitucuhin ichaeneeichene jaun. Casajenetohichene jaunte, nechu cacha coritaeraniha, nii inara foerateracuru sonojohunru *profetacuru*, cacha caohachaain suujua coaaraauru, naaonjoainuri cojunaca ichaquiche ajeri caje, caohatiin itolere que corujueleteein.

³⁰ Nitohaneein ichaainte: ‘Cana foerateracuru jiniichaain ichao hacachelune jana nihane, coatiha acaaaru coroatajane rihahacache, *profetacuru* sohin jaaoruhane jana,’ naain ereeiche.

³¹ Niritiinte, inara raajenihane, nii inoaenlu *profetacuru* sohin jaaoreralu nefoeratenequichee coitucuhiche.

³² Inae nitohaneein nunuheteeuruhalu inara foerateracurune jaan besautiaauche.

³³ Acanocuru, acano caje nefoeratenacaauru. Coatiha usi tabai jana caseteco neriquicheeinne caje nichoteriheicheein.

³⁴ Nii coinante inara rene *profetacuru*, cha cojoelinanaa inaaurera, cacha relaeracuru, naaonjoainuri letoaanune jana, tabaauru sohin jaohin, coroso que tabaauru teein, tabaauru faohariquicheein sinacoca asae teein. Chaen techu, neseeuru neseeuru naineein arinajariquicheein.

³⁵ Nii jaunte inara, satiin cacha caohachaauru atinanohichuru coreniha caseteco coaariquicheein. Caohachaain suujua coaara Abeli atinaauruhalune que nunuheteein, Cana Coaunera rai jelai teein nenaas teeuruhane

jaan rori rohan nenaas *santuario* rohan teein inaraacha soilu- Berequihasi calaohi Sacariasi que tiaaojoaain, caseteco coaraa curiquicheein.

³⁶ Esinae rauhijiriinte nitohanihane coreniha, caseteco coaracurureein caa enene nenacaauru cachaauru,” nae Cana Coaunera rai rauhi que cacha relaaurera aina fariseeocuru rai Jesoso.

Jerosaleen cocoaichacuru coreniha chanaa Jesoone

³⁷ Niritohane baihate: “Cairichaaajoaaiche Jerosaleen cocoaichacuru, inara rene Cana Coaunera letonocuru *profetacuru* sohin jaohin, Cana Coaunera ere beracuru bodoosiiche ajeri quene jaun. Araai saaine niqui, ii cocoaichacuru ranaa jereeun, nitaro asae calaochichuru taojiaa ataoharine rijijieein. Nete canu esenetaeneeichene jaun canu rene unaa jereneeiche.

³⁸ Aonacuche. Ena caje coauneein, inae inara aina nerihaaunni. Aihana jaun, inae nerinaain inara beraicha.

³⁹ Inae nacoauneein canu coaariheeiccheein, turuhanune bana: ‘Caa ena turunaa Cana Curuaanaa coroaecuruhine satiin chauratane que nenacaauru cachaauru,’ nariquicheeine que tiaaojoaain,” nae Jesoso.

24

Nitajerichaain Teenforone biha Jesoone (Mr 13.1-2; Lc 21.5-6)

¹ Inae Teenforo caje mituhin jelai caje amuhane rai niha Jesoone janane, rohan nichuuntaacoain

caohatiin ichanohiniha nii Teenforone coara-caanu aina nerelanaa nichaanune.

² Nii jaunte: “Caohatiin ichanohiniha caa Teenforonena coarajeeiche. Esinae rauhijiriine inara rai aitoon, coatiha nii leinjiinniji ita ichoae nerinaain caa ena inaraacha coarajei ajeri, inae satiin nitajerichaaine jaun,” nae aina nerelanaa nichaanune rai Jesoso.

Nacoauneein tururichaain Curisitone bajaaaruha aina nerelanacaaurune

(*Mr 13.3-23; Lc 21.7-24; 17.22-24*)

³ Nii baihane, Oliboneein acaauruuhacha curu-atei ichatane ucuunno cuhacaanu, ecu turuhin jelai lauhecoha Jesosone jana, rohan nichuuntaa-caanu aina nerelanaa nichaanune. Nitohaneein rohan nichuuntaainne:

“Canacaanu rai nii chaitoonjoan beeinene jerichaanu Curuaanaa. Chabana nacoauneein cau tururiquiin. Chatohanaicha inae turuhe lalajeeine jana, ii turu cojoinaca beraneein coaarichaanuhin, inae saaelalajiha cana janonaane bana,” naain caje bajaacaanune janate:

⁴ “Caohachaain necohalajiin neeuche, nabana inara coritaauruha chunocohacurune coataara.

⁵ Arajii cachaaaurute, canu niha nocoetiin inara coritana jerecurureein: ‘Canune Curisito Mesi-hasineeunra,’ naainte, arajii cachaauru coritaaurureeincha.

⁶ Niha sonaana cau, tajiha, naaonjoaaaine coitucuhichene, jiaonriha nesoonetohichenera, nitohanihate cureein nii ajinihara. Nete, nitohanihane nihanatiin, jaiti cana janonaa satono que turuenereeincha.

⁷ Nejelau lauri nenacaauru ainate, sonaana que neeurureein leeocha lauri nenacaaurura. Nejelau atane que nenacaauruniha natiinte, leeocha atane que nenacaauru aina sonaana que neeurureeincha. Chaen techu, itolere sacuritaain niha mijetenane jana, araai laurii atanecuru que niha cureein carorara.

⁸ Nitohaneeinte nunuheca cureein, inae cana cojoanonaa satono que turuhelalajihane jana, jataain inaderaauruha cachaaurune jaan cojoanonaara.

⁹ Nii jana inarate tenojoiniha curiquicheein cocoainananacaaihuri rai, inara faojoaain, inara atinaain, naaonjoaain inara teeuruuhane coina. Chaen techu, satiin cachaauru, canu coreniha inara que nererojoecaeriin neeurureeincha.

¹⁰ Nii banate, arajii canu esenetaera niquichene, inaraacha esenetai jianeein, ita que nererojoecaain, nejesinajeein ita colurujueein ita teriquicheein cocoainananacaaihuri rai.

¹¹ Arajiite *profetaniha* nocoetiin turuhin namente cachaauru coritaauruhane, acaauru esenetaaurureein arajii cachaauru.

¹² Nitohaneeinte, jataain baaso coacuhin inae ita belaihuruuhane jianeein niha cuurureein cachaauru.

¹³ Nete laen, nii niicha esenetai esenetaane nunuhetihane caje coauneein, jerichanejeein satono que tiaain sacuera nichotereeinch.

¹⁴ Caa ena nenaat ichaonaa erenaa raotonu quiicha beebejei Cana Coaunera Cojoanonaate, satiin chauratane sacuritaain benojoinereein, satiin cachaauru inae coitucuuruhane jana,

besaute que turuha cana cojoanonaane coinara.

15 Profeta Danieriicha laenailu reretaain coaarate nii coitucuhin nichotenaan nainereein. Aihana jaun, inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratenaan casicheine coaraquichene,

16 Jodeau nenacaauru sorooruhine ichatane ucuunno que cuhincha.

17 Jana, rai loreri janori ichoae nenaan, jiaonriha fauhin rai rucuhele raane.

18 Jana rai nocoana jana nenaan, jiaonriha rai nenajau cauhin rai cajione ranaa coaaucane.

19 Jataainte cairichaojoaurureein nii cojoanonaan que turuhane bana ausurineein nenacaauru enecuru, sisihajeein canaanai sirichaauru enecuru, naaonjoainuri.

20 Cana Coaunera bajaauche, nabana jelaronaa bana, niheichu nebetacanaa cojoanonaan, naaonjoain bana niha nii sorohichene jaan cojoanonaane coataa.

21 Nitohaneeinte niha cureein jataain necairichanaa tabai, cana necoauna caje coaauneein nii chabana niha nitohanaine que airijiin niheichu nerinaain nii baiha.

22 Jana, nii cojoanonaan sarotiaeniha Cana Coaunerane, satiin cachaaauru nichotenaan nainecururihei. Nete, atiin sarotiareein, janijiin niicha ranojoihunru belaitohane jaun acaauru coreniha.

23 Chunocoha inara rai: ‘Caute ne Curisito Mesihasicha. Chajaau tejian coaanicha,’ naa inara raine, jiaonriha esenetaaichene.

²⁴ Turuururichaain inara rene casajeeuru profetaniha nocoetonacaauru aina Curisito mesihasiniha nocoetonacaauru. Nitohaneein turuhinte, itolere cojoelanaacojoai ichacurureein, janijiin Cana Coauneraacha ranojoinunrune maajeein coritana naine curuhane coritacuruhane coina.

²⁵ Nitohanihane ajinihane inara rai beeun, caje coitucuhin nainaain ichao hichene coina.

²⁶ Aihane jaun, inara rai: ‘Nota tajha cacha areroote ne,’ naauruhane nihanatiin jiaonriha cuhichene. Niheichu: ‘Nocoa caute ne nasiincha,’ naa inara rai chunine, jiaonriha esenetaaichene.

²⁷ Charijeeein teeinti, enoto mitu nichajai caje jilenetoha jiacane enoto soo nichaae cuhine, satiin coaanojoi ne. Nii rijijieeinte, satiin coaanojoiniha cureein, inae nacoauneein cau turuhanu acaihaniji Cacha Calao hineein nejanoanaa nichaaunne bana.

²⁸ Charijeeein teeinti, niha caanii setune que fauha ichotarine caje coitucuerae. Nii rijijieeinte coitucunojoinereein turuhanu canu Curisitonichaunne bana.

Tururichaain acaihaniji cacha calao hineein ne-janoanaane

(*Mr 13.24-37; Lc 21.25-33; 17.26-30, 34-36*)

²⁹ Inae nitohaneein niha nii necairichanaa tabai cojoanonaane janate, nocohenaneein nerotoreein enoto cono. Atene netonaite, conohane jianereein nii cojoanona bana. Jana arasi-jieeurute, dede caje naluurureein. Dedeeu ne-nacaauru nihanatiinte nerurujuuaaurureein.

30 Nitohanihane janate laen, inanacareein dede caje inae fauha uhanu canu acaihaniiji Cacha Calaohineein nena nichaaunne bera. Nii jana, satiin chauratane sacuritaain nenacaauru cachaaurute, jataain coasinacaun chanaain coaracuruhanne janane, dede sacari jana uhin fauha ureeunni acaihaniiji Cacha Calaohineein nena nichaaunne, jataain necaohachaain itolere ichana naineein nelateein.

31 Nitohaneein turuhinne canu letonocuru anjeraauru letoareeunni, tonijiaain jaaiha toteein, satiin chauratane sacuritaain, itolereneein satono tinonoritiin nenacaauru janijiin canu ranojoinunri cachaauru taojiaauruha canu raine coina.

32 Aihana jaun, caa uhera que inara relaanune jaan que nerelaauche. Charijieeein teeinti, inae rai nunecuru caohatonanaa alohacoaain ujuanihane caje, inae cataainjia ajaanaane coitucuiche.

33 Nii rijijieein, caa inara rai caitoonjoa tocohanihane coaraquichene, inae turuhelalajihanu acaihaniiji Cacha Calaohineein nejanoanaa nichaaunne que nainacuche.

34 Esinae rauhijiriinte, jaiti ooreniha caa enene nenacaauru cachaaurune jana aicheein.

35 Dede aina chauratanete nitajeeurureein. Nete laen, nitajenereein, caa caitoonjoa nainaane reeitiaain, canu ere.

36 Coatiha laen nihei chuni, rai cojoanonaa aina, ‘Naaonjoain riju tiaainte aicheeincha,’ naain nii coitucuera. Niheichu, Cana Coaunera letonocuru anjeraauru dedeeu nenacaauru nihanatiin coitucuruhi; niheichu canu- Calaohinichaune sai-

jieein coitucuhaaun canuhetonai. Acaihaniji canu Inaca Cana Coauneraachate, nii coitucuhin ne.

³⁷ Nihalu Nohene bana aihalune tocohaneeinte aicheein, inae nacoauneein turuha urichaunni acaihaniji Cacha Calaohineein nena nichaaunne cojoanonaa que turuhane bana.

³⁸ Coaracuche nachuhinti, jaiti uheniha elo tabaine jana, rai bote cuhane fauhin enoha Nohene que tiaaojoaain, raotojoeein lenoneein, acau cohin, necohansajiaain, naaonjoauruhalu cachaaurune.

³⁹ Nejetaote laen, urichaain elo tabaine coaaujeeurenihane jana, uha elo tabaine jaun jetao, jitariin acaaaru joocalu ne. Nii rijijieein nechu, coohatejeeurenihane cachaaurune jana, nacoauneein turureeunni acaihaniji Cacha Calaohineein nejanoanaa nichaaunne.

⁴⁰ Nii turuhanune rijieeritiinte, ocoana jana neeurureein coroatajai cachaauru. Leinjiinte, amanojoinihane jana, leeocha ratirinojoinereein.

⁴¹ Nii jana, coroatajai enecurute, tutune jaa neeuruhane jana, leinjiin amanojoinihane jana, leeocha ratirinojoinereein.

⁴² Nitohaneein: ‘Cuu tiaainte, turuha ureein canu Curuaanaa,’ naain coitucueneeichene jaun, tururichaunnine que nainaain ichaaoche.

⁴³ Charijieein teeinti, leinjiin cacha: ‘Cuu tiha janotiine janate turuha ureein cau asijiauto,’ naain coitucuhane que nainaane jaun, nii chuni rai loreri asae enohane jerelanaala caohatiin rai loreri beraihane jaun, nenere basijiaera. Nii rijijieein inara netonai jatoroaain neeuche.

⁴⁴ Aihane jaun, Cana Coaunera Calaohi cacha caje nejanonaa nichaaunne turu cojoanonaa coitucueneeichene jaun, inara netonai nainaain jatoraain canu cohacuche.

*Fatoroon ere tonoraain nenaacacha aina, fatoroon ere tonoraelanaala nenaacacha
(Lc 12.41-48)*

⁴⁵ Cha teeinti letoaain ratiriha rai fatoroonne tonoraain, inae cuu tihane jana rai loreri asaae nenacaauru cachaauru coroaate,

⁴⁶ nii jataain raotojoein neeine, nii letoaain ratirihane jaan ichajihane jana eruha nii rai fatoronne.

⁴⁷ Nitohaneein rai fatoroon aitoonjoa tonoraain icharate, esinae rauhijiriin satiin rai niicha sirii beraichaneein tereein rai fatoroon.

⁴⁸⁻⁴⁹ Nete laen: ‘Jaitijiecha carajareein rai fatoroon,’ naain nii leeochaauru letonocuru faojoaain sonajaain, ajetoriaacuru aina netaojiaain lenoneein ajeein, naaonjoaan,

⁵⁰ cha cohatejelanaala nihane jana turuhane, nii nechu aansai letono casetecareein rai fatoroon,

⁵¹ caseteco coaracuruha nechu cacha coritaa Cana Coaunera coitucuha nocoetonacaaurune rijijieein. “Ecute catu rioneein chanareein,” nae jetao aina nerelanacaauru rai Jesoso.

25

Lechooncrai ranunaauru ichanohi que erenaa

¹ “Cana Coaunera Cojoanonaate, aihruruha lechooncrai ranunacuru nisirihatenaabeseta quene rijijie. Nii lechooncrai ranunacurute, rai cono

erene que mocohin nenaamain, nii nisirihateneni cohaca cuure turu jana raauruhane coina.

² Nii lechooncrai ranunacuru caje, saoquii ranunacurute, niicha ichai que caohachaain coacuelanaala icharaauru ne. Jana, leeochaauru saoquii ranunacurute, jataain nainaain niicha ichai icharaauru ne.

³ Nii saoquii cha coacuelanaala nenacaauru ranunacurute, rai cono amaauruuhane saijieein, na-coaauneein noitecuruhane jaanu erene amaauren.

⁴ Nete laen, nii saoquii jataain nainaain nenacaauru, rai cono amaauruuhane choae tacaain, le botichananaain rai noinu erene amaaure.

⁵ Nitohaneein cuuru jana, jaiti turueniha nii nisirihatenine jaunte, inae siniitoruhane jaun, satiin sinihure nii ranunacuru.

⁶ Nii janate, inae dede catai riji: ‘Inae uha nii cacha nisirihateneni. Chajaain que tacaain raauchera’ naain toniha eheeonane jaunte,

⁷⁻⁸ nimichucutaain rai cono noitecuruhane jana, nii saoquii cha coacuhelanaala nenacaauru ranunacuru, nii saoquii nainaain cono noinu que erene uhaurera rai: ‘Atiin canacaanu sihuche aansijiin, nii inara cono noi erene quera. Inae saa rai noi erenene jaun, jacea canacaanu conone jaunne aitocoanura,’ naauruhane janate:

⁹ ‘Nainihaacanuta. Inara sihacaanune, canacaanu rai nihanatiin nerihane coaalanaalata. Chajaaincha que necoreteeuruuhane jaun cuhin, coretenichuchera,’ naaure nii rai cono noinu amaain cunacaauru ranunacuru.

¹⁰ Nete nii rai cono noinu erene coretiha cuuruha nii saoquii cha coacuelanaala nenacaauru

ranunacurune jana, inae turue nii nisirihateneni cacha. Nitohaneein turuha nii cacha nisirihatenene-nine janate, aina jiniiquiin loreri asae enooruha beseta que nii saoquii ranunacuru nainaai ne-nacaaurune jana inae nefue acuujuja.

11 Nii janate, inae nii acuujuaniha turuhin: ‘Curuaanaa, atiin canacaanu rai acuujuja joara-caaune canacaanu netonai enohacaanu,’ naau-ruha nii saoquii ranunacuru cha coacuelanaa ne-nacaauru, rai cono noinu coretecuruhane caje turuhinne janate:

12 ‘Esinae rauhijiriin inara coitucuhanune coaalanaala,’ nae acaauru rai nii curuaanaa. Nii rijiichate cureein Cana Coaunera Cojoanonaaa.

13 Aihana jaun, itolere bana nii que nainaai jatoroaain ichaaache, ‘Naaonjoai janonaa banate aicheein. Cuu tiariinte aicheein,’ naain coitucue-neeichene jaun.

*Cachaauru rai coriqui teein ratiricha fatoroon
rijicha Cana Coaunera Cojoanonaane*

(Lc 19.11-27)

14 Cana Coaunera Cojoanonaate, leinjiin cacha coriajai atane cuhane jaun, rai cachaauru cotiji-aain, acaauru que coriqui beraichatera rijijie,

15 leinjiin rai saoqui oaraacai coreneeein nena coata caje coriqui te. Jana leeocha raite, coroata oaraacaain te. Jana leeocha raite le oaracaain te, le cachaauru rai coretena nainecuruhane jeeoni-jihanaain teeinte amue.

16 Nii saoqui oaraancaain raera cachate, nii coriqui que rucuhele coreteein, que necoreteein saoqui oaraancaain nii coriqui jojoe.

¹⁷ Jerichanejeein techu, coroata oaraacaain niicha rai jojoe nii coroata oaraancaain raera cacha.

¹⁸ Nete laen, nii le oaraancaain raera, niicha bajei atane jachu cuhane nii rai fatoroon tenojoi coriqui asi.

¹⁹ Nii baiha carajaain catiaainte, inae turue nii acaauru curuaanaa coriqui teein ratiricha. Nitohaneein turuhinte, nii acaauru rai niicha tei coriqui coreniha acaauru rebe bajae.

²⁰ Nii saoqui oaraancaain raerate ichoaichaniha turuhin: ‘Curuaanaa, nocoha taolu canu rai, saoqui oaraancaain iicha tei coriqui. Nocoa chaen leeocha saoqui oaraancaain joocaaune jaan,’ naain, nii coriqui niicha jojoi tiha nii rai cachane janate:

²¹ ‘Jataain caohachate ichaaicha, jelai amuritorii nena beraichaneein ii tereeunnicha. Aihana jaun, chajaain caloheri asaae enoote jiniiquiin rachoojihacara,’ nae nii curuaanaa.

²² Nii baihate turue, nii cacha coroata oaraacaain coriqui raera. Nitohaneein turuhinte: ‘Curuaanaa, nocoa taolu canu rai coroata oaraancaain iicha tei coriqui. Nocoa chaen coroata oaraancaain joocaaunne jaan,’ naa nii coroata oaraacaain raera cachane jana jetaote:

²³ ‘Jataain caohachate ichaaicha, coroatajajei aina caohachaain erenaa tonoraain ichaine jaunne, jelai amuritoherii beraichaneein ii tereeunni. Aihana jaun, chaajaain caloheri asaae enoote, jiniiquiin rachoojihaca,’ nae nii curuaanaa.

²⁴ Nete laen, nii le oaraancaain raera cacha turuhin: ‘Curuaanaa, nechu aansai cachaneeine jaun, temueneeine jaaunru jelai caje temule

raain, ii ocoananelanaala nenacaauru caje nihanatiin temule raain,

²⁵ naaojoaaine jaunna ii coasiha, atane jachu cuhane ii coriqui asihun. Nete cau ne nii ii coriqui,' naain nii coriqui caina nii cachane jaunte:

²⁶ 'Iite, canu cacha baasoneein bajesiti cacha neei. Inae raotojoeein canu temulenelanaala ne-naa niha natiin raain, canu ocoananelanaala ne-naa caje temule raain naaojoaanune coitucuhine saijieein,

²⁷ chanuna chaen, canu coriqui amaain teneei banco cuhane. Bana nitohanihane jana ni-hane, canu turuneeine nii banco cuhane neein nejoocane jaanne maajeein rareeun,' nae nii cruaanaa.

²⁸ Niritiinte, ecu nenacaauru rai: 'Caje nii le oaraancai niicha sirii coriqui ruluhin, nii le-choonca oaraancaneein siricha rai teeuche.

²⁹ Nitohaneeinte, siricha rai jataain jelai amuritoheriin tenojoinereein, jelai amuritoheriin sirihane coin. Jana, cha sirilanaala nenaate, acahaniji niicha sirii, jitariin caje ruluerareein.

³⁰ Aihana jaun, caa canu cacha baaso cha coitucuhi mucuhin, naain airiniha nocohenaanau jaaochete, ecu neein mainajeein chanaaine,' nae ecu nenacaauru rai.

Rucuhenoinerichaain baaso icharaauru aina caohacha icharaauru ichaone

³¹ Inae rai cono caohacha que conohin, rai anjeraauru cataaun uhin turuhin rai rori- *trono* ichoae nelauriaanu canu Cana Coaunera Calaohi-neein cacha caje nejanoanaa nichaaune banate,

³² satiin lauri lauri nenacaauru cachaauru tururureein canu acatiha. Nitohaneein nacatiha turuuhane janate, carenerocuru caje, jelai teein cabraauru leruha carenero beraichane rijijieein,

³³ raotono nichajai que, nii janijiin niicha ranojohunru- rai cachaauru teein, najaabiji nichajai que nii rai cachanelanaala nechu aansaineein nenacaauru tereein.

³⁴ Nitohaneein jelai tihacoaain lerunajaainte, nii raotono nichajai que nenacaauru rai: ‘Chajaauche cajiha satiin, nii canu Inaca rausiaenojoineein neiniquichene. Chajaauchete, cana rai chauratane coaunaane caje coauneein, inara que banihateein canu Inaca Cana Coauneraacha rucujuei Cojoanonaa que ichaothicke.

³⁵ Inarate, mijitichaunne canu coroateein, cocorichaaunne acau que cacocaaain, canu nesurunaja colane amuhemuhecaaunne, canu nesurunajaanu teein,

³⁶ lanaa canu rai cajionene, carai cajione teein, cunaitichaunne turuhin cacoharaain, caresero cuhane nihanune jana, turuhin canu coaraain, naaonjoaain canu rai nelateein nerejetocoiche,’ narichaaunni acaaauru rai canu Cana Coaunera Calaohi cacha caje nejanoanaa nichaaune. Niritocoaaun acaaauru raine janate:

³⁷ ‘Curuaanaa, esinaaena mijiteeine ii coroateein, cocoireeine ii cocoaain,

³⁸ ii nesurunaja colane amuhemuhequine, ichei ii nesurunaja teein, ii cajione colane neeine, ichei cajione teein,

³⁹ cunaitheein, caresero cuhane neein naaonjoaine turuhin ii coaraain, naaonjoa rejetocoaan-

ulura,’ naauruha rai nii couluuonojoi suuju aquiin nenacaaurune janate:

⁴⁰ ‘Satiin canu nejeraauru cairicheinejeein nenacaauruhacha latei terejetocoichenete, canu rai tiha nii terejetocoichelu,’ naain acaaaru tonorareein nii acaaaru Curuaanaa *Rey*,’ nae acaaaru rai Jesoso.

⁴¹ ‘Niritohane baihate, nii najaa biji nichajai que rai cachanelanaala nenacaauru rai: ‘Naain cacaje amuhin, moconajaera aina rai letonocuru que banihateein ichanohin chabana jacanaa charanejeein nenaas usi rene cunichuche, nii coina neiniquichene jaun,’ naain usi rene letoanajareein.

⁴² Niritiin usi rene letoanajaainte: ‘Inarate, mijitichaunne niha natiiin, canu coroatelanaala, cocorichaaunne niha natiiin, acau que canu cocoaelanaala, naaonjoa rejectocoichelu.

⁴³ Niheichu canu nesurunaja colane amuhe-muhecaauunne niha natiiin, canu nesurunaja tiheeiche. Canu rai lanaa cajionene niha natiiin, canu rai tiheeiche. Niheichu cunaiteein, caresero cuhane neein naaonjoaanune niha natiiin turuhin cacoharaheeiche,’ naanu acaaaru raine janate:

⁴⁴ ‘Curuaanaa, esinääena ii coroaatelanaala, cooireeine ii cocoaelanaala, ii nenajanu lateeine ii rai telanaala, cajione lateeine ii rai telanaala, cunaiteein, caresero cuhane neein naaonjoaaine jana turuhin ii coraelanaala, naaonjoan rejectocoanulu,’ naain baaauruhane janate:

⁴⁵ ‘Esinää rauhijiriinte, satiin cairicheinejeein nenacaauru cachaauruacha latei teneeichene canu raite nii teneeiche.

46 Satiin nitohaneein nenacaaurute, chabana sanaachara caseteco que neeurureein. Jana, coluunojoi suujuaquiin nenacaaurute, chabana sanaachara ichaonaa que neeurureein,’ naain tonoranaareein nii acaauru Curuaanaa *Rey*,” nae canacaanu rai Jesoso.

26

Jesoso mucuuruuhane coina que ereereecuruuhane
(Mr 14.1-2; Jn 11.45-53)

1 Inae cachaaaru rai niritohane nainaainte, niicha relai nichaanune rai:

2 “Nii coitucuhichene rijijeeinte, coroata janoi cuhane nereein Fasoca beseta. Inae laen Cana Coaunera Calaohi cacha caje nejanoanaa nichaaunne mucuhin teeururichaain coroso que catinaauruhane coina,” nae Jesoso.

3 Nii bananeeinte, saseredotecuru curuaanaa curuaanaa Caifasi loreri asae ita taojiaaure saseredotecuru aina Jorionichaanune bichauhenaaaru,

4 Jesoso mucuhin, nechu nohaneein colurujueein sohin joaerateeरuhane que coaacuruhane coina.

5 Nejetaote: “Nainihaacache beseta cojoanona bana ichacaachene, nabana cachaaaru suuja rerohecana coataa,” naaure jetao ita rai.

*Jesoso ichoaete nejujuauruhane jaan choohite
 leinjiin ene.*

(Mr 14.3-9; Jn 12.1-8)

6 Betaniau, “Nabero caje nerautanaa,” naain niicha curuaateeuri- Simoon loreri asae niha Jesosone janate,

7 ajeri coreti caje ichanohin boticha laaojori cuhane, le curuhin jujuhin- jataain coretiin ne-naa amaain jetao, rori ichoae lauhecoha Jesosone jana, coturi ichoae nii jujuhi choohite nii leinjiin ene.

8 Nii coaraainte obajeein:

“Chanuna jataain coretohane saijieein, catohaneein jujuhi lanaje caa ene.

9 Bana jataain coreein que necoreteein, nii rai core coriqui que, cairicheihuru coroatajanelanaala,” naacaanu aina nerelanaa nichaanune janate:

10-11 “Chanuna niriitiin caa ene rerohecaaiche. Jataain canu rai caohachate ichae caa ene. Inae itolere bana inara aina nerihaaunni. Jana, cairicheihurute laen itolere bana neeurureein inara aina.

12 Caa jujuhi choroha cajabereeoo ichoae caa enenete, canu conautecuruhane coina cajabereeoo rucuheca ichae.

13 Esinae rauhijiriinte, cana rai chauratane sacutaain caa osa caje nichoterichaain cachane jaan que cachaauru relaauruhane jaaunru, caa cajabereeoo ichoae jujuhi tiha caa ene quene maa-jeein cachaauru rai ereerecurureein. Nitohaneeinte, coaunojoinereein itolere bana caa ene,” nae Jesoso aina nerelanaa nichaanune rai.

*Jesoso coulurujihā Jodasine
(Mr 14.10-11; Lc 22.3-6)*

¹⁴ Nii jana, nii aina nerelanaa nichaanune lechoonca coroataja neein nena Jodasite, saseredoteturu curuaanaa coaraa cue.

¹⁵ Nitohaneein cuhin jetaote:

“Inaaajoaain carai coriqui tenaa nainequiche, inara rai Jesoso tihanune coinata,” naain acaaaru caje bajaane jana nichata chooncaain coata caje nena coriqui teeuruuhane coina rai aitocure.

¹⁶ Nii jaun jetaote, jelai neorihane jana inae acaaaru rai Jesoso tenaa nainihane jaan que coacuhin jetao, amuhemujue Jodasi.

*Aina nerelanaa nichaanune aina janotiin lenon-
iha Jesosone*

(*Mr 14.12-25; Lc 22.7-23; Jn 13.21-30; 1Co 11.23-26*)

¹⁷ Inae nunuheca jorerera colane ichanohi faan quihuruuhane jaan beseta Fasocoa cojoanonaane janate, Jesoso rohan nichuuntaacaanu:

“Chu Fasocoa cojoanaa nunuhe cojoanotiin que, canaacha quiineni lenone ichacaaunne jereeita,” naain Jesoso caje bajaacaanu aina nerelanaa nichaanune janate:

¹⁸ “Chajaain taa neseeu leinjiin cacha loreri asaae cuhin: ‘Cacha relaerate ichei, ‘Inae canu cojoanona que tihane jaunne ii loreri asaae ureeun, cuu canu aina nerelanacaauru aina Fasocoa beseta bitoaanune coinara,’ naain aitoroate ii rai,’ nanichuchera,’ naain canacaanu caje tabaauru letoae Jesoso.

¹⁹ Niritiin letoanajaa Jesosone jaun cuhin, nii naitoonjoa rijijieein Fasocoa cojoanotiin que canacaanuhacha quiineni lenone ichacure aina nerelanaa nichaanune tabaauru.

20 Nitohaneeinte, inae nocohecane jana, lechoonca coroatajaain aina nerelanaa nichaanune aina lenoniha ne Jesoso.

21 Nitohaneein lenoniha nihacaanune janate: “Esinae rauhijiin, leinjiin inara cajete, cacoelaichaneei neeichene saijieein, caque nejeratenacaauru rai cacolurujueein, acaaaru rai caetereeincha,” naa canacaanu rai Jesosone jaunne,

22 jataain inaderaain le cachanichaanune: “Curuaanaa, canu quenacha aitohi,” naacaanu satiin aina nerelanaa nichaanune janate:

23 “Caa ojoaichu cuhane faan setejiarichate nii cacolurujueein caetereein.

24 Nitohaneeine, canu que aitiin laenanohineein niha Cana Coaunera Quiricha inoaensi cuhanena rijijieein, Cana Coaunera Calaohi cacha caje nejanoanaa nichaaunne, nii nainaa cureeunni. Nete laen, jataain cairichaojoareein nii canu colurujuera. Caohatorihalu niqui nitohanesihane ajiniha nejanoaenihalu nii cachane,” naa Jesosone janate:

25 “Cacha relaera, canu quenacha aitohi,” naa nii colurujueranu Jodasine janate:

“Mmmjjjm, nii bajaaine rijijieinte aicheein,” nae Jodasi rai Jesoso.

26 Nitohaneein lenonichaanune janate, faan mucuhin: “Narihara Cana Coaunera,” naain, cataaun nii faan tatuhin beeune beeuneein aina nerelanaa nichaanune rai teein:

“Caa quihuche. Caate, cajabereeo nenaaneein ne,” naain canacaanu rai teeinte, jerichanejeein nii faan ichaane rijijieein

²⁷ acau cooruhane jaan curu cuhane, conacai bino mucuhin: “Narihara Cana Coaunera,” naane baiha canacaanu rai nii conacai teeinte:

“Satiin jiniiquiin lerusune lerusunein caa conacai cooche.

²⁸ Caate cacoichananeein arajii cachaauru caohachanu que canuhacha ichaneni cojunacaneein chorohi jaonojoinereein. Acate arajii osaonacaauru que suujua acaterichaaine coina orichaau nine cojunacane.

²⁹ Nena laen, inae nacoauneein inara aina jini-inquiin, caa oba caje ichanohin conacai coenereunni, Ofa Cana Coaunera Cojoanonaa que inara aina jiniiquiin neein nii bana ocooonaneein nena bino cohacachene reeintiaaojoaain,” nae aina nerelanaa nichaanune rai Jesoso.

Coitucuha nocoetoenerichaain Fedorone biha Jesosone

(*Mr 14.26-31; Lc 22.31-34; Jn 13.36-38*)

³⁰ Nii baihane, Quiricha Inoaensi cuhane laenanoineein nena salmo tabaauru que nenatichaanune nainaain, Oliboneein niicha curuateeuri ichatane ucuunno que cuhacaanune janate:

³¹ “Enene cojoanotiin cuhanete, satiin inara, Canu esenetaain canu que jaaequiin neeichene jianeein, ita caje riaaneriquicheein, Quiricha inoaensi cuhane:

‘Carenero beraicha sohin jaaoruhane janate,
ita caje riaaneeurureein
niicha beraihuri carenerocuru,’
naain canu que aitiin besihalune rijijieein.

³² Nena inae ohanune caje ichanacaaunne, inara ajiniha Calileea cureeunni, ecu nacoauneein jini-iquiin nena coinara,” naa Jesosone janate:

³³ “Ii esenetaain ii que jaaecooruhane jianeein, neeuruha leeochaaurune nihanatiin, coatiha laen canu ii esenetaain ii que jaaecohanune jianer-ihaaunni Curuaanaa,” naa Jesoso rai Fedorone janate:

³⁴ “Esinae rauhijiriinte, enene cojoanotiin cuhane jaiti ereniha ataohari curuaanane ajiniha, nichata saain canu coitucuha nocoetoeneriquiin,” naa Fedoro rai Jesosone janate:

³⁵ “Arihaauni bajiaata Curuaanaa. Ii aina curuaaecaaain jereraa casohin cajaaoruhane coinane nihanatiin, nainihaaun ii que jaaecohanune jianeein ii coitucuha nocoetoenihanunera Curuaanaa,” naa Jesoso rai Fedorone janane, leeochaauru aina canacaanu netonai, nii aitoha Fedorone rijitojeeein aitocoaanu.

*Jetesemanii netiin Cana Coaunera bajaa Jesosone
(Mr 14.32-42; Lc 22.39-46)*

³⁶ Nii baihate, aina nerelanaa nichaanune aina jelai caje amuhin, Jetesemaniinein niicha curuateeuriu cue Jesoso. Inae ecu turuhacaanune janate:

“Cau nelauriaain canu cohacuchena, inara tonohanau tajiha cuhin Cana Coaunera bajani,” naain

³⁷ jiniichaain Fedoro, coroatajai Sebedeo calaohichuru, naaonjoaihunri amaain jataain nererojoe caaojoaain naonaain jetao, jataain inaderae Jesoso.

38 Nitohaneein inaderaain jetaote:

“Jataaine onaanajaanu rijitocojoaain casuuju
cuhanee inaderaunra. Cau nedaain, canu
jiniichaain ichaaajoeein cacohacuchera,” naain
ratirinajaain jetao,

39 acaauru caje, nita cuhin neseeonraain atane
que coturi temetaain jetao: “Ofa, icheine aitoon.
Bana ii jereeine jana nihane, caa necairichanaa
tabai caje canu rocohi. Nena canuacha jerei ri-
jijieein ichaaine jereneeun. Ii jereeine rijijieein
ichaainene jereeunra Ofa,” naain Cana Coaunera
bajaane nainaain jetaote,

40 jelaiha cuhin nii neeuruha aina
nerelanacaaurune jaau turuha Jesosone jana
jetao, najiniha sinihuruhane jana erunajaain
jetao Fedoro rai:

“Chanuna canu aina leratojoeein, sinilanaala
ichaaajoeein nenaan naineneeiche.

41 Sinilanaala ichaaajoeein neein Cana
Coaunera bajauche, nabana chatohanai que
nesaruhin neeichene coataa. Inara suujuate
niqui aitona naine, nete inara jaberoco jataain nii
abaantasine,” naain jetao acaauru ratiriin jelaiha
nii Cana Coaunera bajaane jaan cue Jesoso.

42 Nitohaneein inae coroata saain, jelaiha cuhin
Cana Coaunera bajaane cuhanee inaderaain jetaote: “Ofa, caa
necairichanaa tabai canu cojuhin canu coaaranu
caje canu roconaa jereneeine, ii jereeine rijijieein
ichaau,” naain jetao Cana Coaunera bajae Jesoso.

43 Niritiin Cana Coaunera bajaane caje, na-
coaauneein jelaiha cuhin, aina nerelanacaauru
coaraa cuha Jesosone jana jetaote, jataain baneto-
joe niha acaauru rai sinirenane jaun nimirichaa

acaauru notane jaun, sinihuru jana erunajaane jaun jetao,

⁴⁴ ecu ratirinajaain jelaiha cuhin, Cana Coaunera bajaane nichatasatiha cue, nii jauriaanejeein aitohane rijitojeeein Jesoso.

⁴⁵ Nitohaneein jetaote, jelaiha nacoauneein nii neeuruha aina nerelanacaaurune jaun, acaauru rene turuhin jetao:

“Jaitinachura caohacha nainetojoeein siniichete. Inae laen, Cana Coaunera coitucuhichuru bijiu tenojoinichaau, canu Cana Coaunera Calaohi cacha caje nejanoanaa nichaaunne cojoanonaa que turuha.

⁴⁶ Chajaain nimichucuchete amuhacachera, inae nichuuntajiha nii acaauru rai caeteraanura,” nae jetao Jesoso aina nerelanacaauru rai.

Jesoso mucuuruhane

(*Mr 14.43-50; Lc 22.47-53; Jn 18.2-11*)

⁴⁷ Niritiin, jaiti aina nerelanaa nichaanune aina ereereeca Jesosone janate, turuha uhe, Jesoso aina nerelanaa nichaanune lechoonca coroatajaneein nena Jodasi, letoanajaauruha saseredotecuru curuaanaacuru curuaanaa, chaen Jorionichaachene bichauhenaauru, naaonjoainurine jaun, enuha, sabere, naaonjoain que biji achunequiin nenacaauru arajii cachaauru uhaain.

⁴⁸ Jaiti Jesoso rene turuelanaalate, nii aina cu-nacaauru rai jetao: “Inae cuu turunaane: ‘Sohara cacha relaera,’ naain rai nomeri lohitoreeuni, caje coitucuhin, aca mucuhichene coinara,” naain acaauru rai be jetao.

49 Niritiinte Jesoso rohan nichuuntaain: “Sohara cacha relaera,” naain Jesoso meri lohitoha Jodasine janate:

50 “Cacoelaicha, ii jereeine rijijieein coaraain chatohaneein caetecurumiin,” nae Jodasi rai Jesoso.

Nii janate Jesoso rohan nichuuntaain, Jesoso mucuure nii Jodasi amanojoinuri cachaauru.

51 Nii janate, rai sabere rocohitiin, que nii saseredotecuru curuaanaacuru curuaanaa letono uricho sauhitiin beuhitoha leinjiin cacha, Jesoso aina cunaane janate:

52 “Jelaiha rai curu cuhane, nii ii sabere teeu. Satiin sabere que sonajaain jaaoreraaurute, sabere que acaaaru netonai sonojoiniha cuurureeincha.

53 Tana ena canu Inaca caje bajaanune, canu rai lechoonca coroata lauriin anjeraauru letoanaa nainiha, acaaaru aina canu coreniha ita sooruhane coinane coitucuhine.

54 Nene naineneeun nitohanai ichacaaunne. Inae rai Quiricha inoaensi cuhane, catohaneein caetecurichaainne que aitiin laenaeratihalu Cana Coaunerane nainaane nihane jaun,” naainte nii mucuha unacaaru rai:

55 “Chanuna necha aansai cacha mucuha unaa tocohaneein, sabere, enuha, naaonjoainuri que biji achunequiin canu mucuha uhiche. Cojoanoonetojoeine inara notaracaae, Teenforo asaae cachaauru relaa nenajacoon. Nii sai-jieeinte, canu mucunaja queneeiche,

56 inae nitohaneriquicheeine que aitiin, rai *profetacuru* que laenaeratihalu Cana Coaunerane nainaachene coina,” naa acaaaru rai Jesosone

janate, ecu jelai ratiriin, satiin sorohacaanu aina nerelanaa nichaanune.

*Niha chatohanaine rucuheraneein nenacaauru
Jorioocuru bichauhenaauru acatiha niha Jesosone
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Nitohaneein Jesoso mucuhinte, saseredotecuru curuaanaacuru curuaanaa Caifasi loreri asaae amaaure nii mucuureraauru. Nii janate, nii Caifasi loreri asaae ita taojiaain neeure Moisessa aitoonjoa rauhi que cacha relaaurera aina fariseeocuru.

⁵⁸ Nitohaneein, inae Jesoso amaauruuhane janate, nita acaaaru coarajeein cuujueein sacuhin, Caifasi loreri chaje rohan neeuruuhane Teenforo beraichacurune jaaun, ecu acaaaru aina enohin lauhequiin, jelai caje coaauneein Jesoso coaraje Fedoro: “Chatohanerichaaincha,” naane jaun.

⁵⁹ Nii janate, nechu jataain nohaneein, colurujueein Jesoso atinaeratecuruhane jaanu que coaaucure saseredotecuru curuaanaacuru, chaen niha chatohanaine rucuheraneein nenacaauru Jorioocuru bichauhenaauru, naaonjoainuri.

⁶⁰ Nete, nitohaneein arajii cachaauru colurujeeruha nohaneeine saiijieein, nii chatohaneein teeuruuhane jaanu lera erusichurene. Nii jaunte inae satononiha coroatajaain nimichuhin:

⁶¹ “Esinaete chuhisi: ‘Nainichaau caa netaoji-aain Cana Coaunera coroaecuruhane jaa coloheri Teenforo chamuhintiin, nichata janojoein cuhane

jerichanejeein michuhanunera,’ naain erenaja-quera,” naauruha nechu nohaneein colurijihane janate, inauheneeicha acaauru aonaje Jesoso.

62 Nii jaunte laen nimichuhin:

“Chanuna ereneei iitonai. Esinaena rauhijiriin aitoine jaunna caa ii colurujeeuruha,” naain caje bajae saseredotecuru curuaanaacuru curuaanaa, nete inauheneeicha aonaje Jesoso

63 Nii jaunte rai nacoauneein:

“Esinae rauhijiriin, Cana Coaunera coreniha beeinena jereeun. Iina esinae Cana Coaunera Calaohi Mesihasinee,” naa rai saseredotecuru curuaanaacuru curuaanaane janate:

64 “Esinae rauhijiriinte, acanichaaunne que aitohicha. Canu Cana Coaunera Calaohi cacha caje nejanoanaa nichaaunnena, coarajeeichene jana canu Inaca itolere ichana nainera Cana Coaunera raotono nichajai que lauhecoreeun-nicha. Chaen techu, dede sacari jana uhin fauha uhanune coaariquicheeincha,” nae nii saseredotecuru curuaanaacuru curuaanaa rai Jesoso.

65 Nii jaunte obaaecane cojunacaniha rai cajione romaromaain:

“Nechu jataain Cana Coaunera baijiaate, caritiin ere caa cacha. Cha nenacaaenneeina coaraain cana rai colurujuera laterihacache. Inae inara netonai, Cana Coaunera baijiaeraanu rijitiin irihane aonaquiche.

66 Tonaquiche jana inara, caa naitoonjoa que,” naa rai leeochaauru rai janate:

“Esinaete chuhisi, aca colurujeeuruuhane jaan ujuaihone. Aihane jaun ohanete caohachae,” naaure.

67 Niritiinte, nomeri colunecuruha tabaaurune jana faohacure leeochaauru.

68 Jana leeochaaurute:

“Chajaain aihane, ii Mesihasineeine, caa ii so-era cojoeluinaaura,” naain rai nomeri faojoaain soore.

*Jesoso coitucuha nocoetenaha Fedorone
(Mr 14.66-72; Lc 22.56-62; Jn 18.15, 25-27)*

69 Nii tonohanau, ecu airiniha lauhecoha Fedorone janate, rohan nichuuntaain:

“Iitonaita, Calileea cocoaicha Jesoso aina nerejetohilu,” naa leinjiin ene coseenraneein nenaane janate:

70 “Nii aitohine jaan cacha coitucuhaaun,” naain satiin aonajeeuruha ecu nenacaaurune urichoo suujue Fedoro.

71 Nii baihate jelai caje amuhin, rijia acuujuua rohan cuha Fedorone janate, coaiteen coaraain:

“Caa netonaite, Nasarete cocoaicha Jesoso aina nenaan ne,” naain leeochaauru rai biha leinjiine janate:

72 “Esinae rauhijiriin, Cana Coaunera notaracaae nii cacha coitucuaunta,” naain nacoauneein suujue Fedoro.

73 Nii catiariinte Fedoro rohan nichuuntaacoaain: “Esinae rauhijiriinte, iitonai aina nenaaneein, ii ereecha cajete necoitucuerateeicha,” naaure nii ecu nenacaauru Fedoro rai.

74 “Esinae rauhijiriin, Cana Coaunerate coaraje nii cacha coitucuenihanunera,” naain nesuujija Fedorone janate, nii rijieoritiin inae ere ataohari curuaana.

75 Nii jaunte: “Jaiti ereniha ataoharine janate, nichata saain cacoitucuhine suujueriquiincha,” naalu rai Jesosone coacuhin, jelai caje mituhin amuhin, jataain inaderaain chanae Fedoro.

27

*Filato rai Jesoso teeuruuhane
(Mr 15.1; Lc 23.1-2; Jn 18.28-32)*

1 Inae janohane jana jetaote, satiin saseredote curuaanaacuru aina Jorioocuru bichauhenaaaru, ita suujuua rijitojoeein ita suujuau tacaasure, Jesoso sohin jaaoruhane coina.

2 Nitohaneein jetaote, Jesoso ichojoaain amaain, Roma cocoaichaneein nenaacoberenadoro Filato rai teeure.

Oha Jodasine

3 Inae nitohaneein Jesoso cairichaain atinaaurichaainne que nainaain jetaote, jataain inaderaaain netojoeete nii coulurujuera Jodasi. Nii jaun jetaote, nii saseredotecuru curuaanaacuru curuaanaa, chaen Jorioocuru bichauhenaaaru, naaonjoainuri rai jetao:

4 “Osa quene nesaruun, inara rai atinaaichene coina cha ujuaihonetanaala nenaac cacha teeinchaa,” naain nii nichata chooncai coataneelin ne-naa coriqui coretecuruhane jaan cainaa Jodasine jana jetao, ranaa jerelanaala:

“Nihei cha coitucunaa nainihaacaanu nii aina canacaanuta. Iichate nii coitucuujuueeicha,” naaure jetao Jodasi rai.

5 Nii jaun jetaote Teenforo asae nii coriqui rialaaitiin ratiriin jelai caje amuhin raajenihane rai raro ruluhi ohe Jodasi.

6 Nii jana jetaote, nii coriqui raain jetao:

“Caa coriquite, ichana corenihane jaun, leinjin calaniheein ne. Aihana jaun, jelai teein Cana Coaunera rai canaacha tei coriqui curu cuhane, caa coriqui tenaa nainihaacache,” naaure jetao ita rai saseredotecuru curuaanaacuru curuaanaacuru.

7 Niritiin coacuhin ita suujua tacaain jetaote: “Atane rocooruha, caje ojoaichucuru jaauruhane coinane jaan,” naain niicha curuaateeuri jelai coretecure nii coriqui coreniha, niha nejelau atane caje uhin onaane, cuu teein conautecruhane jaanu que.

8 Nii jaun jetaote, Ichana Batane neein jelai curuaateeure enanetojoeein cachaaru.

9 Nitohaneeinte: “Rai core nichata chooncaain coataneein nena coriqui, Isarrelitacuruhacha cainai raainte,

10 coreniha: ‘Atane rocooruha, caje ojoaichu ichacuruhane coinane jaan,’ naain acaauruhacha curuaatei atane coretecure,” naain beratihalu *profeta Jeremihasi* que Cana Coaunerane riji-jieein, nii naitoonjoa nainaare.

*Filato acatiha niha Jesosone
(Mr 15.2-5; Lc 23.3-5; Jn 18.33-19.38)*

11 Inae coberenadoro Filato rene Jesoso amaain turuaauruhane jana jetaote:

“Iina Jorioocuru curuaanaacuru curuaanaa-Rey ineein,” naain caje bajaa Filatone jana jetaote:

“Esinaete, acanichaunne que aitohicha,” naain Filato tonorae Jesoso.

¹² Nii nainiha jetaote, cuu teein, Filato rai coulurujeuruha saseredotecuru curuaanaacuru curuaanaacuru aina, Jorioocuru bichauhenaaaurune jana jetao, cuu inauheneeicha aonajenajae Jesoso.

¹³ Nii jaun jetaote:

“Toon ii que ereein ii coulurujuueeuruhane aonaina,” naa Jesoso rai Filatone jana jetaote,

¹⁴ cuu inauheneeicha tonoraelanaala aonajian Jesosone jaun jetao, inae rai tonaaain irihane jaanu coitucuene Filato.

Jesoso ateinaauruhane rai neeuruhan
(*Mr 15.6-20; Lc 23.13-25; Jn 18.38-19.16*)

¹⁵ Beseta bana naineein jetaote, janijiin: “Acate caohachae mituhanera,” naauruha satiin cachaurune jaan mitai nejesinane caseteco nihane caje Filato.

¹⁶ Nii bana jetaote, caresero cuhane niha itolare sacutaain cachaauruhacha coitucui Jesoso-Barabasineein acaauruhacha curuaatei caseteconeeinne jaun jetao,

¹⁷ satiin netaojiaain codohacooruha, nii Jesoso colurujeeurera cachaaurune jana:

“Chariji caa coroatajaaikhuri caje, jianichaunne jeriquiche. Caa Jesoso Barabasina jianerihanu. Ainihanena caa Jesoso Mesihasineein acaauruhacha curuaatei jianerihanu,” naain jetao acaauru caje bajae Filato,

¹⁸ nechu necoelai caaun, nii coulurujeuruha raine que nainaane jaun.

19 Niritiin jetaote, nii cha rucuhecane jaan rori ichoae lauhaca Filatone jana: “Jiaonriha chato-haneein nii cha ujuaihoneala nena cache tenaa coaauquine. Janotiine nii cache coreniha, jataain baasoneein sinicoonni,” naain jetao berate rai comasai.

20 Nejetaote, satiin nii cuu nenacaauru cachaauru suujuau tacaasure, saseredotecuru curuaanaacuru curuaanaacuru aina Jorioocuru bichauhenaauru: “Nii Barabasi jianeein nii Jesoso atinaeratee,” naauruhane coinia.

21 Nii jana jetaote:

“Chariji jianichaunne jeriquiche, caa coroata-jaaihuri caje,” naain acaaauru caje nacoauneein bajaa coberenadoro Filatone jana jetaote:

“Nii Barabasi que tacaajeein jianeeinenaa jerichaanan,” naauruhane jana:

22 “Chajana laen ichareeun, caa Jesoso Mesi-hasineein acaaauruhacha curuaatei aina,” naa Filatone jana jetaote:

“Coroso que laen aca teeu,” naaure jetao satiin.

23 Niritocuruhane jaun jetaote:

“Chatohanai baasona ichae,” naa Filatone jana jetaote:

“Chajaain coroso que teechaau,” naaure jetao tonijiaain ehequin.

24 Nitohaneein Jesoso jianena jerih Filatone saijieein, jianena jerelanaala rai suujuarerohe-caauruha jelai ichoae jauhecotojoeriin cachaaru-ne jaun jetao, acau raerateein jetao:

“Coatiha canu, orichaain caa cachane ujuai-honeein nerinaaunni. Inarate nii ujuaihoneein neriquicheein,” naain jetao, satiin coarajeeuruha

nii cuu nenacaauru cachaaurune jana jetao, rai biji culeje Filato, nii ujuaihoneein nenihane coujunacaneein, nitohaniha acaaaru ichaone jaun.

²⁵ Niritoha acaaaru rai Filatone jana jetaote:

“Satiin canacaanune, canacaanu bereecuru aina jiniiquiin, oha caa cachane ujuaihoneein nerichaanuhi,” naaure jetao Filato rai cachaauru.

²⁶ Nii jaun jetaote, Barabasi jianeein, nii baiha Jesoso bisichateein acaaaru bijiu teein, coroso que terate Filato.

²⁷ Nii jana jetaote, niha chatohanaine rucuhecurreduhane jaan coloherineein nenaaloreri seeonjoa asae Jesoso amaaín jetao, curuhacaain netaojiaain neeure satiin coberenadoro rai soodarooru.

²⁸ Nitohaneein teein jetaote, rai cajione rocohin que cajione lanajai curuhacure.

²⁹ Chaen couturi que ojoa caje ichanohin comai lauriaain jetao, rai biji raoton nichajai que otiha teeure. Nii baiha jetaote, nacatiha neseeonriaain: “Laraajiin ichaohine Jorioocuru curuaanaacuru Curuaanaa Reycha,” naain jetao,

³⁰ couluneeinchuru nii rai niicha teeuri otiha que jetao, rai couturi faoha facoaain que ninichaajeeure.

³¹ Nitohaneein mainajeein ninichaajeeuruhanne baiha jetaote, nii cajione lanajai, que niicha curuhacuri rocohin, nacoauneein nii rai cajione esine curujuuai amaaure coroso que teeuruhanne coina.

Coroso que Jesoso teeuruhanne

(Mr 15.21-32; Lc 23.26-43; Jn 19.17-27)

³² Inae nii neeuruhanne jaan jelai caje Jesoso amaauruhanne jaun jetaote, Sirene cocoaicha

Simoon eruhin, que nii Jesoso teeuruuhane jaanu coroso baijiaeratecure.

³³ Inae nitohaneein cuhin: “Couturi Bejero,” naain acaauruuhacha curuaateihu turuhin jetaote,

³⁴ elonai que jasisii bino que jetao Jesoso coocaaure. Nejetaote, aansijiin cohin aonaain conaa jerene Jesoso.

³⁵ Inae coroso que Jesoso teein jetaote: “Chariji raineeicha nedareein,” naain jetao Jesoso cajione que nocoatijiaaure soodarooru.

³⁶ Nii baiha jetaote, Jesoso asaae nelauriaacoaain beraihure.

³⁷ Nitohaneein teein jetaote, rai couturiniha nii casetecaauruhane jaan leranu rai curuaa laenacure:

Caate Jorioocuru curuaanaacuru Curuaanaa Rey ne.

naain.

³⁸ Cuu jetao techu aina teein, coroatajai asi-jiautooru teeure coroso que, leinjiin najaa biji nichajai que, leeocha rai raotonu nichajai que, naaonjoaain.

³⁹ Jeloon situnacaaru cachaaru jetaote, couturi jisijishanaain jetao:

⁴⁰ “Tleenforo chamuhitiin, nichata janjojeein nacoaauneein michuhin jerichanejeein tiha no-coetona jereei inatiin, chajaain ichaajeni hane ijibereeo ichoteratee. Esinae rauhijiriin Cana Coaunera Calaochine e, nii coroso caje faau,” naaure.

⁴¹⁻⁴³ Jerichanetojoeein jetaotechu:

“Leeochaaru ichoteratihane saijieein, tana laen raajenihane rai jaberoco ichoteratena nainihane. Aca Isaraelitacuru Curuaanaa Rey

nihane, coroso caje fauhinete cana netonai esenetaacache. Cana Coauneraacha que jaaecohane jaun, chajaain ena ichoteratemiiin Cana Coaunera, esinae rauhijiriin niicha belaai nihanete, cana netonai esenetaacache. Acate cana rai aitelu, Cana Coaunera Calaohi nihane que,” naain jetao que ninichaajeeure saseredotecuru curuaanaacuru curuaanaacuru, Moisesa rai rauhi que cacha ralaaureraauru, chaen Jorioocuru bichauhenaaaru, naaonjoainuri.

⁴⁴ Nii coroatajai asijiautooru coroso que necacaauru nihanatiin jetaotechu, nocoeje chanure.

Oha Jesosone

(*Mr 15.33-41; Lc 23.44-49; Jn 19.28-30*)

⁴⁵ Nii jana jetaote, enoto chujutoroa caje coaauneein, nuna macohi amuritoheriha enotone reein tiaaojoaain nocojoe cana rai chauratane.

⁴⁶ Nii rijieeoritiin jetaote, tonijiaain ehequiin: “Cana Coaunera, chanuna jelai canainatejeei,” naane neein jetao: “*Eli Eli lema sabactani,*” nae jetao Jesoso.

⁴⁷ Niritohane jana, tabaauru ecu neein aonajeeurera jetaote: “*Profeta Irihasi cotihacate aite,*” naaure.

⁴⁸ Nii jana, leinjiin acaaaru caje jetaote, soroneeiin jeluhariin cuhin jetao, sie tocohaneeiin nenaaraiin ruhin, elohanti bino sisiaain jetao, jiarana nujua que nujuateein Jesoso ujuae que te, cohane coina.

⁴⁹ Nii jana leeochaauru jetaote:
“Coa rerohecaate, ichoteratiha uha niicha cotijiai Irihasine coarajihacachera,” naaure.

50 Nejetaote, nacoauneein tonijiaain auhaquiin inae ohe Jesoso.

51 Nii rijieeritiin jetaote, ecui caje coauneein ocoai cuhin nesoaiheite Teenforo cuhanai bujuaneein nenaajajone. Nii jana jetaote, nerurujuua cana rai chauratanene jana jetao, netatujuacoae ajerichuru.

52 Atane banaaurune maajeein, netatijuacoaane jana jetaote, Cana Coaunera coitucueraneein onacaauru cachaauru nihanatiin jetao, o caje ichanajacoaain ichaaore.

53 Nitohaneein jetaote, inae o caje ichanaa Jesosone baiha jetao, Cana Coaunera nese Jerosaleeun cuuruha nii o caje ichananacaaurune jana jetao, coaranaacure arajii cachaauru.

54 Nitohaneein uha carorane jana, nihacoaa cojoelanaacojoaine jana coaraain jetaote, jataain nesooneein jetao:

“Esinaete chuhisi, Cana Coaunera Calaohine caa cacha,” naaure jetao, soondarooru curuaanaa aina ecu Jesoso beraiha nenacaauru.

55 Nii jana jetaote, caje icharaain netiin Jesoso coarajeeure arajii enecuru Calileea caje coauneein coroatajaneraneein sacuureraauru.

56 Acaauru aina jetaote cuurelu Maadala bene Mariha, chaen Saantiaao aina Jose neba Mariha, chaen Sebedeo calaohichuru neba, naaonjoainuri.

*Jesoso jaberoco rucuhecuruhane
(Mr 15.42-47; Lc 23.50-56; Jn 19.28-42)*

57 Inae nocohecane jana jetaote, turuha uhe leinjiin Jesoso ere tonoraera coriquihonaneein nenaajajone Arimatea cocoaicha Jose.

⁵⁸ Nii Jose jetaote, Filato coaraa cue, caje Jesoso jaberoco bajaane coina. Nii jana rai Jesoso jaberoco teratiha Filatone jaun jetaote,

⁵⁹ Jesoso jaberoco raain, lino caje ichanohi shojera que conajaain,

⁶⁰ que banijiaain niicha bajerateilu ajeri jachu cuhane Jesoso jaberoco rucujue Jose. Nii baiha jetaote, ajeri que caohatiin nii ajeri jachu bacuujuua fuhin ratiriin jelai caje amue.

⁶¹ Nii jana, Maadala bene Mariha, chaen nii leeocha Mariha, naaonjoainuri jetaote, nii ajeri jachu Jesoso jaberoco teeuruuhane jaan acatiha laurijiatiin nedaaure.

Jesoso jaberoco rucuhecuruhane jaan beraihu-ruha sondaroorune

⁶² Nii cojoanoo, inae nebetacanaa cojoanona nihane jana jetaote, Filato coaraa cuure jiniiquiin saseredotecuru curuaanaacuru curuaanaacuru aina fariseeocuru. Nitohaneein cuhin, inae rene turuhin jetaote:

⁶³ “Curuaanaa, jaiti ichaothane banate: ‘Inae nichata janoha ohane baiha jete, o caje ichanareein,’ naain ererejetoha nii casajeneein ichaonaa cachane quene coaucaau.

⁶⁴ Aihane jaun, nii rucuhecuruhane jaan ajeri jachu beraichatee nichata janoi reeintiaain. Ainihanete, janotiin uhin rai jaberoco amaain: ‘O cajete ichanae,’ naain cachaauru coritaaurure aina nerelanacaauru. Niite laen, nii jauriaanejeein amurijiriin, jataain banejelanaala casaje nere,” naauruha Filato raine jana jetaote:

⁶⁵ “Caa nitohanei beraichane que nenacaauru soondarooru aina cuhin, caohatiin jerequichene tocohaneein nii ajeri jachu funichuche,” nae acaaauru rai Filato.

⁶⁶ Nii jana cuhin jetaote, nii ajeri jachu niha Jesoso jaberocone jaan rai fuera sechaoure leinjiin secho que. Nitohaneein sechaain jetaote, ecu beraichanu que soondarooru ratiriin cauha cuure saseredotecuru curuaanaa curuaanaacuru aina fariseeocuru.

28

O caje ichanaa Jesosone (Mr 16.1-8; Lc 24.1-12; Jn 20.1-10)

¹ Inae situha nebetacanaa cojoanonaane jana, inae ena janohajija semana nunuhene jana jetaote, Jesoso jaberoco rucuhecuruhane jaan- ajeri jachu coaraa cuure Maadala bene Mariha aina leeocha Mariha.

² Nii jana dede caje fauha anjerane jana jetaote, luhecotariin uhe jataain mijiaainetiin carora. Nitohaneein fauhin jetaote, nii Jesoso jaberoco rucuhecuruhane jaan ajeri jachu fuuruhane jaan ajeri jaberoco raain nichoae laujuae nii anjera.

³ Nii anjera jetaote, aiha jiacanene tocohaneein jiquihacoha rai jaberocone jana, jataain somajae rai cajione aiha dede sacarine tocohaneein.

⁴ Nii coaraain jetaote, coasina caaun rijijijianeein onaa rijiiinanaain nedaaure nii beraihurera soondarooru.

⁵ Nii jana jetaote, nii coaraa cunacaauru enecuru rai jetao:

“Jiaoriha casiichene. Inae, nii coroso que teein niicha ateinaauri Jesoso ariha aaichene coitucuhanura.

⁶ Inae cau nihei. Inae nii aitoroaetohane tocohaneein o caje ichanaa. Chajaachete, nii teeuruhalune jaan jelai coarae,” naain acaauru que nii Jesoso jaberoco teeuruhanee jaan jelai coaarate nii anjera.

⁷ Niritiin jetaote: “Chajaain erojoeein cuhin aina nerelanacaauru rai: ‘Inae jetao o caje ichanaa. Calileea cuhin jetaote, inara ajiniha turureein. Ecu jetaote coaariquicheein,’ nanichuche. Inara rai bihanune coinane cau turuun,” naain jetao, nii enecuru letoae anjera.

⁸ Nii jaun jetaote, jataain casihuruhane saijieein rachoojoeein nii Jesoso atane bana jelai caje erojoeein uhin biha uure nii enecuru, aina nerelanaa nichaanune rai.

⁹ Nii jana jetaote, uujuueuruha nii enecurune jana acaauru rohan neoritiin acaauru rai iriha Jesosone jana rohan nichuntaain, rai tija que nebalurucaain cutujuaain jetao coroaaecure nii enecuru.

¹⁰ Nii jana jetaote:

“Jiaonriha casiichenera. Chajaain canejera-neein nenacaauru rai benichuchete, Calileea cuuruhine. Ecune ita coarichaanuhi,” nae jetao, nii enecuru rai Jesoso.

Niicha coarai beeuruha soondaroorune

¹¹ Nitohaneein biha cuuruha enecurune nainiha jetaote, saseredotecuru curuaanaacuru curuaanaa rai jetao, neseeu cuhin jitariin niicha coaracuri biha cuure nii atane banau Jesoso

jaberoco beraiha nenacaauru soondarooru tabaauru.

¹² Nii jaun jetaote, ita suujuau tacaauruhane coina Jorioocuru bichauhenaaauru coaraa cuure saseredotecuru curuaanaacuru curuaanaacuru. Nitohaneein inae ita suujuau tacaain jetaote, jataain arajiin soondarooru rai coriqui teein jetao:

¹³ “Janotiin sinihacaanune tonohanaute, turuhin Jesoso jaberoco amaaure aina nerelanacaauru,” naauche.

¹⁴ Nii jana coitucuhin, chatohaneein inara tenaa coaaucha coberenadoro Filatonena, ita suuja tacaain caohaterichaanuhi, nabana baasoneein inara tihane coataa,” naain jetao, nii soondarooru suujuateeure saseredotecuru curuaanaacuru curuaanaacuru aina Jorioocuru bichauhenaaauru.

¹⁵ Nii jaun jetaote, nii coriqui raain jerichanetojoeein nii suujuatenajaauruhane rijitojoeein jetao, aitocure nii soondarooru. Nii jaun jetaote, niritiin acaauru coritaauruhane jaun, eneenetojoeein nii esenetaaure Jorioocuru.

Niicha icharatei ichacuruhane coina aina nerenacaauru rai aitoha Jesosone

(Mr 16.14-18; Lc 24.36-49; Jn 20.19-23)

¹⁶ Nitohaneein canacaanu rai beratiha Jesosone jaunne, Calileea nii naitoonjoa ichatane ucuunno cuhacaanu lechoonca leinjiin Jesoso aina nerenanaa nichaanune.

¹⁷ Ecu turuhacaanune janate, ecu canacaanu ajiniha niha Jesosone jaun, rohan turuhin jaiti acanihane esenetaaurenih tabaaurune saijieein coroaecaanu.

¹⁸ Nii janate canacaanu rohan nichuuntaain:

“Canu Inaca Cana Coaunerate, chauratane, dede, naaonjoainuri rai cocoainacainein nihanune coina caeteein ne.

¹⁹ Aihane jaun, chajaain satiincaa chauratane sacutaain lauri lauri nenacaauru cachaauru relanichuche inara relaanune rijijieeinte, canu ere tonoraera neeuruhine. Chaen, Canu Inaca, canurai calaochinichaunne, Cana Coaunera Suujue, naaonjoain nichaanune rai canacaanu cachaneein nenaajereraauru cojunacateein baotisana-jaauche.

²⁰ Chaen inara rai aitonajaaocaaunne rijijieein, nii caitoonjoa tonoraain ichaaoruhane coina relanajaauche. Jerichanejeeeinne besautiha cana cojoanonaane reeintiaaojoaain itolere bana inara aina nereeunni,” naain necoe Jesoso.

**Cana Coaunera Ere
New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b7ea44d4-3dbd-507b-9a19-256b56fe9b07